


# KIDIMBU YA NTETE

 Beto kulumusa bayintu ya beto ntangu yayi samu na kusambila.

Tata ya beto ya Mazulu, beto ke tonda Nge na nkokila yayi samu na yayi, bweso na kukwiza sambila Nge. Beto ke vutula matondo na kuvwanda ya moyo mpe kuzwa luzayikisu ya nene yayi ya Luzingu ya Kukonda nsuka kuzinga na kati ya beto. Mpe beto me kwisa, na nkokila yayi, Tata, samu na kulonguka Ndinga ya Nge, kintwadi, mansweki yayi ya nene yina me bumbama kubanda mbandukulu ya yinza. Mpe Mwana-dimeme kele Yina kaka lenda monisa Yawu na beto. Mu ke sambila ti Yandi ke kwisa na kati ya beto, na nkokila yayi, mpe ke baka Ndinga ya Yandi mpe ke monisa Yawu pwelele na beto, ti beto fwana zaba wapi mutindu kuvwanda bisadi ya kulutula mbote samu na Yandi, na bantangu ya nsuka yayi. O Nzambi, mutindu beto ke mona ti beto kele ntangu yayi na ntangu ya nsuka, sadisa beto na kuzaba kisika ya beto, Mfumu, mpe kulemba ya kimuntu ya beto, mpe kieleka ya Nkwizulu ya Mfumu, ntama ve. Beto ke lombamba yawu na Nkumbu ya Yesu. Amen.

<sup>2</sup> Mu banza ti ya vwandaka David, tubaka, “Mu ke vwandaka na kiese ntangu ba ke tubaka na munu, beto kwenda na yinzo ya Mfumu.” Ya ke vwandaka ntangu nionso ntangu ya mbote na kukwisa. Mpe—mpe kulonguka Ndinga, kintwadi, ya ke pesaka beto kivuvu yayi ya nene.

<sup>3</sup> Ntangu yayi ya kele na mingi ya kutelama, mpe mu ke sala kaka nswalu mutindu mu lendaka sala. Kasi mu ke na kivuvu ti beno me sepela na Mvwandulu ya Mpeve-Santu, mutindu munu mpe, na mwa bantangu fioti me luta.

<sup>4</sup> Mpe, bubu yayi, kima mosi me salama na munu yina mu me kuzwaka ve kubanda ntama. Mu vwandaka longuka na zulu ya yayi, na zulu ya luzayikisu yayi awa, na zulu ya kuzibuka ya Kidimbu.

<sup>5</sup> Bamvula me luta mu tubilaka Yawu na nswalu nionso awa, pene ya bamvula makumi zole me luta, mu banza, to kima mosi ya mutindu yina, kasi na mutindu mosi to yankaka mu vwandaka kaka ve na kiese. Ya monanaka ti ya vwandaka na mwa bima, mingi-mingi na kati ya Bidimbu yayi, samu ti Bidimbu yina kele Buku ya muvimba. Beno me mona? Ya kele Buku. Buku ya muvimba kele Buku mosi, ya kukanga. Yawu ke banda . . .

<sup>6</sup> Mumbandu, kana mu vwandaka na kima mosi awa, mu zolaka talisa na beno yina mu zola tuba. [Mpangi Branham ke sadila bitini ya ba-papié samu na kutalisa mutindu ba vwandaka balula mpe kukanga roulette—Mu.] Yayi kele kidimbu mosi. Yina ke sala mosi, mpe beno ke balula yawu mutindu yayi, mutindu

yawu vwandaka ya kubaluka. Mpe beno ke balula yawu na mutindu yayi. Mpe, na nsuka, ya kele na mwa kitini ke luta, mutindu *yayi*. Yina kele kidimbu ya ntete. Mbote mingi, na yina, ya kele kitini ya ntete ya buku. Na manima, kidimbu yina me landa ba me balula yawu mutindu *yayi*, kaka na lweka ya yawu. Mpe ba me balula yawu mutindu yayi, mutindu *awa*. Mpe na manima, na nsuka, kaka *awa* ya kele na yankaka yina ke luta. Ya zola kutuba, bidimbu zole.

<sup>7</sup> Mpe ya kele mutindu yina Biblia nyonso kusonamaka, na kati ya ba-rouleau. Mpe, na yina, . . . samu na kubuka Bidimbu yayi, ya ke zibula mansweki ya Buku.

<sup>8</sup> Beno me longukaka na Jérémie, wapi mutindu yandi sonikaka yawu, mingi ya beno sonikaka yawu mazono na nkokila? Wapi mutindu ba sonikaka bidimbu yayi mpe ba tulaka yawu, samu na kubumba yawu, tii kuna yandi me vutuka na manima ya bamvula makumi sambwadi, ya kimpika. Yandi zolaka vutuka mpe kulomba kima ya yandi.

<sup>9</sup> Mpe kieleka mu ke zolaka mingi kulongoka Yawu. Beno lendaka ve. . . Ya kele ve na mutindu ya kutuba Yawu nyonso, samu ti Yawu kele Ndinga ya Kukonda nsuka. Mpe Yawu kele Buku ya Kukonda nsuka, na yina beto fwana suka na bima ya nene. Mpe bubu yayi, na kulongoka, mu me sonika Masonuku mingi samu ti beno longuka Yawu. Mpe diaka. . . Mpe ba-bande ke monikisa mingi ya Yawu, mutindu beno ke longuka. Mpe ya kele na bima mingi!

<sup>10</sup> Kana mu lendaka telama awa na estrade mpe kutalisa Yawu na beno, mutindu Yawu me monisama pwelele na munu na kati ya kivinga, oh, ya ke vwanda ya mbote mingi. Kasi, ntangu beno ke kuma awa, beto ke sala nswalu na ntangu, mpe ya ke monana ti beno ke sote bima, mpe beto ke meka na kulonga kima ya mfunu na bantu, samu ti bawu kumona Yawu.

<sup>11</sup> Ya kieleka mu ke sepelaka na nkunga yina ya Mpangi Ungren me yimba; *Yandi Kulumukaka Na Nkembo*. Kana Yandi kulumukaka ve na Nkembo ya Yandi, wapi kisika beto nionso zolaka vwanda na nkokila yayi? Na yina beto ke vutula matondo ti Yandi kulumukaka samu na kusadisa beto.

<sup>12</sup> Ntangu yayi, na bantu mingi ya kutelama, beto ke sala kaka nswalu awa, kulutila mbote beto lendaka. Mu ke tuba ve ti beto ke sala nswalu, kasi mu zola kutuba ti beto ke banda na nswalu nionso mutindu mu lendaka sala. Mpe ntangu yayi beto baka, ntangu yayi, na manima ya. . .

<sup>13</sup> Beto me mona kapu ya 1, ya 2, ya 3, mpe ya 4. Mpe ya 5, mazono na nkokila. Mpe na nkokila yayi beto ke banda na kapu ya 6 ya Apocalypse.

<sup>14</sup> Ntangu yayi, mutindu beto ke longuka kapu yayi, beto ke talisa bisika ya mutindu na mutindu, mpe na Ngwisani ya Ntama mpe ya Malu-malu, mutindu mosi, samu ti Buku ya muvimba

kele luzayikisu ya Yesu Klisto. Beno me mona? Ya kele nyonso luzayikisu ya—ya Mfumu Yesu, luzayikisu ya Yesu Klisto. Ya kele Nzambi, ke na kukimonikisa Yandi mosi na kati ya Buku; ke na kukimonikisa Yandi mosi, na nzila ya Klisto, na kati ya Buku. Mpe Klisto kele luzayikisu ya Nzambi. Yandi me kwisa samu na kumonisa Nzambi, samu ti Yandi mpe Nzambi vwandaka mutindu mosi. “Nzambi vwandaka kati na Klisto, samu na kuvutula ngwisani kati ya yinza na Yandi mosi.” Na nzonzolo yankaka, beno ke zaba ata fioti ve yina Nzambi vwandaka tii kuna Yandi me kukimonisa Yandi mosi na nzila ya Klisto; na yawu beno lenda mona.

<sup>15</sup> Mu vwandaka banza, bamvula me luta, ti ntangu yankaka Nzambi vwandaka na nganzi na munu, kasi Klisto zolaka munu. Mu me bakula, ya kele Muntu mosi, beno me mona. Mpe Klisto kele kieleka ntima ya Nzambi.

<sup>16</sup> Mpe ntangu yayi mutindu beto ke longuka yawu, beto ke fwantikisa yawu ntangu yayi. Babuku tatu ya ntete ya Biblia, ya Apocalypse, yina beto me longuka bima yayi mbote-mbote, ya kele bansungi ya dibuundu, bansungi sambwadi ya dibuundu. Ntangu yayi ya kele na bansungi sambwadi ya dibuundu, Bidimbu Sambwadi, Bampungi Sambwadi, mpe Bambangungu, mpe—mpe bampeve ya mvindu mutindu bakiula, mpe nionso yayi ke tambula kintwadi.

<sup>17</sup> Oh, mutindu mu ke zola kuvwanda na manaka ya nene, mpe kuyema yawu nionso, mutindu mu ke mona yawu, beno zaba, kotalisa kaka mutindu mosi na mosi ke baka kisika ya yawu. Mu me yema yawu na zulu ya mwa papié mosi ya fioti, kasi mu. . . Beno zaba yawu. Mpe tii na ntangu yayi, bima nionso, kele ya kieleka. Mpe landila ntangu mpe bansungi, yina kwisaka mpe lutaka, mpe bima nionso me vukana na mutindu ya kulunga. Na yina, yawu lendaka vwanda ya kusungama ve, kasi yawu ke ya kulutula mbote yina mu zaba samu na yawu, na mutindu nionso. Mpe mu zaba, kana—kana mu sala nionso, mpe mu ke sala kifu na kumeka na kusala nionso, mpe nionso yina mu zaba, ti kieleka Nzambi ke lemvo kila munu na kusala. . . samu na foti kana mu me sala yimbi.

<sup>18</sup> Kasi, ntangu yayi, babuku tatu ya ntete, kele Bansungi Sambwadi ya Dibuundu ya ntete. Mpe kuna beto ke mona, na kapu ya 4 ya Apocalypse, Jean me zanguka. Beno me mona? Beto ke mona mabuundu. Ba me tuba mingi ve na yina me tala bansungi ya dibuundu. Ya kele kisika mu banza ti bantu ke yituka mingi. Ba ke—ba ke—ba ke tula Dibuundu kuna na kati ya Lukwamusu, samu na bima yina ke salama. Mpe mutindu mu tubaka, Lumingu, mazono: kima ya ntete beno zaba, balukwamusu yango ke vwanda, mpe beno ke kukiyufula samu na yinki ya vwandaka ve. . . Nkwizulu ya ntete vwandaka Enlevement. Mpe ya ke vwanda kaka mutindu ya vwandaka: ya me lutaka mpe beno zabaka yawu ve. Beno me mona?

<sup>19</sup> Ntangu yayi, ya kele ve na bansilulu mingi samu na Dibuundu yayi, Dibuundu ya Bantu ya makanda, Kento ya makwela. Ntangu yayi, mu zola beno simba mbote yayi, ti ya kele na dibuundu mpe Kento ya makwela. Beno me mona?

<sup>20</sup> Beno fwana sala ntangu nionso ti mambu kutambula na tatu; yiya kele kifu. Na tatu! Tatu, sambwadi, kumi, kumi na zole, mpe makumi zole na yiya, mpe makumi yiya, makumi tanu, bantalu yina ba lendaka kabula ve. Biblia kele. . . mpe Nzambi ke nataka Bansangu ya Yandi na—na banta- . . . bantalu ya Biblia, na bantalu yina. Mpe kana beno me mona kima mosi ke basika na mosi ya bantalu yayi, beno fwana sala keba. Kima ya kulanda, ke vwanda ve ya kusungama. Beno fwana vutula yawu awa na kisika beno bandaka.

<sup>21</sup> Mpangi Vayle, Mpangi Lee Vayle, yandi—yandi . . . Mu banza ti yandi kele awa. Beto vwandaka tuba kilumbu yina samu na bantu yina vwandaka kwenda na nzila ya yimbi. Ya ke kaka mutindu kubula kisika beno me kana. Kana munduki yina kele ya kuludika na mutindu ya kulunga, ya kusungika mbote mpe ya kuyidika mbote, ya ke bula kisika ya me kana; kana ti munduki me ningana ve, to ya kwenda na lweka, to kutekita kunata yawu na lweka, mpe konso kisika yina . . . to kuningisa ya mupepe. Konso kisika yina ya ke banda, ya kele kaka na mutindu mosi ya kusala, ya kele kuvutuka na kisika yina yawu kwendaka na lweka, mpe kubanda dyaka, mpe kubula kisika beno me kana. Kana ve, na yina, ya ke bula ve kisika beno kanaka.

<sup>22</sup> Mpe ya kele mutindu ntangu beno ke longuka Masonuku, mu ke kwikila. Kana beto me mona ti beto me banda kima mosi awa, mpe ya ke basisa ve kima ya mbote, beno ke mona ti ya kele ve, yinga, beto me sala kifu kisika mosi kuna, beno fwana vutuka. Ata mbala mosi ve ti beno ke bakula Yawu na dibanza ya beno. Ya kele ve. . .

<sup>23</sup> Beto ke mona kaka, na nzila ya Masonuku, ti ya kele ve na muntu na Mazulu, to na ntoto, to na nsi ya ntoto, to yina me vwandaka ntete, to yina ke vwanda ntete, yina lenda sala yawu. Mwana-dimeme kaka lenda sala yawu. Na yina, ntendulu ya seminare, nionso yina ya lendaka vwanda, ya kele kaka kima mosi ve. Beno me mona? Ya ke lomba Mwana-dimeme samu na kumonisa Yawu, yina kele nionso, na yina beto ke tula kivuvu ti Yandi ke sadisa beto.

<sup>24</sup> Jean, zangukaka, na kapu 4, samu na kumona bima “yina vwandaka, yina kele, mpe yina ke na kwisa.” Kasi Dibuundu ke suka na kapu 4. Mpe Klisto ke zangula Dibuundu, yina me zanguka na mipepe, samu na kukutana na Yandi, mpe ke monana diaka ve tii na kapu 19, ntangu Yandi ke vutuka na . . . mutindu Ntinu ya bantinu mpe Mfumu ya bamfumu, na Dibuundu. Mpe ntangu yayi, oh, mu banza ti kilumbu mosi beto lenda longuka yawu nyonso, mu banza ntete Yandi kukwiza. Kana beto sala

yawu ve, beto ke mona yawu, na mutindu nionso, samu ya ke sala kima mosi ve.

25 Ntangu yayi, na kapu yayi ya 5, kubukana ya Bidimbu yayi, mpe ntangu yayi Buku ya kukanga na bidimbu sambwadi. Ntete, beto zola kutanga Kidimbu ya Ntete.

26 Mazono na nokokila, samu na kubwela fioti na dibanza, beto ke mona, ti, ntangu Jean talaka mpe monaka Buku yina kaka na maboko ya Munkwa-kima ya kisina, Nzambi. Beno ke bambuka moyo wapi mutindu ba zimbisaka Yawu? Na nzila ya Adam. Yandi me zimbisa Buku ya Luzingu, samu luzabu ya Satana, mpe zimbisaka difwa ya yandi, zimbisaka nionso; mpe nzila vwandaka ve samu na mpulusu. Na yina, Nzambi, kumaka mutindu muntu, kulumukaka mpe kumaka Mukudi samu na beto, samu na kuvulusa beto.

27 Mpe ntangu yayi beto ke mona ti, na bilumbu me luta, bima yayi yina vwandaka ya mansweki fwana zibuka samu na beto na bilumbu ya nsuka.

28 Ntangu yayi beto ke mona, diaka, na yayi, ti, ntangu Jean kuwaka nsamunu yayi samu Tata Mukudi ke kwisa mpe ke lomba bamuswa ya Yandi, ya vwandaka na muntu mosi ve lendaka sala yawu; ata muntu ve na Mazulu, ata muntu ve na ntoto, ata muntu ve na yisi ya ntoto. Muntu mosi ve vwandaka ya kulunga na kutala Buku. Beno banza kaka na yawu. Muntu mosi ve, na mutindu nionso, vwandaka ya kulunga samu na kutala Yawu.

29 Mpe Jean bandaka kaka na kudila. Yandi zabaka yawu, oh, ya vwandaka ve na siansi ya mpulusu na ntangu yina. Nyonso vwandaka ya kubwa.

30 Mpe na nswalu nionso beto ke mona ti kudila ya yandi sukaka, na nswalu nionso, samu ti ba tubaka na mosi ya Bivangu yiya, to bakuluntu, mu zolaka tuba. Mosi ya bakuluntu tubaka, “Kudila ve, Jean, samu ti Nkosi ya dikanda ya Juda me nunga,” na nzonzolo yankaka, “me yala, mpe me nunga.”

31 Jean, balukaka, yandi monaka Mwana-dimeme me basika. Yandi zolaka vwanda ke basika menga mpe ya kuzengana mpe ya kulwala. Yandi kufwaka, . . . yandi tubaka, ti, “Mwana-dimeme yina kufwaka.” Mpe, na yina, ya vwandaka kaka ke na kubasika menga; kana beno me zenga mwana-dimeme mpe—mpe beno me kufwa yawu mutindu Mwana-dimeme yina vwandaka, na mutindu nionso. Ba zengaka Yawu na bitini na zulu ya kuluni, tobolaka Yandi na mpanzi, komaka Yandi bansoso na maboko mpe na makulu, mpe lwatisaka Yandi bansende na mbunzu. Yandi vwandaka na mutindu mosi ya mpasi. Mpe Mwana-dimeme yayi kwizaka, mpe kwendaka na Yandi yina vwandaka ya kuvwanda na zulu ya Kiti ya kimfumu, yina simbaka muswa ya munkwa-kima ya muvimba ya Mpulusu. Mpe Mwana-dimeme kwendaka mpe bakaka Buku na diboko ya Yandi yina vwandaka

na zulu ya Kiti ya kimfumu, mpe bakaka Yawu, mpe zibulaka Bidimbu mpe zibulaka Buku.

<sup>32</sup> Na yina ntangu diambu yina salamaka, beto monaka ti kima mosi ya nene salamaka kuna na Zulu. Na yina, bakuluntu, mpe makumi zole na yiya ya bakuluntu, mpe Bivangu, mpe—mpe nyonso na Mazulu, bandaka na kuboka, “Nge kele ya kulunga!” Mpe Bawanzio kwisaka, mpe mwangisaka Bambungu ya bisambu ya basantu. Basantu na nsi ya autel bokaka, “Nge kele ya kulunga, O Mwana-dimeme, samu Nge me vulusa beto, mpe ntangu yayi Nge me sala beto bantinu mpe banganga-Nzambi, mpe beto ke yala na zulu ya ntoto.” Oh, la la! Mpe yawu yina, ntangu Yandi zibulaka Buku yina.

<sup>33</sup> Beno me mona, kieleka ba kubikaka Buku mpe ba sonikaka yawu na ntwala ya mbandukulu ya yinza. Buku yayi, Biblia, vwandaka ya kusonika kieleka na ntwala ya mbandukulu ya yinza. Mpe Klisto, na kuvwandaka Mwana-dimeme, kufwaka na ntwala ya mbandukulu ya yinza. Mpe bamambele ya Kento ya Yandi ya makwela, bankumbu ya bawu vwandaka ya kutula na Buku ya Luzingu ya Mwana-dimeme na ntwala ya mbandukulu ya yinza. Kasi, Yawu vwandaka ya kukanga, mpe ntangu yayi Yawu me monisama pwelele; bayina bankumbu vwandaka na kati kuna, na nionso yina me tadila Yawu, mpe wapi kima ya nene.

<sup>34</sup> Mpe Jean, ntangu yandi monaka yawu, yandi—yandi tubaka, “Bima nionso na Zulu, bima nionso na nsi ya ntoto. . .” Bima nionso me kuwa yandi kutuba, “Amen, balusakumunu, mpe lukumu!” Yandi vwandaka kaka na ntangu mosi ya nene, mpe, samu, “Mwana-dimeme vwandaka ya kulunga.”

<sup>35</sup> Mpe ntangu yayi Mwana-dimeme kele kuna. Ntangu yayi, na nkokila yayi, mutindu beto ke kota na kapu ya 6 yayi, Yandi ke na Buku na diboko ya Yandi, mpe ke banda na kutalisa Yawu.

<sup>36</sup> Mpe, oh, mu ke vwanda kieleka bubu yayi. . . Mpe mu banza ti bantu kele ya kimpeve. Mu zolaka vwanda na kifu mosi ya nene na zulu ya Yawu, kana ya vwandaka ve, pene ya ngunga kumi na zole bubu yayi, ntangu Mpeve-Santu kwizaka na kati ya kivinga mpe sungikaka munu na zulu ya kima yina mu vwandaka sonika samu na kutuba.

<sup>37</sup> Mu vwandaka baka Yawu na banoti ya ntama. Mu vwandaka na kima ve na zulu ya Yawu. Mu zaba ve yina Kidimbu ya Zole kele, kima mosi ve. Kasi mu kuzwaka mwa banoti ya ntama samu na kima yina mu zonzaka bamvula mingi me luta, mpe mu sonikaka yawu. Mpe mu vukisaka banoti yayi, mu sonikaka banoti ya Docteur Smith, mu—mu bakaka yawu, na milongi mingi ya nene, yina me zabana mingi. Mpe bawu nionso vwandaka kwikila yawu, na yina mu sonikaka yawu. Mpe mu kubamaka na kutuba, “Mbote, ntangu yayi mu ke longuka Yawu landila dibanza yina.”

<sup>38</sup> Mpe kuna, pene ya ngunga kumi na zole na kilumbu, Mpeve-Santu kotaka na kati ya kivinga, mpe nionso zibukaka na munu, mpe Yawu vwandaka kuna, beno me mona, na yawu. . . Kidimbu yayi—yayi ya Ntete zibukaka. Kaka mutindu mu me telama awa na nkokila yayi, ti yayi kele Kieleka ya Nsangu ya mbote yina mu ke tuba awa. Mu—mu zaba ti ya kele.

<sup>39</sup> Samu ti, kana luzayikisu kele ya kuswaswana na Ndinga, na yina ya kele ve Luzayikisu. Mpe, beno zaba, ya kele na mwa bima yina lenda monana kieleka, mpe kasi dyaka ya kele kieleka ve. Beno me mona? Ya ke monana mutindu ya kele, kasi ya kele ve.

<sup>40</sup> Ntangu yayi, beto ke mona, Mwana-dimeme na Buku, ntangu yayi. Mpe ntangu yayi na kapu ya 6 beto ke tanga.

*Mpe mu monaka ntangu Mwana-dimeme zibulaka mosi ya bidimbu, mpe mu kuwaka, mutindu ya vwandaka makelele ya nzasi, mpe mosi ya bivangu yiya vwandaka tuba, Kwiza mpe mona.*

*Mpe mu monaka, mpe mu talaka mpunda mosi ya mpembe: mpe yandi yina vwandaka na zulu ya yandi me kulumusa yintu; mpe yimpu ya kimfumu me pesama na yandi: mpe yandi kwendaka mutindu munungi, mpe samu na kununga.*

<sup>41</sup> Ntangu yayi, yina kele Kidimbu ya Ntete, yina beto ke meka, na lemvo ya Nzambi, na kutendula Yawu na nkokila yayi. Na mutindu ya kulutila mbote. . . Mpe mu me bakula ti samu na muntu, kumeka na kutendula Yawu, kele kusakana na kisika ya butesi kana beno zaba ve yina beno ke na kusala. Beno me mona? Na yina kana ya kwisa na munu na nzila ya luzayikisu, mu ke tuba na beno mutindu yina. Kana mu lendaka baka yawu na mabanza ya munu mosi, na yina mu ke—mu ke tuba na beno yawu na ntwala mu tubila yawu. Kasi mu kele kaka ya kieleka, mutindu mu kele ya kutelama awa na nkokila yayi, Yina me kwiza ya malu-malu na munu, bubu yayi, na Ngolo nyonso. Mu ke zola kaka ve kutuba bima ya mutindu yina, ntangu ya ke kuma na kitini yayi ya Masonuku. Mu—mu kele. . .

<sup>42</sup> Mu banza ti beno zaba yina mu ke na kuzonzilaka ntangu yayi, beno me mona. Ntangu yayi, beno zaba, mpe beno lenda tuba bima ve. . . Kana kima zolaka vwanda awa ntete yawu kusalama, beno—beno lenda ve kutuba yawu tii kima mosi ke tula yawu kuna. Beno me mona? Beno ke na kutangaka? Beno ke na kuwaka kima mosi? Beno me mona?

<sup>43</sup> Ntangu yayi, Buku ya kukanga na Bidimbu Sambwadi, ke na kuzibuka na nzila ya Mwana-dimeme. Beto ke zonzila yawu na nkokila yayi. Nzambi, sadisa beto. Mutindu Bidimbu me bukana mpe me zibuka, mansweki ya Buku me monisama pwelele.

<sup>44</sup> Ntangu yayi, beno me mona, Yayi kele Buku ya kukanga. Ntangu yayi, beto ke kwikila yawu, mutindu yina ve? Beto ke kwikila ti Yawu kele Buku yina ba me kanga. Ntangu yayi, beto

me zaba yawu ata fioti ve na ntwala, kasi Yawu kele. Ya kele ya kukanga na Bidimbu Sambwadi. Ya kele, na manima ya Buku, Buku kele ya kukanga na Bidimbu Sambwadi.

45 Kana beto vwandaka zonzila na mutindu ya buku *yayi*, ya zolaka vwanda mutindu ba vwandaka balula courroie na zulu ya yawu, ba-courroie sambwadi. Kasi ya kele ve buku ya mutindu *yayi*.

46 Ya kele rouleau. Na yina ntangu rouleau kele ya kuzibula, ya ke sala mosi; na manima na kati ya rouleau yayi ya kele na nimelo ya zole. Mpe *awa* Yawu ke tuba yina Yawu kele, kasi Yawu kele dinsweki. Kasi, ntete, beto me longuka Yawu; kasi, beno bambuka moyo, Buku kele ya kukanga. Mpe Buku kele Buku ya mansweki, ya luzayikisu. Ya kele luzayikisu ya Yesu Klisto, beno me mona, Buku ya baluzayikisu. Mpe ntangu yayi beno zaba, kuna na kati ya nsungi, muntu me longoka mpe me meka na kukota na Yawu. Beto nyonso kele na yawu.

47 Mpe, ntete, kilumbu mosi, mu ke bambuka moyo. . . Kana—kana Tata Bohanon kele awa, to—to muntu mosi ya dibuta ya yandi, mu—mu zola ve kutuba yawu samu na kufinga. Tata Bohanon kele nkundi ya luzolo mingi, mpe yandi vwandaka mfumu ya kisalu ntangu mu vwandaka sala na Service Publics. Ntangu mu kuzwaka ntete mpulusu, mu vwandaka tubila yandi samu na kutanga Buku ya Apocalypse. Yandi tubaka, “Mu mekaka na kutanga kima yina,” yandi tubaka. Mpe Tata Bohanon vwandaka muntu ya mbote, mpe yandi—yandi vwandaka mambele ya dibuundu. Mpe—mpe mu zaba ve kieleka yina yandi kele, kasi yandi tubaka, “Mu banza ti Jean kudiaka pili-pili ya mbwaki samu na madia ya nkokila yina, mpe yandi kwendaka kulala na kifundu ya kufuluka.”

48 Mu tubaka na yandi, ya zolaka vwandaka kisalu ya munu, mu tubaka, “Nge ke na nsoni ya kutuba mutindu yina ve?” Mpe mu vwandaka kaka mwana-bakala ya ntwenia. Kasi mu tubaka, “Nge ke na nsoni ve ya kutuba mambu yina samu na Ndinga ya Nzambi?” Beno me mona? Kasi, mu vwandaka diaka ntwenia ya bakala, kulutula ve. . . mu banza bamvula makumi zole na mosi, makumi zole na zole; mpe kisalu vwandaka monana ve, mpe beto vwandaka na kati ya ngele. Kasi, na yina, ya vwandaka na boma kuna, na ntangu mu. . . kubebisa, kuwa muntu mosi ke bebisa Ndinga ya Nzambi. Ya kele Kieleka; nionso kele Kieleka. Na yina, ya vwandaka ve ndosi to ndosi mosi ya boma; ya vwandaka ve samu Jean kudyaka.

49 Yandi vwandaka na Kisanga ya Patmos samu ti yandi vwandaka meka na kutula Ndinga ya Nzambi na mutindu ya buku, mpe bawu nataka yandi kuna na luyalu ya Rome. Mpe yandi vwandaka na kisanga, na Kilumbu ya Mfumu. Mpe yandi kuwaka na manima ya yandi Ndinga ya bamasa mingi, mpe balukaka samu na kutala, mpe yandi monaka Minda Sambwadi



ya Wolo. Mpe kuna telamaka Mwana ya Nzambi, na kati-kati ya yawu, ntangu yayi.

<sup>50</sup> Mpe, na yina, Buku keke luzayikisu. Na yina, luzayikisu keke kima yina me zabana ya kima mosi, kima yina me monisama pwelele. Mpe ntangu yayi, beno tala, samu ti beno zimbana yawu ve, ya keke “ya kukangama tii na bantangu ya nsuka.” Beno me mona? Mansweki nionso ya Yawu keke “ya kukanga tii na bantangu ya nsuka.” Beto ke mona yawu na kati ya Masonuku awa.

<sup>51</sup> Ntangu yayi, mansweki ya Buku me monisama pwelele ntangu Bidimbu me bukana. Mpe ntangu Bidimbu ke zibuka ya muvimba, ntangu ya mpulusu me mana; samu ti Mwana-dimeme me bika kisika ya kusambila, samu na kukwenda kubaka bamuswa ya Yandi. Yandi vwandaka Muvukisi, na kati-kati ya yawu. Kasi ntangu luzayikisu ya kieleka ke salama na zulu ya Bidimbu, mutindu Yawu ke banda na kuzibuka, Mwana-dimeme ke basika na kivinga. Ya keke landila Ndinga. Beto me tanga yawu mazono na nkokila. Yandi basikaka na . . . na kati-kati, mpe bakaka Buku, na yawu Yandi keke diaka ve Muvukisi. Samu, mpe bawu bokilaka Yandi Nkosi, mpe yina keke—yina keke Ntinu, mpe Yandi keke ve Muvukisi na ntangu yina.

<sup>52</sup> Ata ti, bisadi ya Bidimbu yayi me banda na nsungi ya dibuundu ya ntete. Ntangu yayi beno bambuka moyo, samu ti beno—beno kuzwa kieleka dibanza ya yawu, kana beto lenda, to na mutindu ya lendaka salama. “Bisadi,” mu ke tula yawu mutindu yina samu ti kisadi keke muntu yina ke sobaka munganzi. Beno me mona?

<sup>53</sup> Mpe na kosalu yayi, na nkokila yayi, beto ke mona ti ya keke Satana yina ke soba munganzi ya yandi. Mpe, bawu nionso, bisadi.

<sup>54</sup> Klisto, ke sala ti kitini yina Yandi salaka, na ntangu Yandi katukaka na Mpeve samu na kukuma muntu, Yandi me lwata kaka lele ya kisadi, nsuni ya kimuntu, mpe kulumukaka na mutindu ya Muntu, samu na kuvwanda Tata Mukudi.

<sup>55</sup> Ntangu yayi—ntangu yayi, beno me mona, ya keke kaka mutindu ya kisadi. Ya keke samu na yina bawu nyonso keke na bingana mpe bi . . . mpe mutindu bawu keke awa, mutindu bivangu, mpe bibulu, nyonso yankaka yina. Ya keke na kati ya kosalu. Mpe bisadi yayi me banda na nsungi ya ntete ya dibuundu, samu ti ya vwandaka Klisto vwandaka kumonikisa Yandi mosi na bansungi sambwadi ya dibuundu. Ntangu yayi beno me bakula yawu? [Dibuundu me tuba, “Amen.”—Mu.] Mbote mingi. Beno me mona? Klisto ke kukimonisa Yandi mosi na bansungi sambwadi ya dibuundu.

<sup>56</sup> Na yina, na kati ya bansungi yayi ya dibuundu, ya keke na muvusu ya nene me kwisa. Na yina, na nsuka ya nsungi ya dibuundu, Nsangu ya wanzio ya sambwadi ke baka mansweki

yayi yina zimbanaka mpe samu na kupesa yawu na Dibuundu. Beno me mona? Ntangu yayi beto ke tala yawu.

<sup>57</sup> Kasi na ntangu yina ba talisaka yawu ve na mutindu ya yawu ya kieleka. Ntangu yayi, na bantangu ya Biblia, mansweki vwandaka kuna, mpe bawu monaka bima yayi ke salama mutindu Jean monaka yawu awa. Ntangu yayi yandi tubaka, “Ya kele na munati-mpunda ya mpembe.” Kasi, yina mansweki ya yawu kele, ya kele na mansweki yina ke tambula na munati-mpunda yina. Ntangu yayi, yinki ya vwandaka, bawu zabaka ve, kasi ya ke monisama pwelele. Kasi ya ke monisama pwelele na manima ya Mwana-dimeme ke bika Kiti ya kimfumu ya Tata, ya kusambidila ya Yandi mutindu Tata Mukudi.

<sup>58</sup> Mu ke tuba mwa kima mosi na kati awa. Ntangu yayi, kana muntu mosi kuzwa babande yayi. . . Muntu nionso lenda tuba nionso yina yandi zola. Yandi ke na muswa na kundima ya yandi. Kasi kana. . . Beno zaba, kana longi ke zolaka ve yayi na kati ya bantu ya yandi, na yina beno tuba na bawu na kubaka yawu ve. Kasi mu—mu. . . Yayi ke na kati-kati ya bantu yina ba tumaka munu na kutuba, na yina mu fwana monisa yina kele Kieleka. Beno me mona?

<sup>59</sup> Ntangu yayi, Mwana-dimeme, na ntangu ya kusambidila *awa*, Yandi zabaka ti ya vwandaka na bankumbu na kati kuna yina ba tulaka na mbandukulu ya yinza. Mpe ntangu bankumbu yayi vwandaka me monisama ntete ve na zulu ya ntoto, Yandi zolaka vwanda kuna mutindu Musambidi. Beno me bakula yawu? Nsodolo, na mutindu ya kulunga! Beno me mona? Mbote mingi. Yandi zolaka vwanda kuna, samu ti Yandi kwizaka samu na kufwa samu na bayina Nzambi soolaka na Luzingu ya Kukonda nsuka. Beno me mona? Beno me mona? Na nsodolo ya Yandi, Yandi monaka bawu. Ve na luzolo ya Yandi Mosi; luzolo ya Yandi vwandaka ti muntu mosi ve ke kufwa. Kasi na nsodolo ya Yandi Yandi zabaka yina zolaka mpe yina zolaka ve. Na yina, ntangu ya vwandaka ve na nkumbu mosi, ba me bokila ntete ve na zulu ya ntoto, Klisto zolaka vwanda kuna mutindu Musambidi, samu na kukeba nkumbu yina.

<sup>60</sup> Kasi kaka na ntangu nkumbu yayi ya nsuka kotaka na masa yayi ya Javel to décolorant, na yina kusambidila ya Yandi manaka. “Bika ti yina kele mvindu kukuma diaka mvindu. Bika ti yandi yina kele ya santu, yandi vwanda diaka ya santu.” Beno me mona? Mpe Yandi ke bika kivinga ya santu mpe kuna ya ke kuma Kiti ya Lufundusu. Kyadi na bayina kele na ngaanda ya Klisto na ntangu yina!

<sup>61</sup> Ntangu yayi beno tala, kasi Yawu ke monisama pwelele na ntangu Mwana-dimeme ke bika kisika ya Yandi ya kusambidila na Tata. Ntangu yayi, ya kele Apocalypse 5. Ntangu yayi Yandi ke baka Buku ya Bidimbu, Buku ya Bidimbu, to Buku yina ba me kanga na Bidimbu, ke buka yawu mpe ke talisa yawu. Beno

tala. Na nsuka ya nsungi ntangu yayi, na manima kusambidila me suka, bansungi ya dibuundu me mana.

<sup>62</sup> Yandi kwisaka, na nsungi ya ntete, na Nsungi ya Éphèse; monisaka, fidisaka munati-nsangu.

<sup>63</sup> Beno tala yina ke salama, na yina beto ke landila. Yawu yayi manaka ya yawu. Kima ya ntete ke salama, ya kele na nsamununu na Mazulu, ntete. Yinki ke salama? Kidimbu me zibuka. Yinki yina? Mansweki me zibuka. Beno me mona? Mpe ntangu mansweki ke zibuka, na yina mpungi ke bula. Ya me samuna mvita. Mpasi ke kubwa, mpe nsungi ya dibuundu me zibuka. Beno me mona?

<sup>64</sup> Yinki kele kitini ya “mvita”? Wanzio ya Dibuundu ke talisa mansweki ya Nzambi, me monisama ntete ve. Kasi, ntangu yandi ke sala yawu, yandi ke baka mansweki yayi ya Nzambi, na yina yandi ke kwisa na bantu na manima mansweki me pesama na yandi. Yandi ke kwenda na bantu! Yinki yandi ke sala kuna? Yandi ke banda na kusamuna Nsangu yina. Mpe yinki yawu ke banda? Mvita, mvita ya kimpeve.

<sup>65</sup> Mpe na yina Nzambi ke baka munati-nsangu ya Yandi, na Misolami ya nsungi yina, mpe ke tula bawu na lweka, na mpongi. Mpe na manima Yandi ke bika mpasi kukwisa na zulu ya bayina losaka Yawu; lufundusu ya ntangu fioti.

<sup>66</sup> Mpe kuna na manima ya me mana, na yina ya ke landila, mpe ya ke sala denomination, mpe ke kotisa ba-denomination, mpe ke banda na kusala kisalulu ya muntu yina, mutindu Wesley mpe bayankaka nionso. Mpe na manima nionso ke kota na muvusu diaka.

<sup>67</sup> Mpe na manima mansweki yankaka ke kwisa. Na yina yinki salamaka? Munati-nsangu yankaka ke kwisa na zulu ya ntoto, samu na nsungi ya dibuundu. Beno me mona? Na yina, ntangu yandi ke kwisa, mpungi ke wakana. Yandi ke zabisa mvita. Beno me mona? Na manima yinki salamaka? Na nsuka, na yina, ba ke katula yandi na kisalulu. Mpe na manima ntangu ba ke tula yandi na lweka samu na kupema, na yina mpasi ke kubwa, ke bebisa bawu. Lufwa ya kimpeve ke bula dibuundu, mpe ya me kwenda, nkonga yina.

Na yina Yandi ke landila na kukwenda na yankaka. Oh, ya kele manaka ya nkembo!

<sup>68</sup> Tii, ya ke kuma na wanzio yina ya nsuka. Ntangu yayi, yandi ke na mansweki ya kuswaswana ve. Kasi yandi ke vukisa nionso yina ba me zimbisa na kati ya bansungi yina yankaka, Bakieleka nionso yina me monisama ntete ve na mutindu ya kieleka, beno me mona, mutindu luzayikisu ke kwizaka, na yina yandi ke monikisa bima yango na kilumbu ya yandi. Kana beno zola kutanga yawu, yawu yayi. Apocalypse 10, 1 na . . . 1 tii na 4, beno ke bakula yawu. Mbote mingi. Beno me mona? “Yandi ke baka Buku mpe, Bidimbu, mpe ke buka yawu,” mpe ke talisa

na wanzio ya sambwadi; samu ti, mansweki ya Nzambi, kele ministere ya wanzio ya sambwadi. Ntangu yayi, beto me mona bansungi ya dibuundu, mpe na disolo, mpe beto me siamisa yawu. Beno me mona? Ya kele Nsangu ya wanzio, ya dibuundu ya sambwadi, mbote mingi, ke monikisa mansweki nyonso yina me vwanda na ntangu me lutaka, bima nyonso yina me lutaka. Apocalypse 10:1-7, yawu yina ke salama. Ntangu yayi, beno bambuka moyo, “Na bilumbu ya wanzio ya sambwadi, ntangu yandi ke bula muningu, ke bula Mpungi ya Nsangu ya mbote, yandi ke manisa mansweki nionso ya Nzambi.”

<sup>69</sup> Kaka mutindu, ya me basika, na bansungi ya dibuundu ya ntete. Beto ke kuzwa yawu, na manima ya mwa ntangu fioti, dilongi. Mpe, kuna, ya me kuma kinzonzi, ntete; na manima dilongi; mpe na manima ya me kuma kiteki; na manima ya me kuma dibuundu, mpe na kati ya bansungi ya mudidi.

<sup>70</sup> Na yina na bansungi ya mudidi kwisaka kusungika ya ntete, na Luther. Mpe yandi nataka, na yandi, bima ya mansweki ya mutindu na mutindu yina salamaka na ntangu ya nsungi ya dibuundu yina, na ntangu yina, kasi ata mbala mosi ve ti yandi manisaka yawu.

<sup>71</sup> Na manima Wesley kwisaka, na kusantisama, yandi nataka kima yankaka. Kasi, yandi nataka yawu ata fioti ve tii na nsuka; yandi bikaka bima mingi na lweka, mutindu kumwangisa masa na kisika ya mbotika. Mpe Luther bakaka “Tata, Mwana, Mpeve-Santu” na kisika ya “Mfumu Yesu Klisto.” Bima yayi nionso ya luswaswanu!

<sup>72</sup> Na manima nsungi ya ba-Pentecotiste kwisaka, na mbotika ya Mpeve-Santu, mpe bawu salaka diaka organisation. Ntangu yayi, ya lenda vwanda diaka ve na bansungi. Yayi kele diaka ve. Ya kele Philadelphie . . . to, ntangu yayi, Nsungi ya Laodicée. Kasi na yina . . .

<sup>73</sup> Beto monaka, na kulongokaka Masonuku, ti munati-nsangu ya nsungi ke kwisaka kaka na nsuka ya nsungi, ntangu nionso. Paul kwisaka na nsuka ya nsungi. Beto monaka ti Irénée kwisaka na nsuka ya nsungi. Martin, na nsuka ya nsungi. Luther, na nsuka ya nsungi ya Katolika. Mpe (yinki?) Wesley na nsuka ya nsungi ya Luther. Mpe Pentecote na nsuka ya nsungi ya kusantisama, na mbotika ya Mpeve-Santu.

<sup>74</sup> Mpe na nsuka ya nsungi ya Pentecote, beto fwana kuzwa, landila Ndinga, mutindu Nzambi ke sadisa munu na nkokila yayi samu na kulakisa na beno, awa, ti beto ke mona, beto ke kuzwa munati-nsangu yina ke baka bima yina nionso bikanaka kuna na lweka mpe ke talisa kinsweki nionso ya Nzambi, samu na enlevement ya Dibuundu.

<sup>75</sup> Na yina ya ke vwanda na Banzasi sambwadi ya mansweki yina ba me sonikaka ata fioti ve. Ya kieleka. Mpe mu ke kwikila ti, na nzila ya Banzasi Sambwadi yina, ke monisama pwelele na

bilumbu ya nsuka samu na kuvukisa Kento ya makwela samu na lukwikilu ya enlevement. Samu, yina beto ke na yawu na ntangu yayi, beto—beto lenda ve kusala yawu. Ya kele na kima mosi. Beto fwana kwenda ntama. Beto, beto lenda vwanda ve na lukwikilu mingi samu na kubeluka ya Kinzambi, na mpasi. Beto fwana vwanda na lukwikilu ya mingi samu na kusoba, na mwa ntangu fioti, mpe samu na kumata na ntoto yayi. Mpe beto ke mona ti, na manima ya mwa ntangu fioti, kana Mfumu kuzola, beto ke mona kisika Yawu me sonama.

<sup>76</sup> Na yina, balufundusu nionso ya bantu yayi ya yimbi! Ntangu yayi, beno me mona, na kati ya bansungi ya Bidimbu yayi, ya bukanaka tii ntangu yayi Kidimbu ya nsuka me bukana Mpe ntangu yayi na yina ba—na yina ba vwandaka tala na Bidimbu yayi mpe vwandaka banza kaka, na kubanza yina ba vwandaka sala. Ntangu yayi, na nsuka ya bansungi, ya bansungi ya dibuundu, nionso yayi ya yimbi ke salama mpe ke mata na Lukwamusu; nionso yayi ya yimbi ya Bidimbu Sambwadi, yina me sala na mutindu ya ngitukulu na kati ya dibuundu.

<sup>77</sup> Mpe beto ke mona, na muniti mosi, ti ya vwandaka salama na nkumbu ya dibuundu. Ba ke bokilaka bawu mosi, “Dibuundu.” Mpe beno ke mona kaka kana ya kele kieleka ve. Ya kele ve ya kuyituka ti mu ke teleminaka denomination, mu zaba ve samu na yinki. Beno me mona? Beno me mona?

<sup>78</sup> Bawu ke kuma na nsuka. Ntangu yayi, ya ke banda awa na mutindu ya malembe, mpe ke landila kaka na kukuma yimbi mingi mpe yimbi mingi, tii. . . Mpe bantu ke kota kaka na kati ya yawu, ke tuba, “Oh, yinga, *yayi* kele kaka mbote.” Kasi na bilumbu ya nsuka, bima yayi me zabana. Mpe na nsuka bawu ke kuma ya kubeba mingi ti ba ke kota na ntangu ya Lukwamusu.

<sup>79</sup> Mpe wapi mutindu muntu lenda tuba ti Kento ya makwela ya Klisto ke luta na Lukwamusu? Mu lenda bakula yawu ve. Beno me mona? Ba me nata yandi ntama ya Lukwamusu. Kana—kana ba me fundisa Dibuundu, mpe ba me kukifundisa bawu mosi mpe ba me ndima Menga, wapi mutindu Nzambi lenda sambisa muntu yina kele ya kulunga, ya kukondwa disumu ya muvimba?

Beno ke tuba, “Ya kele ve na muntu ya mutindu yina.”

<sup>80</sup> Konso mukwikidi yina me butuka mbala zole, mukwikidi ya kieleka, kele ya kulunga, ya kieleka ya kukondwa disumu na ntwala ya Nzambi. Yandi ke tula kivuvu na bisalu ya yandi ve; na kati ya Menga ya Yesu, na yina funguna ya yandi me kota. Biblia me tuba mutindu yina. Beno me mona? “Yandi yina—yina kele ya kubutama na Nzambi ke salaka ve disumu, samu ti yandi lenda ve kusumuka.” Wapi mutindu beno lenda sala ti muntu nsumuki na ntangu décolorant ya Menga ya Yesu Klisto kele na kati-kati ya yandi na Nzambi? Ya ke panza disumu tii kima mosi ve ke bikana. Beno me mona? Wapi mutindu Menga yina ya kuvedila ya Klisto lendaka bika ti disumu kuluta kuna? Yandi lenda ve.

<sup>81</sup> Yesu tubaka, “Beno vwanda ya kulunga, mutindu Tata ya beno na Mazulu kele ya kulunga.” Mpe wapi mutindu beto lendaka banda na kubanza ti beto kele ya kulunga? Kasi Yesu lombaka yawu. Mpe kana Yesu me lomba yawu, Yandi fwana sala nzila samu na yawu. Mpe Yandi ke na yawu; Menga ya Yandi Mosi!

<sup>82</sup> Ntangu yayi, nyonso, ke monisa mansweki nyonso yina me kufwa na ntangu me luta. Ntangu yayi, dibanza kele, awa na ntangu ya nsuka, ti mansweki yina bandaka kubanda ntama mpe me luta na bansungi ya dibuundu, samu na kumonana awa na kuzibuka ya Bidimbu, awa na bilumbu ya nsuka, na manima ya ntangu ya kusambidila me mana, na ntangu yina.

<sup>83</sup> Na yina, balufundusu ke vingila bayina kele na manima. Ba ke landila nzila ya bawu mpe ba ke kota kuna na kati. Ya kele na manima ba me katula Kento ya makwela na kisalu.

<sup>84</sup> Oh, beto tanga kaka Masonuku. Beno nyonso zola kusonika mwa Masonuku? Beto baka Thessaloniciens ya Zole, na mwa ntangu fioti, mpe beto tala awa na mwa ntangu fioti. Ya—ya ke kizizi ya kitoko awa! Mu ke zolaka yawu. Mpe beto tala. Yinga, Thessaloniciens ya Zole. Mpe mu ke zola kapu ya 2 ya Thessaloniciens ya Zole, mpe nzila ya 7. Beto tala. Thessaloniciens 2:7. Mu banza ti ya kele kieleka, ntangu yayi. Mu vwandaka sonika yayi, ke tekita mpe na matekita.

*. . . mansweki ya disumu ya nkú ke na kusalaka: kaka yandi yina . . . ke sala yawu, tii kuna ya ke vwanda ntama.*

<sup>85</sup> Nani? “Yandi yina ke simba yawu.” Beno me mona? Beno me mona, mansweki, “mansweki ya disumu ya nkú,” ntama kuna na nsungi ya ntete ya dibuundu. Awa Paul ke na kusonika, na kutubaka ti, “Mansweki ya disumu ya nkú.” Yinki kele disumu ya nkú? Disumu ya nkú, kele kima yina beno zaba ti beno zolaka sala ve, mpe beno ke sala yawu na mutindu nyonso. Mpe Paul tubaka ti ya kele na mutindu yina na ntoto bubu yayi, bisadi ya disumu ya nkú. Oh, kana beno . . . Beto ke kuma na . . . Beto tanga kaka kitini yina, na mwa ntangu fioti. Beto banda fioti na zulu, na nzila ya 3.

*Ata muntu ve fwana kuvuna beno na konso mutindu yina: samu ti kilumbu yango ke salama ve, ntete bantu kumanga Nzambi, mpe talana (m-u-n-t-u) muntu ya disumu, mwana ya kuzimbana; (ya kieleka)*

*Yandi ke telemina mpe ke manga bima nionso yina bantu ke sambilaka, mpe ke talaka ti ya kele ya Nzambi; na yina ti yandi mutindu Nzambi kele na kati ya tempelo ya Nzambi, ke talisa yandi mosi ti yandi kele Nzambi, ke katula masumu.*

*Beno ke bambuka moyo ve, ti, ntangu mu vwandaka ntete na beno, mu tubaka na beno mambu yayi?*

86 Mu ke zola kuvwanda na yisi ya malongi ya yandi. Beno ve?

*Mpe ntangu yayi beno zaba yina ke kanga samu ti yandi monisama na ntangu ya yandi.*

87 Na ntangu yina ve, beno me mona, na ntangu yina ve; kasi, “na ntangu ya yandi,” beno me mona, na kuzibuka ya Kidimbu yina. Beto zaba kieleka yinki ya vwandaka. Nani kele muntu yayi ya disumu ya nkú? Nani kele muntu yayi ya disumu, muntu yayi yina ke salaka disumu ya nkú? “Kasi yandi ke monana na ntangu ya yandi.”

*Samu ti mansweki ya disumu ya nkú ke na kusalaka ntete (bantu ya luvunu, beno me mona, ke na kuvuna bantu na kima mosi, beno me mona): kaka yandi (Nzambi) yina ke kanga, tii yandi (Dibuundu, Klisto, Kento ya makwela) ke vwanda ntama.*

*Mpe kuna ke monana muntu ya Yimbi, . . .*

88 Na kuzibuka ya Kidimbu, “na ntangu ya yandi.” Paul tubaka, “Ve na ntangu ya munu, kasi na ntangu yina yandi ke monana.” Beno me mona?

*. . .yina Mfumu ke kufwa na mpeve ya yinwa ya yandi, . . .*

89 Beto ke zonzila yawu na manima ya mwa ntangu, “mpeve ya yinwa ya yandi.” Beno tala mbote yinki ya kele.

*. . .mpe ke bebisa na nsemo ya nkwezulu ya yandi:*

*Mpe yandi, yina ke na kwisa landila kisalu ya Satana . . .*

90 Yandi, “yandi,” muntu yina ke salaka kele landila kisalu ya Satana.

*. . .na ngolo nyonso mpe bidimbu mpe mambu ya ngitukulu ya luvunu,*

*Mpe na mambu nionso ya luvunu, na kuvunaka bantu na mambu ya yimbi samu na bayina ke kufwa (Kento ya makwela yayi ve), na kati ya bawu yina ke na kusosaka kima ya mutindu yina; samu ti bawu kuzwaka ve zola ya kieleka, . . .*

91 Mpe Klisto kele Kieleka, mpe Klisto kele Ndinga; kasi bawu ke zola mingi kuzwa credo. Huh! Beno me mona?

*. . . ti bawu lenda kuzwa mpulusu.*

*Mpe samu na yina Nzambi fidisa bawu ngolo ya luvunu, samu ti bawu kwikila na luvunu:*

92 Ba zolaka bangula yawu kuna, na yina mu talaka na lexique, “luvunu,” ve “luvunu mosi.” “Luvunu,” mutindu yina yandi tubaka na Eve.

*Ti bawu . . .ba fundisa bayina kwikilaka ve na kieleka, kasi sepelaka na mambu ya yimbi.*

<sup>93</sup> Wapi nsamunu! Oh! Na manima ba me zangula Kento ya makwela, na manima muntu yayi ya disumu ke monana yandi mosi.

<sup>94</sup> Yandi, Kento ya makwela ya kieleka ya Klisto, me soolama na kati ya bansungi nionso ya dibuundu.

<sup>95</sup> Ntangu yayi, kilumbu yina mu salaka nsamunu mosi, “Kento ya makwela lenda kwenda na Yinzo mpe beno ke zaba kima mosi ve samu na yawu.” Ya kele kieleka.

<sup>96</sup> Muntu mosi tubaka, “Mbote, Mpangi Branham, yina ke vwanda kimvuka mosi ya fioti.”

<sup>97</sup> Yesu tubaka, “Mutindu ya vwandaka na bilumbu ya Noé,” ntangu yayi beno kwenda tuba yawu na Yandi, beno me mona, “kisika mioyo nana vulukaka na masa, mutindu mosi ya ke vwanda na Nkwizulu ya Mwana ya muntu.” Kana bawu vwandaka na nkama nana yina ke kwenda na Enlevement na nkokila yayi, beno ke kuwa ata ndinga mosi ve samu na yawu mbasi, to kilumbu yina ke landa, to na ntangu yankaka. Ba ke kwenda mpe beno ke zaba kima ve samu na yawu. Beno me mona, ya ke vwanda kaka mutindu mosi.

<sup>98</sup> Yinki mu ke meka na kutuba? Mu ke na kumeka ve na kupesa beno boma, kuniongisa beno. Mu—mu zola ti beno vwanda na bukebi. Beno vwanda ya kukubama, beno tala mbote, konso minuti. Beno bika buzoba ya beno. Beno sala mambu ya kusungama na Nzambi, samu ti ntangu me luta ti beno ke banza.

Ntangu yayi, beno bambuka moyo, Kento ya makwela ya kieleka!

<sup>99</sup> Ntangu yayi, ya kele na kento ya luvunu. Beto ke mona yawu na Apocalypse 17. Yandi tubaka, “Mu kele mufwidi ya kento, mpe mu ke na nsatu ya kima mosi ve,” beno me mona, ya kuvwanda na zulu ya niama yayi ya ekarlati, mpe nionso yina, niama, mu zola tuba.

<sup>100</sup> Ntangu yayi, kasi Kento ya makwela ya kieleka ke salama na mafunda na mafunda ya bantu, kasi ya ke vwanda Basolami ya konso nsungi ya dibuundu. Ntangu nionso nsangu me longama, mpe bantu me kwikila yawu mpe me ndima yawu na Nsemo nionso yina ya vwandaka, na yina ba me tula bawu kidimbu tii na Kilumbu yina ya Mpulusu.

<sup>101</sup> Yesu longaka ve kima ya mutindu mosi, ntangu Yandi tubaka, “Muningu wakanaka na kuvumbuka ya sambwadi”? Ya kele nsungi ya dibuundu ya nsuka. Beno me mona? Mpe yandi tubaka, “Beni tala, Bakala ya makwela me kwiza; beno kwenda kutana na Yandi.”

<sup>102</sup> Mpe na manima mwense ya kulala kwizaka, yandi kusunaka meso ya yandi, mpe yandi tubaka, “Mu banza ti mu fwana kuzwa ndambu ya Mafuta yina, mpe, na yina mu banza ti ya ke vwanda ya kulutila mbote na kuzwa yawu.”



103 Mpe Kento ya makwela ya kieleka yina vwandaka ya kutelama kuna, vwandaka tuba, “Beto kele kaka na mingi samu na beto mosi. Uh-huh. Beto kele kaka na mingi samu na kukota, beto mosi. Beto lenda ve kupesa beno kima mosi. Kana nge zola ndambu, nge fwana kwenda sambila.”

104 Mpe na yina yandi kwendaka, Bakala ya makwela me kwiza, mpe Kento ya makwela kotaka. Mpe bayina bikanaka kuna, bayina vwandaka kieleka ya kusungama, dibuundu, bikanaka na ngaanda. Mpe Yandi tubaka, “Ya ke vwanda na kudila, mpe manyongo, mpe kukwetisa meno.”

105 Beno me mona, ntangu yayi, yina kele Basolami. Mpe ntangu muningu ke wakana, “Bakala ya makwela me kwisa,” na yina bayina nionso vwandaka ya kulala na kati ya bansungi yina, mosi na mosi ya bawu vumbukaka, bawu nionso. Beno me mona, ya ke Nzambi ve, mutindu beto ke banzaka, Yina ke kwenda sosa mafunda ya bantu ya nsungi yayi mpe ke baka bawu. Ya kele bayina ba Soolamaka na bansungi nionso. Mpe ya kele samu na yina Klisto fwana vwanda kuna na kiti ya muvukisi na manima awa, mutindu Musambidi, tii kuna yina ya nsuka ke kota na nsungi ya nsuka. Mpe baluzayikisu yayi na ntangu yina, samu na yina ya vwandaka, ba me pesa yawu na bantu, mpe ba ke mona yina me salama. Beno me mona? Beno me bakula yawu ntangu yayi? [Dibuundu me tuba, “Amen.”—Mu.] Mbote mingi.

106 Beno tala, “Bantu yankaka ya kufwa,” bamambeke ya dibuundu, “zingaka dyaka ve tii bamvula mafunda lungaka.” Bamambeke ya dibuundu, Baklisto, dibuundu, zingaka dyaka ve tii na nsuka ya bamvula mafunda. Mpe na manima ba me basika samu na kutelama na ntwala ya Kento ya makwela, ya kele kieleka, samu na kutelama na ntwala ya Ntinu mpe Ntinu ya kento. Nkembo!

Dibuundu mosi bubu yayi ke kukibokila yandi mosi, “Ntinu ya kento ya Mazulu.”

107 Ntinu ya kento ya Mazulu kele Kento ya makwela ya Klisto yina ba me soolaka, mpe Yandi ke kwiza na Yandi. Daniel monaka yawu, mpe yandi tubaka, “Bamafunda na bamafunda vwandaka sadila Yandi.” Ntangu yayi kana beno tala mbote Masonuku kuna, na Daniel, “lufundusu vwandaka, mpe babuku zibukaka.” Ntangu yayi beno bambuka moyo, ntangu Yandi kwisaka, Yandi kwisaka na Kento ya Yandi ya makwela. Kento ke sadilaka bakala ya yandi. “Mpe bamafunda na bamafunda vwandaka sadila Yandi. Lufundusu vwandaka, mpe babuku zibukaka.” “Mpe buku yankaka zibukaka, yina kele buku ya Luzingu,” Kento ya makwela ve, ata fioti ve. Yandi me mata mpe me vutuka, mpe me telama kuna samu na lufundusu ya bansungi yina mangaka Nsangu ya Nsangu ya mbote.

108 Yesu tubaka ve? “Ntinu ya kento ya Sude ke vumbuka na nsungi yayi na bilumbu ya yandi, ya Lufundusu, mpe ke fundisa

nsungi yayi; samu ti yandi me katuka na bansongi ya yinza, samu na kuwa ndwenga ya Salomon, mpe kulutila Salomon kele awa.” Ya vwandaka lufundusu, ntinu ya kento ya Seba, ya Sude, yina telamaka kuna na Lufundusu, mpe na kimbangi ya yandi mosi.

<sup>109</sup> Ata mpe Juif mosi ve telemaka na nsungi yina vwandaka ya ba-Juif. Mpe bawu vwandaka ya kufwa meso, mpe kondwaka Yandi. Samu, bawu vwandaka sosa Yandi, kasi Yandi kwisaka na mutindu ya kukikulumusaka mingi ti bawu lutaka na zulu ya yawu, mutindu yina.

<sup>110</sup> Mpe, kuna, ntinu ya kento yina ya nene kukikulumusaka yandi mosi, mpe yandi kwisaka mpe ndimaka nsangu. “Mpe yandi ke telesa na Lufundusu,” Yandi tubaka, “mpe ke fundisa nsungi yina.”

<sup>111</sup> Ntangu yayi beno ke mona bakalasi tatu, konso ntangu. Buku, ba fundisaka bantu ya kufwa; buku yankaka, buku ya Luzingu, bayina vwandaka na bankumbu ya bawu na buku ya Luzingu.

<sup>112</sup> Bawu ke tuba, “Kana nkumbu ya nge kele na buku ya Luzingu, yawu kele mbote, uh?” Ve, tata!

<sup>113</sup> Beno tala, Judas Iscariot vwandaka na nkumbu ya yandi na buku ya Luzingu. Ntangu yayi beno ke tuba ti yina ke luvunu? Yesu, na Matthieu 10, pesaka bawu ngolo ya kubasisa bampeve ya yimbi, mpe me fidisa bawu na kubelula bambevo, mpe samu na kuvedisa bantu ya kimbevo ya wazi, mpe kuvumbula bantu ya kufwa. Mpe bawu kwendaka, mpe vutukaka, Judas vwandaka kaka na bawu. Mpe bawu basisaka bampeve ya yimbi, mpe salaka bimangu ya mutindu na mutindu. Mpe bawu vutukaka, mpe tubaka, “Ata mpe bampeve ya yimbi me tumama na beto.”

<sup>114</sup> Yesu tubaka, “Beno yangalala ve ti bampeve ya yimbi me tumama na beno, kasi beno yangalala samu ti bankumbu ya beno kele ya kusionika na Mazulu.” Mpe Judas vwandaka na bawu. Kasi yinki salamaka? Ntangu ya kumaka kuna na nkonga ya bantu yina ba Soolaka, samu na kumata kuna na Pentecote mpe kuzwaka kieleka Mpeve-Santu, Judas lakisaka bantinta ya yandi. Yandi ke vwanda kuna na Lufundusu.

<sup>115</sup> Na yawu babuku zibukaka; mpe buku, Luzingu, zibukaka; mpe muntu nionso vwandaka ya kufundisa mutindu yina. Ntangu yayi, Kento ya makwela kele ya kutelama kuna na Klisto, samu na kufundisa yinza. Ve. . . Paul ke tuba, “Mosi ya beno,” ke zonzila Kento ya makwela, “ntangu yandi ke na kunionga samu na muntu yankaka, ti yandi kwenda funda na bantu ya yimbi. Beno zaba ve ti basantu ke fundisa ntoto?” Beno me mona? Beno bawu yayi. Basantu ke fundisa ntoto mpe ke yala na zulu ya yawu. Ya kieleka.

<sup>116</sup> Beno ke tuba, “Wapi mutindu na yinza kele na nkonga ya fioti mutindu yina?” Mu zaba ve mutindu ya ke salama. Kasi

Yandi tubaka ti ya ke salama, na yina yina ya ke sukisa diambu, landila mutindu mu me zaba.

<sup>117</sup> Ntangu yayi beno tala. Ntangu yayi beno tala. “Bayina nionso kufwaka,” bamambeke ya dibuundu, bamambeke ya dibuundu yina kufwaka, “zingaka dyaka ve tii bamvula mafunda lungaka.” Mpe na yina na bamvula mafunda, bawu vukanaka; mvumbukulu yankaka kwisaka, yina kele mvumbukulu ya zole, mpe ba vukanaka. Mpe Klisto mpe Dibundu, Kento ya makwela, dibuundu ve; Kento ya makwela, Klisto mpe Ntinu ya kento, dibuundu ve. Di- . . . Klisto na Kento ya makwela telemaka kuna.

<sup>118</sup> Mpe bawu vwanda ya kukabuka, mutindu mameme na bankombo. Ya kele kieleka. Ya kele kuna bamambeke ya dibuundu ke basika. Mpe kana bawu kuwaka Kieleka mpe bawu mangaka Kieleka, na yina yinki ba ke tuba ntangu ba ke talisa kima nionso na caneva, ntangu ata mpe mabanza ya beno ke vwanda kuna, yinki beno banzaka samu na Yawu? Wapi mutindu beno ke tina yawu, mpe ya ke vwanda kaka kuna na zulu ya caneva ya mazulu, mpe television ya nene ya Nzambi ke vwanda kuna. Yawu ke mabanza ya beno ya bumpumbulu. Mabanza ya beno mosi ke telemina beno na ngunga yina.

<sup>119</sup> Na yawu kana beno ke tuba kima mosi, mpe beno ke banza kima yankaka, kulutila mbote beno sukisa yawu. Beno tula mabanza ya beno na Nzambi. Beno vwanda kaka ya kuvedila, mpe beno vwanda kaka kuna na yawu, mpe beno zonga kima mutindu mosi ntangu nyonso. Beno me mona? Kutuba ve, “Mbote, mu ke tuba ti mu ke kwikila Yawu, kasi mu ke kwenda tala yawu.” Beno kwikila Yawu! Amen.

<sup>120</sup> Beno tala, bayina ya mutindu yayi, ya kele samu na yina bawu ke kufwa, samu ba ke luta na mvedolo ya kumekama ya Lukwamusu samu bawu kele ve kieleka na nsi ya Menga. Bawu ke tubaka ti bawu kele, kasi bawu kele ve. Wapi mutindu ba lendaka luta na kumekama, samu na kuvedisa bawu, ntangu ya kele na (décolorant) ya Menga ya Yesu Klisto yina ke katula bidimbu nionso ya disumu mpe bima nionso na beno? “Mpe beno kele yimeni ya kufwa, mpe luzingu ya beno kele ya kubumbama na kati ya Yandi, na nzila ya Nzambi, mpe ya kukanga na kati kuna na nzila ya Mpeve-Santu.” Samu na yinki beno ke vwanda ya kufundisa? Wapi kisika beno ke kuzwa mvedolo ya beno? Samu na yinki beno fwana vwanda na nsatu ya kuvwanda ya kuvedila, na ntangu beno kele ya kulunga na Klisto, kukondwa disumu? Wapi mutindu . . . Samu na yinki lufundusu? Kasi ya kele nkonga ya bantu ya kulala, yina bantu lenda ve kuswasikisa.

<sup>121</sup> Ntangu yayi, ba me salaka yawu ve bamvula mingi me luta, beno me mona, kasi yayi kele ngunga ya luzayikisu, beno me mona, beno me mona, na kutalanaka kaka na nkwizulu ya Kento

ya makwela; mupepe ya nsuka, bima ya nsuka ke na kwiza. Ya ke kuma na nsuka, nkundi ya munu, mu ke kwikila. Wapi ntangu? Mu zaba ve. Mu—mu lenda ve kutuba na beno. Kasi nionso yina . . . mu zola kuzinga na nkokila yayi mutindu ya vwandaka na nkokila yayi, mu ke vwanda ya kukubama. Beno me mona? Yandi lenda kwisa na nkokila yayi, dyaka, mpe Yandi lenda kwisa ve na bamvula makumi zole. Mu zaba ve ntangu Yandi ke kwisa. Kasi ntangu ya kele, . . . Mpe luzingu ya munu lendaka suka, na nkokila yayi; mpe, na yina, nionso yina mu me sala awa, ya ke suka na ngunga yina. Mu—mu fwana kutana na Yandi na lufundusu, mutindu mu kwendaka awa. “Na lweka yina yinti me yekama, ya kele na lweka yina yawu ke kubwaka.”

<sup>122</sup> Beno bambuka moyo, ntangu bawu kwendaka samu na kusumba Mafuta, bawu . . . “Oh,” beno ke tuba, “ntangu yayi vingila fioti, Mpangi Branham. Mu zaba yawu ve.” Ntangu ba kwendaka samu na kusumba Mafuta, ntangu ba vutukaka, Kento ya makwela vwandaka me kwenda mpe kielo vwandaka ya kukanga. Mpe bawu konkotaka, mpe tubaka, “Zibula beto! Zibula beto!” [Mpangi Branham me konkota na zulu ya chaire bambala mingi—Mu.] Kasi bawu vwandaka na ngaanda na kati ya mpimpa.

<sup>123</sup> Ntangu yayi, kana beno zola kifwanisu ya yawu, beno tala ntangu yayi. “Na ntangu ya Noé,” Yesu tubaka, ya vwandaka tubila yawu. Ntangu yayi, na ntangu ya Noé, bawu kotaka na nzaza. Kasi ba vwandaka landila . . . na ntangu ya lufundusu, kasi yina—yina vwandaka ve mutindu ya Kento ya makwela ya Klisto.

<sup>124</sup> Enoch vwandaka kifwanikisu ya Kento ya makwela. Énoch! Noé lutaka kuna, na kati ya Kento ya makwela . . . yandi lutaka kuna, na kati ya lukwamusu, mpe monaka mpasi, mpe yandi kumaka kinwa-malafu, mpe yandi kufwaka. Kasi Enoch tambulaka na ntwala ya Nzambi, bamvula nkama tanu, mpe kuzwaka kimbangi, “yandi sepelisaka Nzambi,” na lukwikilu ya enlevement; mpe bandaka kaka na kutambula, mpe mataka na kati ya matuti, mpe kwendaka na Yinzo kukondwa kumeka lufwa; yandi kufwaka, ata fioti ve.

<sup>125</sup> Yina ke kifwanikisu ya, “Beto bayina kele moyo mpe ke bikana, ke tekila ve, to ke pekisa ve, bantu yina kele mutindu beto yina ke na kulala,” yina lalaka samu na nsungi ya bantu, na—na mutindu ya nsungi ya bantu. Bawu kufwaka kuna, kasi bawu kele ya kufwa ve. Bawu kele ya kulala. Amen. Ba kele ya kulala, ya kufwa ve. Mpe kima mosi kaka yina ya ke lomba kele Bakala ya makwela samu na kuvumbula bawu. Yinga. “Mpe beto yina ke vwanda ya moyo mpe ke bikana, ke pekisa ve bantu yina kele mutindu beto yina ke na kulala. Samu mpungi ya Nzambi ke bula, mpe bantu yina kufwaka kati na Klisto ke vumbuka ntete; na yina beto yina ke vwanda ya moyo mpe ke vwanda kintwadi na bawu, mpe beto ke kutana na Mfumu na mipepe.”

126 “Mpe bantu yankaka ya kufwa zingaka ve bamvula funda mosi.” Yawu yina, bawu lutaka na ntangu ya Lukwamusu.

127 Yinki ya vwandaka? Mutindu Enoch. Beno zaba, Noé vwandaka tala Enoch. Na yina, ntangu Enoch zimbanaka, yandi zabaka ti lufundusu vwandaka me kuma pene-pene. Yandi vwandaka pene-pene ya nzaza.

128 Kasi Noé mataka ve. Ba zangulaka yandi fioti, mpe yandi mataka na zulu ya balukwamusu. Yandi lutaka na kati ya ntangu ya lukwamusu, samu na kufwa. Beno me mona? Kasi Noé lutaka na kati ya yawu.

129 Ba zangulaka Enoch, kukondwa lufwa, kifwanikisu ya Dibuundu yina ba me zangula na bayina kele ya kulala, samu na kukutana na Mfumu na mipepe, mpe ndambu ya dibuundu lutaka na kati ya ntangu ya Lukwamusu. Mu lenda ve kusala kima yankaka na yawu, munu mosi. Énoch, zangukaka, kukondwa lufwa.

130 Ntangu yayi beto banda malongi ya beto, beto banda leso ya beto. Kana mu ke landila kaka na yawu, beto ke kota ata fioti ve na bayayi, na Kidimbu yayi. Ntangu yayi beno tala. Beto baka ntangu yayi, samu ti mutindu beto ke landila, na kukwenda, mu banza ti mbasi na nkokila to nkokila yina ke kwisa, ya ke lomba kubaka Mpungi mosi, na ntangu yayi to na ntangu yankaka, samu ti Mpungi ke wakana na ntangu mosi na Bidimbu. Ya kele kaka kima mutindu mosi. Nsungi ya dibuundu me zibuka, . . . kaka kima ya mutindu mosi. Beno me mona?

131 Ntangu yayi, mpungi ntangu nionso ke lakisaka mvita, to, mubulu ya politiki, mpungi ke lakisaka, mubulu ya politiki, mpe yina ke nataka mvita. Ntangu beno ke banda na kusala nsaka ya politiki, mpe yawu nionso me kuma ya kubeba, mutindu beto ke na yawu na ntangu yayi, na yina beno sala keba, mvita me belama. Kasi, beno me mona, kimfumu kele kaka ya Satana. Yandi kele dyaka na kitini yayi na diboko ya yandi.

132 Samu na yinki? Yawu me sumbama na Klisto, kasi Yandi ke sala kitini ya Tata Mukudi, na kubakaka bantu ya Yandi, tii yina ya nsuka (nkumbu) yina ba sonikaka na Buku, tii kuna ya ke kuzwa Yawu mpe ke kuzwa kidimbu mpe ba ke tula yawu na lweka. Ntangu yayi beno me bakula yawu? [Dibuundu me tuba, “Amen.”—Mu.]

133 Na yina Yandi ke katuka na Kiti ya Yandi ya kimfumu, Kiti ya kimfumu ya Tata ya Yandi, Yandi ke belama, Yandi ke baka Buku na diboko ya Nzambi, na Kiti ya kimfumu ya Nzambi, mpe ke lomba muswa ya Yandi. Kima ya ntete Yandi ke sala kele kubokila Kento ya Yandi ya makwela. Amen! Na manima yinki Yandi ke baka? Yandi ke baka mbeni ya Yandi, Satana, mpe ke kanga yandi, mpe ke losa yandi na kati ya tiya kuna, na bayina nionso vwandaka landa yandi.

<sup>134</sup> Ntangu yayi, beno bambuka moyo, yawu vwandaka Russie ve. Ve. Mbeni ya Klisto kele muntu yayi ya mayele ya yimbi. Beno tala wapi mutindu yandi kele na mayele ya yimbi. Yandi kele na mayela, ntangu yayi. Yinga, tata. Beno baka kaka Mpeve-Santu; kima kaka yina lenda kununga yandi.

<sup>135</sup> Beno tala, Bampungi zola kutuba mubulu ya politiki, bamvita. Matthieu 24, Yesu tubaka yawu. Yandi tubaka, “Beno ke kuwa bamvita mpe makelele ya bamvita, beno me mona, mpe nionso yina.” Beno ke bambuka moyo... Yesu ke tuba yawu, “Bamvita, bansangu mpe bamvita, mpe bamvita, mpe bamvita, mpe bamvita, mpe nionso yina tii na nsuka.” Ntangu yayi, yina kele muningu ya Bampungi.

<sup>136</sup> Ntangu yayi, ntangu beto ke tubila Bampungi, beto ke vutuka kuna mpe beto ke baka mosi na mosi ya bamvita yayi, mpe ke talisa na beno ti ya vwandaka landa mabuundu yayi, ba ke talisa na beno ti ya ke landa Bidimbu yayi. “Bamvita mpe makelele ya bamvita.” Kasi, Mpungi, ke lakisa mubulu ya politiki.

<sup>137</sup> Kasi, Bidimbu ke salaka na mubulu ya nsambulu. Beno me mona? Kidimbu me zibuka, Nsangu mosi me pesama. Mpe kasi dibuundu kele ntangu nionso ya kuvwanda na kati ya mambu ya yawu ya politiki, mpe nionso yankaka, na ndiatulu ya yawu nionso. Mpe ntangu Nsangu ya kieleka ke pesama, munatinsangu ke basika mpe yandi ke ningisa bawu na balweka nionso. Ya kele kieleka. Ya kele mubulu ya nsambulu ntangu Kidimbu me zibuka. Ya kele yina ke salama. Yinga. Yinga.

<sup>138</sup> Bawu nionso ke kuzwa biese ya bawu na Sion. Dibundu ke vwanda mbote-mbote, mpe, “Ya kele na kati ya posi.” Kaka mutindu dibuundu ya Angleterre, bawu nyonso vwandaka ya kuvwanda mbote-mbote. Dibundu ya Katolika, nyonso vwandaka ya kuvwanda mbote-mbote, mpe kuna kwizaka Luther. Ya vwandaka mubulu ya nsambulu. Yinga, tata! Kieleka ya vwandaka! Mbote, dibuundu me landila, na Zwingli. Mpe na manima ya Zwingli, ya vwandaka na mingi yankaka, mpe Calvin. Mpe na manima ya mwa ntangu fioti, dibuundu ya ba-Anglican kwisaka, mpe yawu vwandaka kuwa mbote, mpe kuna kwisaka Wesley. Ya vwandaka na mubulu ya nsambulu. Ya kieleka. Beno me mona, ya ke talisaka kaka mubulu ya nsambulu.

<sup>139</sup> Ntangu yayi, Kidimbu. Beto tanga Yawu fioti kuna. Mu zola ku—kubaka yayi, beto ke tanga Yawu. Mu ke na kutubaka. Mu... .

*Mpe mu monaka ntangu Mwana-dimeme zibulaka mosi ya bidimbu, (yinki salamaka?) mpe mu kuwaka, mutindu ya vwandaka makelele ya nzasi, . . .*

<sup>140</sup> Oh, mu ke zola tubila na zulu ya yawu kaka mwa ntangu fioti! Mpe mu ke banza ti bayina nionso me zaba bima yayi mpe

ke vingilaka na kivuvu ya Mfumu, ke longuka yawu ntangu yayi na bukebi; mpe na ba-bande, diaka, ti beno ke banza na yayi.

<sup>141</sup> Kima ya ntete salamaka, na ntangu Mwana-dimeme yina bukaka Kidimbu ya Ntete, Nzasi mosi bokaka. Ntangu yayi, ya kele na ntendulu mosi. Ya kele. . . Ya kele na ntendulu mosi. Ya kele na ntendulu mosi. Ya kele na ntendulu mosi. Kima mosi ve ke salamaka kukondwa ntendulu mosi. Mbote mingi, Nzasi mosi, Nzasi mosi bokaka. Mu ke kukiyufula yinki Nzasi yina vwandaka?

<sup>142</sup> Ntangu yayi beto tanga mwa fyoti. Beto baka Matthieu. . . Ve, beto baka Santu Jean, ntete. Santu Jean, kapu 12, mpe beno simba page mwa ntangu fioti. Santu Jean, kapu 12. Mpe ntangu yayi beto banda na nzila ya 23 ya Santu Jean 12. Ntangu yayi beno kuwa awa, ntangu yayi, na bukebi nionso, na yina beno ke kukiyufula diaka ve yina ya kele.

*Mpe Yesu pesaka bawu mvutu, na kutubaka, Ngunga me lunga, ti Mwana ya muntu ke kuzwa nkembo.*

<sup>143</sup> Beno me mona, beno me kuma na nsuka ya nsungi, kuna. Ministere ya Yandi ke na nsuka. Beno me mona? “Ntangu me lunga, ti Mwana ya muntu ke kuzwa nkembo.”

<sup>144</sup> Wapi mutindu kutuba kana, “Ngunga me kwiza ti Kento ya Yandi ya makwela ke zanguka”? Yinki? Ngunga me kwisa, ti, “Ntangu ke vwanda diaka ve.” Wanzio me kubama na kutula dikulu mosi na yinsi, mpe yina yankaka na zulu ya mubu, na mukyama na zulu ya Yandi, makulu ya Yandi, mpe ke tuba, “Ntangu me luta.” Mpe na nganda ya yina, Yandi telemisaka diboko ya Yandi mpe zengaka ndefi ti “ntangu ke vwanda dyaka ve,” ntangu yayi ke salama. Wapi mutindu—wapi mutindu ya kulunga ya kele, nsamunu yina ba me sala na ndefi na Dibuundu!

*. . . Ngunga me kwisa, ti Mwana ya muntu ke kuzwa nkembo.*

*Kieleka, kieleka, mu ke tuba na beno, Kana mbuma ya disangu kubwa ve na ntoto mpe me kufwa, ya ke zinga yandi mosi: kasi kana ya me kufwa, ya ke buta bambuma mingi.*

*Yandi yina ke zolaka luzingu ya yandi ke zimbisa yawu; . . . yandi yina ke yinaka luzingu ya yandi na yinza yayi ke keba yawu samu na luzingu ya kukonda nsuka.*

*Kana muntu mosi kusadila munu, yandi landa munu; mpe kisika mu kele, kuna. . . mpe kisadi ya munu ke vwanda: kana muntu mosi kusadila munu, yandi yina Tata ya munu ke pesa lukumu.*

*Ntangu yayi moyo ya munu kele na kidi-kidi; . . .*

<sup>145</sup> Beno ke tuba, “Mbote, Yandi, me kuma na nsuka ya nzila, mpe beno me kuma na kidi-kidi?” Yinki yawu ke sala ti beno

banza na ntangu kima mosi ya nene ya kimpeve ke salama, yina ke kotisa beno na kidi-kidi? Oh, la la! Uh-huh!

*Ntangu yayi na kati ya moyo ya munu mu me kuma na kidi-kidi; mpe yinki mu ke tuba? Tata, vulusa munu kubanda na ngunga yayi: kasi samu yayi mu kwisaka na yinza yayi, na ngunga yayi.*

*Tata, kembisa nkumbu ya nge. Na yina ndinga mosi katukaka na zulu, mpe tubaka, mu me kembisa yawu, mpe mu ke kembisa yawu diaka.*

*Bantu vwandaka tuba, yina telemaka kuna, yina kuwaka yawu, bawu tubaka. . .yawu ti ya vwandaka nzasi: . . .*

146 Na yina, ntangu Mwana-dimeme bakaka Buku mpe bukaka Kidimbu yina ya Ntete, Nzambi zonzaka na Kiti ya Yandi ya kimfumu ya Seko, samu na kutuba yinki Kidimbu yina vwandaka, samu na kumonisama. Kasi ntangu Yawu vwandaka na ntwala ya Jean, Yawu vwandaka na kidimbu. Ntangu Jean monaka Yawu, Ya vwandaka kaka mansweki. Samu na yinki? Ya vwandaka me monisama ntete ve. Ya lenda monisama ve tii kuna yina Yandi tubaka awa, “na ntangu ya nsuka.” Kasi ya kwizaka na mutindu ya kidimbu.

147 Ntangu, “bokaka mutindu nzasi.” Beno bambuka moyo, makelele ya ngolo ya Nzasi kele Ndinga ya Nzambi. Yawu yina Biblia me tuba, beno me mona, “makelele ya Nzasi.” Bawu banzaka ti yawu vwandaka nzasi, kasi Yawu vwandaka Nzambi. Yandi bakulaka Yawu, samu Yawu monisamaka pwelele na Yandi. Beno me mona? Yawu vwandaka Nzasi.

148 Mpe, beno tala, Kidimbu ya Ntete zibukaka. Kidimbu ya Ntete, ntangu Yawu zibukaka na mutindu ya kidimbu, yawu bokaka. Ntangu yayi yinki ke salama na ntangu Ya ke zibuka na mutindu ya Yawu ya kieleka? Oh. . . Yawu bokaka na ntangu Mwana-dimeme bendaka Kidimbu. Mpe yinki Yawu vwandaka monisa? Nionso ya Yawu me monisama ve. Ntete, Yawu kele na Nzambi; yina ke landa, Yawu kele na kidimbu; na yina, Yawu me monisama. Bima tatu. Beno me mona? Yawu ke katuka na Kiti ya kimfumu.

149 Ntete, Yawu lenda monana ve, kuwakana ve, to kima mosi ve. Yawu vwandaka ya kukanga. Ba futaka Menga ya Mwana-dimeme.

150 Yawu bokaka mutindu nzasi ntangu Yandi zonzaka Yawu. Mpe ntangu Yandi salaka yawu, munati-mpunda ya mpembe basikaka, mpe Yawu vwandaka kaka na kidimbu. Ntangu yayi beno tala mbote, Yandi tubaka ti Yawu ke zabana na kilumbu ya nsuka. Kasi Yawu ke basika na kidimbu ya dibuundu. Beno me bakula yawu, dibuundu? [Dibuundu me tuba, “Amen.”—Mu.] Ya ke basika na kidimbu ya dibuundu, ti bawu zaba ti ya kele na



Kidimbu. Kasi yina Yawu kele, kasi, bawu zaba ve, samu ti Yawu kele munati-mpunda ya mpembe.

<sup>151</sup> Mpe ya ke monisama pwelele kaka na kilumbu ya nsuka, na ntangu Kidimbu yayi ke zibuka. Ya ke zibuka na nani? Ve samu na Klisto, kasi samu na Dibuundu. Beno tala, ntangu yayi. Oh, la la, yina ke sala ti mu tekita! Mu—mu—mu ke na kivuvu ti kieleka Dibuundu me bakula Yawu, yina mu zola tuba, beno bantu. Mu ke bokila beno Kento ya makwela, beno me mona, ti Beno ke bakula Yawu.

<sup>152</sup> Ndinga kele Nzasi. Ndinga katukaka wapi? Na Kiti ya kimfumu kisika wapi Mwana-dimeme katukaka, mutindu Musambidi. Ntangu yayi Yandi me telama awa samu na kubaka kisika ya Yandi mpe kulomba bamuswa ya Yandi. Kasi Nzasi kwisaka na kati ya Kiti ya kimfumu, bokaka. Mpe Mwana-dimeme vwandaka ya kutelema awa. Nzasi, sika wapi Mwana-dimeme katukaka. Yandi katukaka na Kiti ya kimfumu ya Tata, samu na kukwenda baka Kiti ya kimfumu ya Yandi Mosi. Nkembo! Ntangu yayi, beno kondwa yawu ve, bankundi.

<sup>153</sup> Beto nionso zaba, mutindu Baklisto, ti Nzambi zengaka ndefi na David ti Yandi ke vumbula Klisto na kuvwanda na Kiti ya yandi ya kimfumu, mpe ke pesa Yandi kimfumu ya kukonda nsuka awa na zulu ya ntoto. Yandi salaka yawu.

<sup>154</sup> Mpe Yesu tubaka, “Yandi yina ke nunga mbeni ya Klisto mpe bima nionso ya yinza, ke vwanda na Munu na Kiti ya Munu ya kimfumu, mutindu Mu nungaka mpe Mu me vwanda na Kiti ya kimfumu ya Tata ya Munu.” Beno me mona?

<sup>155</sup> Ntangu yayi, kilumbu mosi Yandi ke telama na Kiti ya kimfumu ya Tata, mpe ke kwenda baka Kiti ya kimfumu ya Yandi Mosi.

<sup>156</sup> Ntangu yayi Yandi ke kwisa samu na kubokila bantu ya Yandi. Wapi mutindu Yandi ke lomba bawu? Yandi kele yimeni na Buku ya Mpulusu na diboko ya Yandi. Nkembo! Oh, mu ke na kuwa mutindu ti mu yimba nkunga mosi.

Ntama ve Mwana-dimeme ke baka Kento ya  
Yandi ya makwela samu na kuvwanda na  
Iweka ya Yandi,  
Makesa nionso ya Mazulu ke vukana (samu na  
kutala yawu mbote);  
Oh, ya ke vwanda kutala ya nkembo, basantu  
nyonso me lwata bilele ya mpembe;  
Mpe na Yesu beto ke sala feti ya Seko.

<sup>157</sup> Oh, la la! Beno ke zonzila “ya kuvwanda ntangu yayi na bisika ya Mazulu”? Yinki ya ke vwanda! Kana beto lenda kuwa mutindu yayi, ya kuvwanda awa na zulu ya ntoto, ntete Enlevement kusalama, na mutindu yayi beto kele na ntangu yayi; mpe beto lenda sepela, mpe kutelama pene-pene ya bibaka, mpe kutelama na mvula, kaka samu na kuwa Yayi; yinki ya ke

wwanda ntangu beto ke mona Yandi ya kuvwanda kuna! Oh, la la! Oh, ya ke wwanda ntangu mosi ya nkembo.

158 Yandi bikaka Kiti ya kimfumu ya Tata, me kwisa na... Mwana ya Yandi, samu na kuvwanda... Yandi kele Mwana ya David. Yawu yina Israel banzaka ti Yandi ke sala. Beno bambuka moyo na kento ya Syrophénicienne, yina tubaka, “Nge Mwana ya David!” Beno ke bambuka moyo na mpofo Bartimée, “Nge Mwana ya David!” Uh-huh! Mpe Yesu, na kuzabaka yina vwandaka manaka, kasi bawu zabaka yawu ve. Bawu mekaka na kupusa Yandi na ngolo mpe kusala ti Yandi kubaka kiti ya kimfumu. Mpe Pilate mpe yufulaka Yandi.

159 Kasi Yandi tubaka, “Kana kimfumu ya Munu vwandaka ya yinza yayi, na yina bantu ya Munu zolaka mwana. Kimfumu ya Munu kele na Zulu.” Kasi Yandi tubaka, “Ntangu beno ke sambila, beno sambila, ‘Kimfumu ya Nge kukwisa. Luzolo ya Nge kusalama awa na ntoto, mutindu ya kele na Mazulu.’” Amen. Uh-huh! Wapi mutindu yayi kele ya nkembo!

160 Yandi bikaka Kiti ya kimfumu ya Tata, samu na kubaka Kiti ya kimfumu ya Yandi Mosi. Yandi me basika ntangu yayi na kusalu ya Yandi ya musambidi, samu na kulomba Kiti ya kimfumu ya Yandi Mosi, bantu ya Yandi yina ba me vulusa. Ya kele samu na yina Yandi me katuka na Kiti ya kimfumu samu na kusala. Ya kele kuna ti Kivangu mutindu nkosi tubaka na Jean, “Kwiza, tala.” Beno tala mbote. Beno ke na kutangaka yawu?

*... mosi ya bidimbu, mpe yawu... mutindu kana ya vwandaka na makelele ya nzasi, mpe mosi ya bivangu yiya...*

161 Beno zaba yina vwandaka Bivangu. Beto me mona yawu. “Mosi mutindu nkosi; mosi mutindu mwana ya ngombe; mpe mosi mutindu muntu; mpe mosi mutindu ngononi.” Ntangu yayi, Kivangu yayi ya ntete tubaka... Beno tala mbote, ntangu nionso ya kele na Kivangu ya mutindu yankaka, tii kuna minati-mpunda yiya ke luta. Ya kele na Bivangu yiya, mpe ya kele na minati-mpunda yiya.

162 Beno tala, mosi na mosi ya Bivangu yayi ke zabisa nsangu. Matthieu, Marc—Marc, Luc, mpe Jean. Beto ke vutuka mpe ke lakisa nani vwandaka, Matthieu, Marc, nani vwandaka Marc—Marc, nani vwandaka Jean, mosi na mosi ya bawu mutindu bawu kwendaka!...?...

*... mosi ya... bivangu tubaka, Kwiza... tala.*

163 Yandi kuwaka makelele ya nzasi. Mpe mosi ya Bivangu tubaka, “Ntangu yayi kwisa, mona.”

164 Na mutindu yankaka, ntangu yayi, awa kele Mwana-dimeme, mpe Jean vwandaka ya kutelama kuna ke na kutala. Mwana-dimeme katukaka na Kiti ya kimfumu, mutindu ba kufwaka Yandi, na Menga na zulu ya Yandi. Yandi vwandaka

Yina vwandaka ya kulunga. Mpe ntangu Yandi tandaka diboko mpe bakaka Buku, na yina bima nionso bandaka na kuyangalala, mpe kuboka, mpe kusala makelele, beno me mona, samu bawu zabaka ti ba me futa ntalu samu na mpulusu.

<sup>165</sup> Ntangu yayi Yandi me kwisa samu na kulomba Bantu ya Yandi. Na yina, Yandi ke baka Buku, ke simba yawu kuna na ntwala ya Jean, mpe Yandi ke benda Yawu mpe ke buka Kidimbu. Ya ke zibula Kidimbu! Mpe ntangu Yandi ke zibula Kidimbu, Nzasi mosi ke bula bisika nionso. Mpe na ntangu Nzasi mosi bulaka, na ntembe ve ti Jean dumukaka na zulu, na ntangu Nzasi mosi bokaka.

<sup>166</sup> Mpe na manima mosi ya Bivangu yiya tubaka, “Ntangu yayi kwisa, tala yina Yawu kele, yina me talisama na nsi awa.” Oh, la la! “Jean, sonika yina nge me mona.” Na yawu Jean kwendaka samu na kutala, samu na kumona yina Yawu vwandaka. Jean kwendaka na kumona yina Nzasi tubaka. Ya kele na ntangu yina Kivangu yayi tubaka na Jean, “Kwisa, tala yina kele mansweki na Kidimbu ya Ntete.” Nzasi, Ndinga ya Mvangi me samuna Yawu. Ntangu yayi, Yandi fwana zaba yina kele Kuna. Beno me mona? Oh, la la! Kasi, beno banza ntangu yayi, yandi sonikaka Yayi.

<sup>167</sup> Kasi ntangu yandi bandaka na kusonika yina yankaka, Banzasi Sambwadi, Yandi tubaka, “Kusonika Yawu ve.” Ba tumaka yandi na kusonika nionso yina yandi monaka. Kasi ntangu Banzasi yayi Sambwadi, kuna na Apocalypse 10, tubaka, Yandi tubaka, “Kusonika Yawu ve, ata fioti ve.” Ya kele mansweki. Beto me zaba ve yina ya kele ntete. Kasi, na dibanza ya munu, ya ke monisama pwelele ntama mingi ve. Mpe ntangu ya ke salama, ya ke pesa lukwikilu samu na lemvo ya enlevement, samu ti Dibuundu kukatuka awa. Beno me mona?

<sup>168</sup> Beto me tubila bima nionso beto zaba, na kati ya bansungi nionso. Beto me tala bima nionso. Beto me mona mansweki ya Nzambi. Beto monaka kumonana ya—ya nkonga ya nene kintwadi ya Kento ya makwela na bilumbu ya nsuka. Kasi, ntete, ya kele na kima na kati Kuna yina beto lenda kaka ve kuzwa nsemo beto mosi. Ya kele na kima yankaka.

<sup>169</sup> Kasi mu banza, ntangu mansweki yayi ke banda na kukwisa, Nzambi tubaka, “Kanga Yawu na ntangu yayi. Vingila fioti. Mu ke talisa Yawu na kilumbu yina. Kusonika Yawu ve, ata fioti, Jean, samu ba ke bula disakuba na Yawu. Yambula kaka—yambula kaka, beno me mona. Kasi mu ke talisa Yawu na kilumbu yina ntangu yawu ke vwanda na nsatu ya kusalama.”

<sup>170</sup> Ya me wakana ve na mpamba. Beno bambuka moyo, mutindu mwa ditono ya ntinta, nionso kele na kikuma. Bima nionso kele kikuma. Kasi, beno tala, Mvangi tubaka. Mpe yandi—yandi kuwaka Ndinga yayi, mpe yandi kwendaka tala.

171 Kasi ntangu yayi Mwana-dimeme ke na kulakisa Jean, na kidimbu ya . . . ya—ya masonuku ya dibuundu, mutindu, samu ti dibuundu kuzaba. Yinki kusonika, Yandi ke talisa kaka na yandi. Yandi tubaka, “Ntangu yayi, kutuba yayi ve—ve, kaka yina ya kele. Kukwenda ve kuna, Jean, mpe kutuba, ‘Ntangu yayi, yayi kele kaka mutindu yayi, samu na yina kele na nsi ya Kidimbu ya Sambwadi yayi.’ Ve, kukwenda kuna ve mpe kutuba yawu. Na yina, kana mu tuba yawu na Jean, nsongi na nsongi ya nsungi, manaka nyonso ke kubeba. Ya kele kinsweki.” Beno me mona? Yandi zola kaka . . . Nkwizulu ya Yandi! Yandi tubaka, ntangu yayi, “Mpe muntu mosi ve ke zaba ntangu Mu ke kwisa. Mu ke kwisa kaka.” Beno me mona? Beno me mona? Kaka yina. Ya ke kisalu ya munu ve na kuzaba ntangu yina. Mu ke kubama kaka, beno me mona. Na yawu yandi tubaka . . .

Ntangu yayi Jean belamaka kuna, yandi banzaka, “Mu ke mona Yawu ntangu yayi.”

172 Mpe yinki yandi salaka, ntangu Jean belamaka kuna? Yandi, ntangu yayi, yinki yandi fwana sala? Ntangu yayi yandi fwana sonika yawu na nsungi ya dibuundu. Yawu yina yandi fwana sala, kusonika yawu na bansungi ya dibuundu. “Sonika yina nge me mona samu na Minda Sambwadi yayi ya Wolo, na mbandukulu. Sonika na dibuundu yayi mpe tuba na bawu.” Mbote mingi.

173 Mpe Nzasi basikaka. Jean zabaka ti yawu vwandaka Ndinga ya Nzambi. Mpe kuna Kivangu mosi mutindu nkosi tubaka, “Beno kwiza, beno tala yina ya vwandaka.” Mpe Jean kwendaka kuna, na kilapi ya yandi, samu na kusonika yina yandi ke mona.

174 Ntangu yayi, yandi monaka ata fioti ve kieleka yina ya vwandaka. Yandi bakulaka yawu ata fioti ve. Kasi yina yandi monaka vwandaka yina Nzambi vwandaka tinda na dibuundu samu na “ntangu mosi.” Ntangu yayi Yandi fwana . . . Yandi ke sala yawu; Yandi ke salaka ntangu nionso; Yandi ke monisa yawu pwelele ntangu ya kele ntangu ya kumonisa yawu pwelele. Kasi Yandi monisaka yawu ve pwelele na ntangu yina. Samu na yinki? Samu, Yandi zolaka bumba yawu kinsweki tii na nsungi ya nsuka. Mpe muningu ya Nsangu ya wanzio ya nsuka zolaka vukisa mansweki yayi. Beno me mona?

175 Ya monisaka yawu ve pwelele. Kasi yina Jean monaka, yandi monaka kaka, “Mpunda ya mpembe me basika, na munati-mpunda na zulu ya yawu,” na yina ya kele yina yandi sonikaka, beno me mona, ntangu yandi salaka.

Yawu yina yandi tubaka, “Kwisa, tala.”

176 Na yawu Jean kwendaka samu na kumona yina yandi lendaka kumona, samu na kusonika na dibuundu. Mpe ntangu yandi salaka mutindu yina, yandi monaka, “Mpunda ya mpembe, mpe yandi yina me vwanda kuna na arc; mpe yandi kwendaka kuna mutindu munungi, mpe samu na kununga; mpe

ba pesaka yandi yimpu ya kimfumu.” Mpe, ntangu yayi, ya kele nyonso yina Jean monaka, na yawu yandi vwandaka sonika kaka, vwandaka sonika nyonso yina. Ntangu yayi, beno me mona, yina kele na kidimbu. Ya kele mutindu dibuundu me kuzwa Yawu.

177 Kasi, na nsilulu, mpe na kilumbu ya nsuka Yandi ke monisa Yawu, ke talisa yina Yawu kele. Nzambi, sadisa beto na kubakula. Bansungi ya Dibuundu, kasi ba me zaba yawu ve nionso tii na Nsangu ya sambwadi, ya nsungi ya nsuka ya dibuundu yayi. Beno tala, yandi bandaka. . .

178 Munati-nsangu yayi ya nsungi ya ya dibuundu ya sambwadi, kana beno bakula yawu, yandi ke banda denomination ve, mutindu bayankaka salaka. Beno bambuka moyo, kana yandi bandaka ve. . . Ve. Kana beno tala, yandi ke telemina yawu. Elie vwandaka, Elie vwandaka telemina yawu? Ya kieleka, yandi vwandaka mutindu yina. Jean vwandaka telemina yawu, na Mpeve ya Elie?

179 Wapi mutindu ya Mpeve Elie yina vwandaka na zulu ya yandi? Yandi vwandaka. . . Muntu mosi ve me zaba mingi samu na yandi. Yandi vwandaka kaka muntu, kasi yandi vwandaka profete. Ba yinaka yandi. Oh la la! Mpe yinki ntangu yandi telemaka? Kaka na ntangu ya kuzabana ya Israel, na ntangu bawu nionso kwendaka na yinza. Mpe yandi me basisa yawu kuna, mpe yandi vwandaka “yina ke yinaka bakento.” Uh-huh. Yinga, tata. Ya kieleka. Mpe yandi vwandaka zola ntoto ya kuyuma. Yina vwandaka nkadulu ya yandi.

180 Na yina, bantu yayi zolaka zaba ntangu muntu yina kwisaka kuna na Mpeve ya mutindu mosi na zulu ya yandi, ntangu yandi kwisaka kuna, Jean yayi. Ya kulwata ve mutindu bantu ya lukumu, mutindu mu tubaka mazono na nkokila; bawu ke yambaka ba-bébé, mpe ke kwelana, mpe nionso yina. Kasi muntu yayi kwisaka mutindu muntu ya ntoto ya kuyuma. Yinki yandi vwandaka? Yandi vwandaka zola ntoto ya kuyuma. Kima yankaka yina yandi salaka, yandi vwandaka yina denomination. Yandi tubaka, “Ntangu yayi, beno banda ve na kutuba, ‘Beto kele ya yayi to yina,’ samu ti mu ke tuba na beno, Nzambi kele na kiyeka ya kubasisa bana ya Abraham, na matadi yayi.”

181 Yandi vwandaka kukakula ve. Bawu lendaka ve. . . Bawu tubaka, “Beni kwendaka mona madiadia yina ba me ningisa na mupepe? Jean ve.” Ve, tata.

182 Yinki yandi salaka, diaka? Kaka mutindu Elie yina tubaka na Jézabel, yandi sembaka Hérodias. Yandi kwendaka na ntwala ya Hérode, mpe tubaka, “Nge ke na muswa ve ya kubaka yandi.” Yandi zengaka yintu ya yandi, samu na yawu. Beno me mona? Yandi mekaka na kukabwana na Élisée. Mpeve mosi yina, vwandaka na kati ya Jézabel, vwandaka na kati ya kento yina.

183 Mpe kima ya mutindu mosi kele na dibuundu ya Jézabel bubu yayi, kima ya mutindu mosi. Ntangu yayi beno tala yawu. Wapi mutindu ya lesa ya nene beto ke mona awa!

184 Mpe, ntangu yayi, ya ke monana mutindu bantu yina zolaka zaba. Ntangu Jean bandaka na kusemba bantu yayi, mpe yandi telamaka kuna, ya monanaka ti ba zolaka zaba ti yina vwandaka Mpeve yayi ya Elisée. Ba zolaka bakula yawu. Ya kele yina yandi vwandaka.

185 Ntangu yayi, mpe beto ke mona ti, mpe beto me mona na bansungi ya dibuundu, landila Masonuku, ti ba me sila beto kuvutuka ya Mpeve yina, kaka na ntuala ya ntangu ya nsuka. Ya kieleka?

186 Ntangu yayi, mpe beno tala, beno ke mona nkadulu ya yawu. Ntangu yayi, yandi ke banda nsungi ya dibuundu yankaka ve, mutindu Luther, mpe Wesley, mpe bayankaka nionso me sala. Yandi ke banda dibuundu yankaka ve, samu ya kele dyaka ve na bansungi ya dibuundu samu na kubanda. Beno me mona? Ya ke vwanda dyaka ve na kima. Na yawu yandi fwana telemina yawu, samu Mpeve ya yandi ke vwanda kaka kieleka mutindu yawu vwandaka kuna, Mpeve ya mutindu mosi.

187 Mutindu mu tubaka mazono na nkokila, yawu sepelisa Nzambi na kusadila Yawu bambala tatu. Yina kele ntalu ya Yandi, tatu, zole ve; tatu. Ya me sadila Yawu ntete bambala zole, ntangu yayi Yandi ke sadila Yawu diaka. Yandi tubaka yawu, silaka yawu. Ntangu yayi beno tala, yandi . . .

188 Beno tala ntangu yayi, ntangu Yandi salaka yawu. Yandi ke banda denomination ve, samu Nsungi ya Dibuundu ya Laodicée kele nsungi ya nsuka. Mpe munati-nsangu, ya wanzio ya sambwadi, yina kele munati-nsangu ya sambwadi, samu na nsungi ya sambwadi ya dibuundu, kele muntu yina ke monisa, na nzila ya Mpeve-Santu, bima yayi nionso ya mansweki. Ya ke . . . Bantu yikwa vwandaka awa mazono na nkokila? Beto tala maboko ya beno. Mu banza ti mu ke tanga Yawu diaka ve, kuna. Beno zaba kaka kisika ya kele, kapu ya 10, beno me mona. Mbote mingi. Mbote mingi.

189 Ba-reformateur kwisaka samu na kusungika nsungi ya dibuundu ya nsuka ya kubwa yina kwisaka na ntuala. Na yina, na manima ba-reformateur kwisaka mpe sungikaka nsungi ya dibuundu kisika wapi yawu vwandaka, mpe vutukaka na yinza, na yina bawu ke banda nsungi ya dibuundu ya malu-malu. Bawu ke salaka yawu ntangu nionso, ntangu nionso. Ntangu yayi, beto ke mona yawu. Beno me mona?

190 Na mutindu yankaka, *awa* vwandaka nsungi ya dibuundu ya Catholique, ya dibuundu ya Catholique ya Rome. Na manima kwisaka Luther, reformateur. Ba ke bokila yandi reformateur. Mpe yinki yandi ke sala? Yandi ke banda kaka na kunwanisa kuna, kukondwa kulemba. Mpe, ntangu yandi ke sala yawu,

yandi ke telemina dibuundu. Mpe, kima ya ntete beno zaba, yinki yandi ke sala? Yandi ke tunga kima ya mutindu mosi na yina yandi kwisaka samu na kubasisa bawu, dibuundu yankaka.

<sup>191</sup> Na yina bawu kele na nsungi ya dibuundu yankaka. Na yawu, kima ya ntete beno zaba, awa ke kwisa...Nsungi ya dibuundu kele na kati ya mvindu. Na manima me kwisa John Wesley, reformateur yankaka. Beno me mona, yandi ke tunga nsungi ya dibuundu yankaka. Beno me bakula yina mu zola tuba? Nsungi ya dibuundu yankaka me tungama. Bawu nionso kele ba-reformateur.

<sup>192</sup> Beno tala, Nsangu yayi ya nsuka, ya nsungi ya dibuundu ya nsuka, kele reformateur ve. Yandi kele profete, reformateur ve. Beno talisa na munu kisika profete mosi bandaka nsungi ya dibuundu. Yandi kele reformateur ve. Yandi kele profete.

<sup>193</sup> Bayankaka vwandaka ba-reformateur, kasi baprofete ve. Kana bawu zolaka vwanza, Ndinga ya Mfumu ke kwisaka na profete. Ya kele samu na yina bawu landilaka na mbotika ya "Tata, Mwana, Mpeve-Santu," bima nyonso yankaka yayi, samu ti bawu vwanza ba-reformateur, mpe baprofete ve. Kasi bawu vwanza bantu ya nene ya Nzambi, mpe bawu monaka nsatu ya kilumbu yina bawu vwanza zinga. Mpe Nzambi pakulaka bawu, mpe ba tindaka bawu kuna mpe nwanisaka ngolo bima yina. Kasi Ndinga ya Nzambi ya muvimba kwisaka na bawu ata fioti ve, samu bawu vwanza baprofete ve. Bawu vwanza ba-reformateur.

<sup>194</sup> Kasi na bilumbu ya nsuka, ya fwana vwanza profete, samu na kubaka mansweki ya Nzambi, samu na kuvutula yawu, samu mansweki vwanza kaka ya kuzabana na nzila ya baprofete. Na yawu, muntu yayi fwana kaka kukwisa. Beno me mona yina mu zola tuba ntangu yayi? Yandi lenda vwanza reformateur ve. Ya fwana vwanza profete, samu ya fwana vwanza muntu yina kele na dikabu mpe yina ke vwanza kuna, yina ke simba Ndinga.

<sup>195</sup> Ntangu yayi, ba-reformateur yayi zabaka ti kima mosi vwanza tambula mbote ve. Luther zabaka yawu, ti dimpa yina vwanza ve nzutu ya Klisto. Mpe na yawu yandi longaka, "Muntu ya mbote ke zinga na lukwikilu," mpe yina vwanza nsangu ya yandi. Mpe ntangu John Wesley kwisaka, yandi monaka ti ya vwanza na kusantisama, na yina yandi longaka kusantisama. Yina vwanza nsangu ya yandi. Beno me mona? Ba-Pentecotiste longaka nsangu ya Mpeve-Santu, mpe nionso yina.

<sup>196</sup> Kasi na bilumbu ya nsuka, na nsungi yayi ya nsuka, munati-nsangu ke banda ve na kusungika, kasi yandi ke baka mansweki nionso yina ba-reformateur bikaka, mpe ke vukisa yawu kisika mosi mpe ke yidika yawu samu na bantu. Beno bika mu tanga Yawu diaka. Ya ke wakana mbote mingi samu na munu! Mu—mu zola tanga Yawu.

*...Mu monaka wanzio yankaka ya ngolo ke kulumuka na zulu, mpe yandi lwataka dituti: ... mukyama...na zulu ya yintu ya yandi, mpe kizizi ya yandi vwandaka...mwini, mpe makulu ya yandi mutindu makunzi ya tiya:*

197 Ntangu yayi, beto me mona kima ya mutindu mosi, yina vwandaka Klisto. Mpe beto zaba ti Klisto kele ntangu nionso Munati-nsangu samu na Dibuundu. Mbote mingi. Ba me bokila Yandi Dikunzi ya Tiya, Wanzio ya Ngwisani, mpe nyonso yankaka.

*Mpe yandi vwandaka na buku ya fioti na diboko ya yandi ya kuzibuka:...*

198 Ntangu yayi, Bidimbu me zibuka, awa. Beto ke na kubuka yawu ntangu yayi. Kasi, yayi, Kima kele ya kuzibuka.

*...mpe yandi tulaka dikulu ya yandi na zulu ya mubu, mpe dikulu ya yandi ya kikento...na zulu ya ntoto,*

*Mpe yandi bokaka...na ndinga ya ngolo, mutindu nkosi ke bokaka: Mpe ntangu yandi...bokaka, banzasi sambwadi basisaka bandinga ya bawu. (Oh, la la! Ya muvimba!)*

*Mpe ntangu banzasi sambwadi basisaka bandinga ya bawu, mu Jean zolaka sonika (kusonika yinki?) yina yawu tubaka: mpe mu kuwaka ndinga mosi na zulu (Nzambi) kutuba na munu, Kanga bima yayi yina banzasi sambwadi me tuba, mpe kusonika yawu ve. Kusonika yawu ve. (Beno me mona?)*

*Mpe wanzio yina mu monaka ya kutelama na zulu ya mubu...yandi telemisaka maboko ya yandi na zulu,*

*Mpe zengaka ndefi na yandi yina ke zingaka mvula na mvula mpe mvula na mvula, yina vangaka mazulu, mpe bima yina kele na kati ya yawu, mpe ntoto, mpe bima yina kele na kati kuna, mpe mubu, mpe bima yina kele na kati kuna, ti ntangu ke vwanda dyaka ve:*

199 Beno tala mbote! Beno zimbana yayi ve ntangu yayi, na yina beto ke na kukwenda.

*Kasi na bilumbu (bilumbu) ya ndinga ya wanzio ya sambwadi,...*

200 Wanzio ya nsuka yina, wanzio ya ntoto. Wanzio yayi me kulumuka na Mazulu. Ya vwandaka Yandi ve; Yandi me katuka na Mazulu. Kasi Yandi ke na kuzonzaka awa na ndinga ya wanzio ya sambwadi, yina kele... Wanzio zola kutuba "munati-nsangu," muntu nionso me zaba yawu, mpe munati-nsangu samu na nsungi ya dibuundu.

*...na bilumbu ya ndinga ya wanzio ya sambwadi, ntangu yandi ke banda na kubula mpungi, mansweki*



(Bidimbu Sambwadi, nionso, mansweki nionso) *ya Nzambi ke kumana, mutindu yandi me tuba na misadi ya yandi baprofete.*

<sup>201</sup> Mansweki nionso ya muvimba me zibuka. Yawu yina ministere ya wanzio yina. Beno me mona? Beno vwanda ya kukikulumusa, bantu ke luta kaka na zulu ya yawu. Kasi, na yina, ya ke siamisama na mutindu ya kulunga. Ya ke zabana na mutindu ya kulunga. Beno me mona? Bayina nionso zola kumona yawu lenda mona yawu. Beno me mona? Ya kieleka. Kasi bayina . . .

<sup>202</sup> Yesu tubaka, mutindu Yandi tubaka ntangu Yandi kwisaka, yandi tubaka, “Beno kele na meso, mpe beno lenda mona ve. Esaie tubaka yawu. Beno me mona? Mpe beno kele na makutu, mpe beno lenda kuwa ve.” Ntangu yayi, na yawu beto ke tala ti . . .

<sup>203</sup> Mu me kuzwa boma. Mu me tala kuna na montele mpe mu banzaka ti ya vwandaka ngunga ya kumi. Kasi, ya kele, mu—mu fwana . . . Ya me lunga ntete ve yivwa, ntete, beno me mona. Mbote mingi. Oh, la la! Beto tala yawu ntangu yayi. Beno tala. Mu zola yayi.

<sup>204</sup> Ba-reformateur, kasi, na kuvwandaka bantu ya nene ya Nzambi, ba monaka nsatu ya kilumbu, mpe nataka kusungika.

<sup>205</sup> Kasi Apocalypse 10 me tuba ti Nsangu ya yandi lendaka monisama, kusungika ve; kotalisa mansweki. Mansweki! Ya kele Ndinga na kati ya muntu. Hebreux 4 me tuba, ti, “Ndinga ya Nzambi kele na meno mingi kulutila mbele yina kele na meno balweka nionso zole, yina ke kota na kati ya mikwa, mpe ke Monisa binsweki ya ntima.” Beno me mona? Muntu yayi kele reformateur ve. Yandi ke kimonikisi, kimonikisi ya (yinki?) ya mansweki ya Nzambi. Na yina mabuundu vwandaka me kotisa Yawu nyonso na poto-poto mpe nyonso yina, yandi ke kwisa na Ndinga ya Nzambi mpe ke talisa kima yayi.

<sup>206</sup> Samu ti, yandi fwana “kuvutula Lukwikilu ya bana na tata.” Lukwikilu ya ntete ya Biblia fwana vutukila na nzila ya wanzio ya sambwadi. Ntangu yayi, oh, mutindu mu zola yayi! Mansweki nionso ya Bidimbu, yina ba-reformateur bakulaka yawu ve ya muvimba! Beno me mona? Ntangu yayi beno tala Malachie 4, mwa minuti fioti. Mbote, beno sonika yawu kaka. Yandi kele profete, mpe, “ke vutula Lukwikilu ya ntete ya batata.” Ntangu yayi beto ke vingila muntu yina na kukota na kosalu. Yandi ke vwanda ya kukikulumusa mingi ti makumi ya mafuku na mafuku ke . . . Mbote, ya ke vwanda mwa nkonga ya fioti yina ke bakula Yawu.

<sup>207</sup> Ntangu, beno ke bambuka moyo kilumbu yina, ntangu Jean zolaka kwiza, ba samunaka yandi na profesi, mutindu munatinsangu ntete Klisto kukwiza, “ndinga mosi ke boka na ntoto ya kuyuma.” Malachie monaka yandi. Beno tala, kapu ya 3 ya

Malachie kele nkwezulu ya Elie yina zolaka kwisa mpe fwana tekila nkwezulu ya Klisto.

208 Beno ke tuba, “Oh, ve, ve, Mpangi Branham. Ya kele kapu ya 4.” Mu ke lombamba beno pardo.

209 Yesu tubaka ti ya vwandaka kapu ya 3. Ntangu yayi beno baka Santu. . . Beno baka Santu Matthieu, kapu 11 mpe nzila ya 6, Yandi ke—Yandi ke tuba yayi. Kapu 11—11, mu banza ti ya kele nzila ya 6; 4, 5, to 6, kaka kuna. Yandi tubaka, “Kana beno lenda kuzwa yawu,” ntangu Yandi vwandaka zonzila Jean, “yayi kele yandi yina ba zonzaka, ‘Mu ke fidisa munati-nsangu ya Munu na ntuala ya Munu.’” Ntangu yayi beno tanga Malachie 3. Bayankaka ke meka na kutula yawu na Malachie 4. Ve, tata, yina kele yawu ve.

210 Beno tala Malachie 4, kaka ntangu munati-nsangu yina ke basika, yinza ya muvimba ke yokama na tiya, mpe bantu ya mbote ke tambula na Millenium, na zulu ya mbombi ya bawu. Na yawu, beno me mona, kana beno tula yandi kuna na manima, na yina—na yina Biblia ke tuba kima ya luvunu. Beto me kuzwa bamvula mafunda zole, mpe kasi yinza me yokama ve na tiya, mpe bantu ya kudedama ke na kuzinga na kati ya yawu. Na yina ya fwana vwanda na bilumbu ke kwisa. Oh, la la!

211 Kana beno baka awa na Apocalypse, mpe beno tala yinki munati-nsangu yina na nsuka ya nsungi yayi fwana sala, na yina beno ke mona yina yawu kele. Yandi fwana vwanda profete. Yandi ke baka bima yina nionso ba-reformateur monaka ve, mpe ke tula Yawu na kisika.

212 Wapi mutindu beto lenda fwanikisa Matthieu 28:19 na Actes 2:38, kukondwa luzayikisu ya kimpeve ya Nzambi? Wapi mutindu bantu yayi lenda tuba ti bilumbu ya bimangu me luta, mpe nionso yina, mpe (huh!) kukondwa luzayikisu ya Nzambi? Mutindu kaka bawu ke zaba yawu, kele kuzaba kana ya kele kieleka to luvunu! Beno me mona? Kasi ba me katuka na baseminere. Mu banza ti beto kele na ntangu ya kukota na yawu.

213 Mu zola sala nswalu, samu ti mu zola ve kubumba beno awa sabala mosi, beno zaba yina mu zola kutuba, yayi, kuzibuka ya Bidimbu yayi. Mu fwana kuzwa kilumbu mosi, mpe mu ke zola sambila samu na bambevo na kilumbu yina, kana mu lendaka sala yawu.

214 Ntangu yayi beno tala, Malachie 4, yandi kele profete, mpe “ke vutula Lukwikilu ya ntete ya batata.”

215 Na ntangu ya nsuka, ntangu nsungi ya Lukwamusu ke kwisa. . . Ntangu yayi beno tala mwa kima ya fioti yina beto ke vutukila diaka, na mwa ntangu fioti, bamvula tatu na ndambu, to, basabala makumi sambwadi ya Daniel, ndambu ya basabala makumi sambwadi ya Daniel, yina kele bamvula tatu na ndambu. Ntangu yayi, beto. . . Bantu yikwa ke bambuka moyo na yawu, kubanda na bansungi ya dibuundu? [Dibuundu me

tuba, “Amen.”—Mu.] Beno me mona? “Ya ke na basabala makumi sambwadi ba me zenga.” Beno tala mutindu ya vwandaka ya kulunga. Yandi tubaka, “Mesiya ke kwisa, mpe ba ke katula Yandi, samu na munkayulu, na kati-kati ya sabala, mpe musiku ke suka.” Na yina, ya kele dyaka na bamvula tatu na ndambu ke vingila, samu na Malongi ya Mesiya samu na ba-Juif.

<sup>216</sup> Mpe Nzambi ke salaka ve na ba-Juif mpe Bantu ya makanda mbala mosi. Yandi ke salaka na Israel mutindu yinsi mosi, Bantu ya makanda mutindu muntu mosi. Yandi bakaka ata mbala mosi ve Bantu ya makanda samu na Kento ya Yandi ya makwela; Yandi bakaka bantu na kati ya Bantu ya makanda. Beno me mona? Ntangu yayi Yandi ke sala na Israel mutindu yinsi mosi. Mpe ntangu yayi yandi me vwanda kuna, kaka kuna na ntangu yayi, mutindu yinsi mosi.

<sup>217</sup> Mu me kuzwa mukanda ya Paul bubu yayi, Paul Boyd. Mpe yandi vwandaka tuba na munu, yandi tubaka, “Mpangi Branham, wapi mutindu ya kele kieleka! Ba-Juif yayi kele dyaka na nsatu ya ngitukulu samu na Bantu ya makanda, ata nyonso yina me salama.” Kieleka, ba ke sala yawu. Ba fwana salama mutindu yina.

<sup>218</sup> Ntangu Martin Luther me sala nsamunu, ti, “Ba fwana basisa ba-Juif nionso, mpe kuyoka bayinzo ya bawu, samu bawu vwandaka mbeni ya Klisto.” Beno me mona? Martin Luther salaka nsamunu yayi, yandi mosi, na bisono ya yandi. Ntangu yayi, Hitler lungisaka kaka yina Martin Luther tubaka. Samu na yinki Martin Luther tubaka yawu? Samu ti yandi vwandaka reformateur, profete ve.

<sup>219</sup> Nzambi, ti, “Profete ya Munu sakumunaka Israel, yandi tubaka, ‘Muntu nionso yina ke sakumuna nge ke kuzwa lusakumunu, mpe yandi yina ke singa nge ke ke kuzwa nsingulu.’” Wapi mutindu profete mosi lenda telama mpe kumanga yina profete yankaka tubaka? Yandi lenda ve kusala yawu. Ya fwana vwanda ya ngwisani, beno me mona.

<sup>220</sup> Kasi kikuma yawu yina bawu ke tulaka. . . Beno me mona, Allemagne lendaka vwanda yinsi ya Baklisto, mpe, bawu, mutindu bawu salaka na Israël! Bawu kele dyaka na ntima ya muvimba, mpe beno lenda ve kusemba bawu. Kasi beno bambuka moyo, ba-Juif yina kele ya kuvwanda awa, beno vwanda na boma ve, kilumbu ke na kwiza! Nzambi lenda ata mbala mosi ve kuzimbana bawu. Ba vwandaka meso ya kufwa samu na beto.

<sup>221</sup> Beno zaba, Yandi tubaka na profete, Yandi. . . Profete bokaka, yandi tubaka, “Nge ke zimbana Israel?”

<sup>222</sup> Yandi tubaka, “Baka nkawa yayi ya kitesilu; mpe wapi kele yinda ya mazulu? Wapi mutindu kele mudindu ya mubu?”

Yandi tubaka, “Mu lenda ve kutesa yawu.”

223 Yandi tubaka, “Mu ke zimbana Israel ata fioti ve.” Yina kele bantu ya Yandi, misadi ya Yandi.

224 Mpe Bantu ya makanda, kele kaka mwa ndambu yina ba me baka kuna, samu na kuvwanda Kento ya Yandi ya makwela. Ya kele kaka kieleka. Ya kele Kento ya makwela.

225 Ntangu yayi, ba zengaka basabala makumi sambwadi, na mutindu ya kulunga, mutindu Daniel tubaka ti Mesiya ke kwisa mpe ba ke katula yandi na kati-kati ya sabala. Mpe Yesu pesaka profesi bamvula tatu na ndambu. Ntangu yayi, na kati-kati ya yayi, bamvula tatu na ndambu ya Daniel, na kati-kati ya yawu, ba katulaka Yandi. Kasi ntangu yayi kitini ya nsuka kele ntangu ya Lukwamusu, kisika dibuundu ya Bantu ya makanda kele. Oh, yayi kele nene! Ntangu yayi beno kondwa yawu ve. Kento ya makwela ke kwenda na Bakala ya makwela; na yina, na manima ya Millénium, Yandi ke basika na kutambulaka na zulu ya mbombi ya bantu ya yimbi.

226 Mu ke talisa na beno kima mosi awa, na yina beto ke na yawu na mabanza. Mu ke talisa na beno yina Yawu tubaka, yina Biblia me tuba. Mpe beto lenda manga ve ti Yayi kele Ndinga ya Nzambi. Kana beto sala yawu, kuna beto kele mimpani. Beno me mona, beto fwana kwikila Yawu. Beno ke tuba, “Mu ke na kubakula Yawu ve.” Munu mpe ke bakula yawu ve. Kasi mu ke vingila Yandi kumonisa Yawu pwelele. Beno tala.

*Na yina, beno tala, kilumbu ke kwisa, ya tiya mutindu dibulu ya tiya; mpe bantu nionso ya yimbi ke vwandaka mutindu matiti (mutindu ba-American, mpe nionso yina), yinga, . . . bantu nionso ya yimbi, ke vvwanda mutindu matiti: (Ya ke yoka.) mpe kilumbu yina ke kwisa, ti Mu ke yoka bawu, me tuba MFUMU ya makesa, . . . ya ke bikana na bawu nsimbulu ve to divala.*

227 Wapi mutindu beno ke kuzwa difelo ya Seko na kati kuna? Beno me mona, ya kele bilumbu ya nsuka, ntangu bima yayi ke monisama. Ya kele ve na kisika na kati ya Biblia ke tuba ti difelo kele ya Kukonda nsuka. Na yina, samu na kuzwa . . . samu na kuvwanda na difelo ya Kukonda nsuka, beno fwana kuzwa Luzingu ya Kukonda nsuka samu na kuvwanda kuna. Kele kaka na mutindu mosi ya Luzingu ya Kukonda nsuka, mpe yawu yina beto ke na kusalaka kingolo-ngolo. Bima nionso, kele na mbandukulu, kele na nsuka. “Ba vangaka difelo samu na dyabulu mpe bawanzio ya yandi,” mpe yandi ke yokama mpe ke zimbana. Kieleka. Beno me mona? Kasi ntangu yayi ke salama, “Ba ke bikana na bawu nsimbulu to divala ve.”

*Kasi samu na bawu yina kele na boma ya nkumbu ya munu Mwini ya kieleka ke basika na kubeluka na mapapu ya yandi; . . . beno ke basika, mutindu beno ke lemuka mutindu bana ya ngombe na kidikilu.*

*Mpe beno ke diata bantu ya yimbi; samu ba ke vwanda mutindu mbombi na nsi ya makulu ya beno na kilumbu yina mu ke sala yayi, me tuba MFUMU ya makesa.*

228 Wapi kisika bantu ya yimbi ke vwanda na manima ya Lukwamusu? Mbombi.

*Beno bambuka moyo . . . misiku ya Moise . . . yina mu tumaka . . . yandi na Horeb samu na Israel nionso, na misiku mpe lufundusu.*

*Beno tala, Mu ke tinda na beno profete Elie na ntwala ya nkwezulu yina ya nene ya MFUMU:*

229 Amen! Tala Ngwisani ya Ntama yina ke na kusuka mutindu yayi, mpe tala Ngwisani ya Malu-malu ke na kusuka na kima ya mutindu mosi. Wapi mutindu beno ke pekisa yawu? Beno lenda ve. Beno tala, “Mu ke tinda beno profete Elie na ntwala kilumbu yina kukwisa.”

*Mpe yandi ke vutula bantima ya batata na bana, mpe bantima ya bana na batata, samu ti mu kwiza bula ntoto na nsingulu ve. (Uh!)*

230 Beno bawu yayi. Yina kele Ndinga ya Mfumu. Yandi silaka yawu. Yawu fwana kwisa. Mpe ntangu yayi kana beno tala mutindu yayi ke salama. Ya kele kitoko, mutindu Nzambi ke salaka yawu. Kento ya makwela ke basika, mpe na Bakala ya makwela. Mpe—mpe kuna na manima ya yina, bantu ya yimbi ke yokama na tiya yina ke kufwa ve. Mpe na manima ba me vedisa yinza, yandi ke buta yandi mosi. Nyonso fwana sala yawu, ya fwana luta na kitini ya mvedolo.

231 Ba-volcan ke pasuka na ntangu yina ya nene ya nsuka, mpe yinza ke pasuka, mpe ke luka tiya, mpe nionso yina; mpe bisika yayi nionso poto-poto ya masumu, mpe nionso yina kele na zulu ya ntoto, ke niena na kima mosi ve. Yawu ke yokama na tiya ya ngolo, ti ya ke vwanda mutindu décolorant yina ke vutula couleur ya—ya ntinta na luvangulu ya yawu ya ntete. Mutindu yina Tiya ya Nzambi ke vwanda na tiya mingi ti ya ke vutula kima nionso ya mvindu na mutindu ya yawu ya ntete, ntangu Satana na disumu nionso ke yokama na tiya, mpe bima nionso. Na manima yandi ke basika na kitoko mutindu yandi vwandaka na disamba ya Eden. Kieleka. Oh, ngunga yina ya nene kele na ntwala ya beto!

232 Na ntangu ya Lukwamusu . . . Beno tala yina mu zola ti beno bakula ntangu yayi, mwa kima yina mu me tula na kati awa. Na ntangu ya Lukwamusu yayi, na manima ba me bokila Kento ya makwela, mpe dibuundu me luta na ntangu ya Lukwamusu, ba me bokila nkama na makumi yiya na yiya ya mafunda na bambangi zole ya Apocalypse 11. Beno tala ntangu yayi. Ba ke pesa profesu, bilumbu funda mosi na nkama zole na makumi sambanu, ya kulwata basaki.

233 Ntangu yayi, beto me zaba ti manaka ya beto ya ba-Romain kele na . . . Beto kele na bilumbu makumi zole na nana mpe, na bantangu yankaka, mpe makumi tatu na mosi. Kasi, manaka, ya kieleka, ke tangaka, bilumbu makumi tatu na ngonda nyonso. Ya kieleka. Mpe beno baka nkama mosi . . . bilumbu funda mosi na bankama zole na makumi sambanu, mpe beno kabula yawu na makumi tatu, mpe beno tala yina beno ke kuzwa. Bamvula tatu na ndambu, ya kieleka. Yayi kele ntangu yina ba me zenga, ntangu samu na Nsangu ya Mesiya ke longama na Israel, mutindu ya vwandaka kuna. Ntangu Yandi ke vutuka mpe ke sala Yandi mosi kuzabana, na mutindu ya kidimbu ti ntangu Yandi ke kwiza . . .

234 Ntangu, ba nataka Joseph na yinsi yayi, mpe ba losaka yandi na bampangi ya yandi, samu yandi vwandaka muntu ya kimpeve. Yandi lendaka mona ba-vision mpe ke tendula bandosi. Mpe samu na yawu, ba nataka yandi na yinsi yayi mpe ba tekaka yandi pene ya bampata makumi tatu. Yandi vwandaka talisa Klisto, ya kieleka, samu ya vwandaka Mpeve ya Klisto na kati ya yandi.

235 Beno tala yina salamaka kuna. Mpe beno tala ti, samu na yina, ba tulaka yandi na boloko, mpe muntu mosi kuzwaka mpulusu mpe yankaka zimbanaka. Ya kieleka Yesu, ntangu Yandi vwandaka na boloko na zulu ya kulunsi, muyibi mosi kuzwaka mpulusu mpe yankaka zimbanaka, ya kieleka.

236 Ba losaka yandi na dibulu, ba banzaka ti yandi vwandaka ya kufwa, mpe ba zangulaka yandi, tii na diboko ya kibakala ya Pharaon, ti muntu mosi ve lendaka mona Pharaon kukondwa kumona Joseph ntete. Yesu kele ya kuvwanda na diboko ya kibakala ya Nzambi, mpe muntu mosi ve lenda kwiza na Tata kaka na nzila ya Mwana. Kieleka.

237 Mpe beno tala ntangu nionso Joseph vwandaka kwenda, ntangu Joseph vwandaka telama na diboko ya kibakala ya kiti yayi ya kimfumu. Beno tala! Nkembo! Joseph vwandaka ya kuvwanda kuna, na diboko ya kibakala ya Pharaon. Mpe ntangu Joseph telamaka, samu na kukatuka na kiti ya kimfumu yina, mpungi vwandaka bula. “Beno fukama, beno nyonso! Joseph ke na kwiza!”

238 Ntangu Mwana-dimeme yina ke bika Kiti ya kimfumu, kuna, na bilumbu ya Yandi ya kusalu ya muvukisi, ntangu Yandi ke bika Kiti ya kimfumu kuna, mpe ke baka Buku yina ya Mpulusu mpe ke belama, mabolongo nionso ke fukama. Yandi yayi. Beno tala.

239 Mpe ntangu Joseph, ba losaka yandi na bampangi ya yandi, ba pesaka yandi kento ya Makanda. Potiphar pesaka yandi . . . To, Pharaon pesaka yandi kento ya Makanda, mpe yandi butaka bana ya Makanda, ndambu ya Muntu ya makanda mpe ndambu Juif. Bawu pesaka kidimbu ya nene. Ntangu Jacob vwandaka sakumuna bawu, Éphraïm na lweka mosi mpe Manassé na

Iweka yankaka, yandi vukisaka maboko ya yandi mpe pesaka lusakumunu na mwana ya fyoti. Mpe ba bwelaka bana zole na makanda kumi na zole, yina vwandaka kaka kumi na ntangu yina, mpe yandi sakumunaka bawu na Jacob yandi mosi. Mpe Joseph, mwana ya yandi ya profete, yina vwandaka kuna, tubaka, “Tata, nge me sala kifu.” Yandi tubaka, “Nge me tula lusakumunu ya nge na zulu ya mwana ya fyoti, na kisika ya zolaka vwanda na zulu ya kuluntu.”

<sup>240</sup> Mpe yandi tubaka, “Mu zaba ti mu me vukisa maboko ya munu, kasi Nzambi me vukisa yawu.” Samu na yinki? Israel, vwandaka na muswa ya kuvwanda Kento ya makwela, losaka mpe tekaka bukuluntu ya yandi, mpe . . . yina lutaka na mwana ya kuluntu, Israel, na mwana ya fyoti, Muntu ya makanda. Mpe na kulunsi, masakumunu lutaka kuna, tii na Bantu ya makanda.

<sup>241</sup> Kasi beno tala na manima ya yawu, beno me mona, na nzila ya yawu, ntangu nyonso . . . Yandi bakaka kento ya yandi ya makwela. Kasi ntangu bana ya babakala yina kulumukaka samu na kusumba madia . . .

<sup>242</sup> Oh, ya kele kifwanisu ya kitoko mingi! Mu me katuka na Kidimbu, kasi mu fwana tuba yawu, beno me mona, samu beno ke kuzwa kifwanisu ya mbote, mu ke kwikila. Beno tala.

<sup>243</sup> Ntangu yayi, ntangu bawu kulumukaka kuna samu na kusumba madia, beno zaba, Joseph zabaka bawu kuna. Mpe Joseph vwandaka mwana ya ntomoso. Kisika nionso yandi vwandaka kwenda, yawu vwandaka kwenda kaka na ntwala.

<sup>244</sup> Beno vingila ntangu Yandi ke vutuka na zulu ya ntoto; beno vingila ntangu Joseph ya beto ke kwisa! Beno me mona? “Ntoto ya kuyuma ke basisa bafelele mutindu felele yayi rose, mpe Mwini ya Ludedomo ke basika na kubeluka na mapapu ya Yandi.” Oh, la la! Ba-cactus nionso ya Arizona ke yalumuka na bayinti ya kitoko, mpe ya—mpe ya ke vwanda kitoko.

<sup>245</sup> Beno tala, yandi yina ke na kwisa, mpe yandi ke bula mwa kima mosi kuna samu na bawu. Mpe yandi ke bokila bawu, mpe yandi ke tuba, “Tata ya munu kele dyaka na luzingu?” Beno me mona? Yandi zolaka zaba kana tata ya mwana ya bakala yina vwandaka zinga. Yandi tubaka, “Yinga.” Yandi zabaka ti yina vwandaka mpangi ya yandi ya bakala. Kasi beno me bakula ti ntangu yandi kubamaka samu na kumonana yandi mosi na bampangi ya yandi?

<sup>246</sup> Mpe yandi monaka Benjamin ya fioti, yina butukaka kubanda ntangu yandi kwendaka. Mpe yina ke talisa ba-Juif yayi, nkama na makumi yiya na yiya ya mafunda yina ke vukana kuna kubanda ntangu Yandi me kwenda. Mpe ntangu Yandi vutukaka, Yandi tubaka . . . Yandi talaka Benjamin; ntima ya yandi vwandaka pene ya kupasuka.

<sup>247</sup> Mpe, beno bambuka moyo, bawu vwandaka . . . yandi . . . Bawu zabaka ve ti yandi lendaka tuba Hébreu. Yandi vwandaka

sadila mutendudi. Yandi ke sala mutindu yandi vwandaka muntu ya Egypte. Beno me mona? Mpe kuna ntangu ba zabaka yandi, yandi zolaka kukitalisa yandi mosi, yandi vwandaka tala Benjamin ya fioti. Mpe, beno bambuka moyo, yandi basisaka kento ya yandi. Yandi vwandaka na yinzo ya kimfumu ntangu yandi kukitalisaka yandi mosi na bampangi ya yandi.

<sup>248</sup> Mpe Kento ya makwela ya Bantu ya makanda, Kento, na manima ba losaka Yesu na bantu ya Yandi Mosi, Yandi me baka Kento ya makwela ya Bantu ya makanda. Mpe ke katula Yandi awa, ke nata Yandi na Yinzo ya kimfumu, na Yinzo ya Tata ya Yandi na Nkembo, samu na Madia ya Makwela. Mpe ke kulumuka dyaka, samu na kukitalisa Yandi mosi na bampangi ya Yandi, nkama na makumi yiya na yiya ya mafunda . . . ? . . . na ntangu yina.

<sup>249</sup> Kuna yandi me telama. Mpe, beno bambuka moyo, beno tala bidimbu ya kulunga. Mpe ntangu yandi vutukaka na kisika mambu yayi vwandaka salama, yandi talaka bawu, mpe yandi tubaka—yandi tubaka . . . yandi bandaka na kutala bawu. Mpe bawu bandaka na kutuba. Bawu tubaka, “Ntangu yayi, Ruben, nge zaba ti beto kele na kati ya mpasi ntangu yayi, beno me mona. Samu ti, nge zaba yina beto salaka. Beto talisaka mpasi na mwana ya bakala yayi na mutindu yayi. Ntangu yayi, beto zolaka ve kuteka mpangi ya beto ya bakala.” Yina vwandaka mpangi ya bawu ya bakala yina vwandaka kuna, ntinu yina ya ngolo, mpe bawu zabaka yawu ve.

<sup>250</sup> Ya kele samu na yina Israel lenda ve kubakula Yandi bubu yayi. Ya kele ntete ve ngunga na kuzaba yawu.

<sup>251</sup> Mpe kuna, yandi, bawu banzaka ti yandi lendaka ve kubakula Hébreu, kasi yandi vwandaka kuwa bawu. Bawu tubaka, “Ntangu yayi beto ke na kati ya mpasi.” Mpe Joseph, ntangu yandi talaka bawu, yandi lendaka diaka ve kukanga ntima.

<sup>252</sup> Ntangu yayi, beno bambuka moyo, kento ya yandi mpe bana vwandaka na yinzo ya kimfumu na ntangu yina. Basantu vwandaka me kwenda, ba kele ve kuna.

<sup>253</sup> Mpe yandi tubaka, “Mu kele Joseph, mpangi ya beno ya bakala.” Mpe yandi kwendaka mbangu mpe bakaka Benjamin, yandi lemukaka na nkingu ya yandi, mpe bandaka na kudila. Beno me mona? Mpe yandi kukitalisaka yandi mosi.

<sup>254</sup> Mpe kuna bawu tubaka, “Ntangu yayi beto zaba ti beto ke na kati ya mpasi, samu ti beto tekaka yandi. Beto vwandaka yina tekaka yandi. Beto vwandaka yina mekaka na kufwa yandi, ntangu yayi beto zaba ti yandi ke kufwa beto.”

<sup>255</sup> Yandi tubaka, “Ve, beno dasuka ve, beno salaka yawu kaka samu na kukeba luzingu. Yawu yina Nzambi me tinda munu awa.”



256 Mpe ntangu Yandi kukitalisaka Yandi mosi, Biblia ke tuba . . . na yina beto me mona yawu. Ntangu Yandi ke kukitalisa Yandi mosi na nkama na makumi yiya na yiya ya mafunda kuna, ntwenya ya Benjamin ya bubu yayi, mpe ndambu ya ba-Juif yina me bikana kuna; ntangu Yandi ke kukitalisa Yandi mosi, bawu ke tuba, “Wapi kisika Nge me kuzwa bamputa yayi? Yinki yawu ke na kusalaka na diboko ya Nge?”

257 Yandi ke tuba, “Oh, Mu me kuzwa yawu na yinzo ya bankundi ya Munu.” Beno me mona? Oh, kuna bawu ke bakula ti bawu kufwaka Mesiya. Kasi yinki Yandi ke tuba? Mutindu mosi Joseph salaka. “Beno salaka yawu samu na kukeba luzingu; ve . . . samu na kukeba luzingu. Beno dasuka ve.” Samu, ti, Bantu ya makanda zolaka kota ve kana ba-Juif kusalaka ve kima yina na kufwa ya meso ya bawu. Na yina, Yandi kebaka luzingu ya Dibundu, na nzila ya bima yina bawu salaka. Na yawu beno bawu yayi. Ya kele samu na yina, bubu yayi, bawu lenda ve kubakula Yayi; ya kele ngunga ve.

258 Beto lenda bakula ve bima yayi tii ntangu ke lunga samu ba bakula Yawu. Oh, la la! Banzasi Sambwadi ya Apocalypse! Bika Yandi talisa Kento ya makwela wapi mutindu kukubama samu na lukwikilu ya nene ya luzangulu!

259 Ntangu yayi beto sala nswalu, samu ti beto me kondwa na kutala baminuti kumi na tanu, makumi zole.

260 Ntangu yayi, yinki zola kutuba mpunda yayi ya mpembe? Beno bika mu tanga . . . Mu me vwanda ntama mingi ve; beno lemvokila munu samu mu me basika na dilongi ya munu. Kasi, kasi mu ke tanga diaka nzila, banzila zole.

*Mpe mu monaka ntangu Mwana-dimeme zibukaka mosi na bidimbu, mpe mu waka, mutindu ya vwandaka makelele ya nzasi, mpe mosi ya bivangu yiya tubaka, Kwiza . . . tala.*

*Mpe mu vwandaka tala, mpe tala mpunda ya mpembe: . . .*

261 Ntangu yayi beto ke kota na nzila ya 2.

*. . . mpunda ya mpembe: mpe yandi yina vwandaka na zulu ya yandi vwandaka na munani; mpe ba pesaka yandi yimpu ya kimfumu, (yandi vwandaka na yawu ntete ve) . . . samu na yandi: mpe yandi kwendaka kuna mutindu munungi, mpe samu na kununga.*

262 Ya me suka kaka kuna. Yina kele Kidimbu. Ntangu yayi beto tala bidimbu.

263 Beto monaka yina Nzasi zola tuba. Ya ke ya kulunga, beto zaba yawu, beno me mona. Nzasi vwandaka Ndinga ya Nzambi, na ntangu Kidimbu zibukaka.

264 Ntangu yayi, yinki zola kutuba mpunda ya mpembe? Ntangu yayi, awa kele kisika luzayikisu ke kwisaka. Mu ke kwikila

yawu, mutindu mu me telama awa, na kuzabaka ti yayi kele Ndinga.

<sup>265</sup> Mu me tanga buku nionso na zulu ya yawu mu lendaka kuzwa. Mpe na . . . mu . . . Mbala ya nsuka yina mu—mu mekaka na kuzonzila yawu, kaka kulonga yawu, pene ya bamvula makumi tatu me luta, mu bakaka buku . . . Muntu mosi tubaka na munu ti ba-Adventistes vwandaka na nsemo mingi na Nkwizulu ya zole ya Klisto kulutila bantu nionso yina yandi zabaka, na yina mu monaka mwa babuku ya bawu ya mbote, samu na kutanga yawu. Mu me kuzwa buku ya Smith na zulu ya Daniel, na baluzayikisu. Mpe yandi tubaka ti mpunda ya mpembe yina me basika vwandaka mpembe, mpe ya vwandaka talisa munungi. Mpe na lunungu yayi . . . Mingi ya beno bampangi ya ba-Adventiste awa zaba buku yango, mpe mingi ya beno bayankaka, mpe, na kutanga yawu. Mpe—mpe bayankaka, mu me tanga zole to tatu. Mu me tanga, mpe mu lenda bokila ve . . . Ya kele na babuku zole dyaka mu me tangaka, mpe babakala zole yayi ndimaka ti ya vwandaka kieleka. Ya vwandaka milongi ya mbote, bayina zolaka vwanda ya kulutila mbote, yina me longukaka mingi. Na yawu mu banzaka, “Mbote, kana mu zaba ve, mu ke tuba kaka yina bawu tubaka, mu ke meka kulonga yawu mutindu yina.”

<sup>266</sup> Ba ke tendula yawu mbote, yina ya kieleka ya zola kutuba. Mpe bawu tubaka, “Ntangu yayi, yayi kele mpunda ya mpembe, mpe mpunda ya mpembe kele ngolo, mpunda ya bitumba.” Mpe bawu tubaka, “Bakala yina me vwanda na zulu ya yawu, vwandaka mpunda ya mpembe, vwandaka Mpeve-Santu yina kwendaka na nsungi ya ntete mpe nungaka nsungi yina samu na Kimfumu ya Nzambi. Yandi vwandaka na munani na diboko ya yandi, yina zolaka tuba, ti ya vwandaka mutindu Cupidon, yandi vwandaka bula na bantima ya bantu matolo-tolo ya zola, zola ya Nzambi, mpe yandi nungaka.”

<sup>267</sup> Ntangu yayi, ya ke wakana kieleka mbote, kasi ya kele Kieleka ve. Ve, tata. Yinga. Ya vwandaka mutindu yina ve. Mpembe zola kutuba ludedomo. Beto—beto ke bakula yawu. Mpembe zola kutuba ludedomo. Milongisi longaka yawu, ti ya vwandaka Mpeve-Santu vwandaka nunga na nsungi ya ntete; kasi luzayikisu ya munu, na nzila ya Mpeve-Santu, kele ya kuswaswana.

<sup>268</sup> Luzayikisu ya Munu, na nzila ya Mpeve-Santu, kele: Klisto mpe Mpeve-Santu kele Muntu mosi, kaka na nzutu yankaka. *Na yawu, awa* kele Klisto, Mwana-dimeme. Beto zaba ti Yandi vwandaka Mwana-dimeme. Yandi vwandaka ya kutelama *awa* na Babuku na diboko ya Yandi; mpe *kuna* ke basika munati-mpunda ya mpunda ya mpembe, beno me mona, na yina ya vwandaka ve Mpeve-Santu.

<sup>269</sup> Ntangu yayi, yayi kele mosi ya mansweki ya bilumbu ya nsuka, mutindu ti Klisto lenda vwanda bantu tatu kati na Mosi. Ya kele ve bantu tatu ya kuswaswana, Tata, Mwana, mpe Mpeve-Santu, na kuvwandaka Banzambi tatu, mutindu ba-trinitaire ke mekaka na kutuba na beto ti Yawu kele mutindu yina. Ya kele tatu, ya kele kumonisama tatu ya Muntu mosi. To, beno lenda bokila yawu bisalu tatu. Kana beno ke na kuzonza na balongi, beno ke sadila ve kisalu; samu ti, kieleka, mu me bakula ti, ba ke na kubakaka munu na bande. Na yawu mu ke tuba na beno . . . Samu, Klisto lendaka tuba ve, “Mu ke sambila kisalu ya Munu, mpe Yandi ke tinda beno kisalu yankaka.” Beto zaba yawu. Kasi kana beno zola kusala yawu . . . Ya kele bisalu tatu ya Nzambi mosi. Beno me mona? Ya kele ve Banzambi tatu. Bisalu tatu ya Nzambi mosi! Beno me mona?

<sup>270</sup> Mpe na yina wapi mutindu Klisto lendaka vwanda *kuna*, mpunda ya mpembe, lunungu, mpe kutelama *awa* na Buku na diboko ya Yandi? Ya ke Yandi ve, na mutindu yina. Ya kele ve Klisto.

<sup>271</sup> Beno tala ntangu yayi, Mpeve-Santu (na luzayikisu) mpe Klisto, ya kele, Mpeve-Santu kele Klisto na mutindu yankaka. Kieleka.

<sup>272</sup> Beno tala, ya kele Mwana-dimeme yina zibulaka Babuku, mpe Mwana-dimeme kele Klisto. Mpe Klisto ke monaka diaka ve, kubanda kuna, kasi Yandi me monana na Buku ya Apocalypse, kapu 19, ke kwisa na mpunda ya mpembe.

<sup>273</sup> Kana beno zola kutanga yawu, beto baka Apocalypse 19:11, kumi na sa- . . . Mpe beto tanga yawu kaka na nswalu ntangu yayi beto—na ntangu beto ke . . . Beto kele na ntangu mingi, mu banza, na yawu ya ke kumisa yawu mwa mbote mingi samu na beto. 19, 19:11, beto banda na nzila ya 11, mpe beto tanga yawu, kintwadi na 16.

*Mpe mu monaka mazulu zibukaka, . . . tala mpunda ya mpembe; (ve na zulu ya ntoto; na Mazulu, beno me mona) mpe yandi yina vwandaka ya kuvwanda na zulu ya yawu ba bokilaka yandi ya Kukwikama . . . Kieleka, . . . na ludedomo yandi ke fundisaka mpe ke salaka mwita.*

*Meso ya yandi vwandaka . . . mutindu baludimi ya tiya, mpe na zulu ya yintu ya yandi vwandaka na bayimpu mingi na yintu, (beno tala yimpu!); mpe nkumbu mosi vwandaka ya kusonama na yandi, mpe ata muntu mosi ve zabaka yawu, kasi . . . yandi mosi kaka.*

<sup>274</sup> Mu zola telema fioti na zulu ya yawu na mwa ntangu fioti. Oh, la la! Mu ke na dibanza ya mbote, kasi . . . Mu banza ti mu lenda, kana beno . . . [Dibuundu me tuba, “Kwenda na ntwala!”—Mu.]

275 Beno me mona, muntu mosi ve kuzaba Yawu. Beno me zabaka ntete ve ti Nkumbu ya *Yehowa* kele ya kusungama ve? Muntu nyonso zaba. Docteur Vayle, nge zaba ti ya kele kieleka. Mibangundi lenda ve kubangula Yawu. Mu ke tanguna Yawu J-u-h-v . . . J-v-h-u, mu zola tuba. Ya kele ve *Yehowa*. Ba lendaka ve kusimba Yawu. Bawu zaba ve yinki Yawu kele. Bawu bokilaka Yawu *Yehowa*, kasi ya vwandaka ve Nkumbu ya Yandi.

276 Beno tala, ntangu nionso ba vwandaka kuzwa lunungu, to kima mosi vwandaka salama, ba vwandaka soba nkumbu.

277 Beno tala na bilumbu ya Abraham. Yandi vwandaka, ntete, Abram, mpe yandi lendaka ve kuzwa bébé yina tii kuna nkumbu ya yandi sobaka na Abraham. Mpe Sarai, S-a-r-a-i, lendaka vwanda ve na kima mosi kasi kaka kivumu ya kufwa tii kuna nkumbu ya yandi sobaka na S-a-r-a.

278 *Jacob* zola kutuba “muyibi, muntu ya luvunu,” mpe yawu yina yandi zalaka. Yandi lwataka mpusu ya dimeme, mpe vunaka tata ya yandi ya profete, samu na kubaka bukuluntu. Yandi tulaka mavala ya peuplier na masa, samu ti yawu kuzwa batasi, ya vwandaka bangisa bitwisi na ntangu ba vwandaka na kivumu na . . . na bana ya bawu, samu na kubuta bitwisi mpe mameme ya batasi. Yandi vwandaka kaka muntu ya luvunu!

279 Kasi na mpimpa mosi yandi kangaka Kima mosi ya kieleka, mpe yandi zabaka ti Yawu vwandaka kieleka. Mpe yandi bikanaka na Yawu, mpe kangamaka na yawu tii ntangu yandi nungaka. Mpe nkumbu ya yandi sobaka, mpe ba bokilaka yandi *Israel*, yina zola kutuba “ntinu ya ngolo na ntuala ya Nzambi.”

280 Ya kele kieleka? Munungi nyonso!

281 Simon vwandaka mulobi mbisi. Kasi ntangu lukwikilu ya yandi simbaka mpe zabaka ti yina vwandaka Yesu, ntangu Yandi tubaka na yandi ti Yandi vwandaka Mesiya, mpe tubaka na yandi nani vwandaka nkumbu ya yandi mpe yina vwandaka nkumbu ya tata ya yandi, yandi nungaka, mpe sobaka Simon na Pierre.

282 Saul, nkumbu ya mbote. Saul, vwandaka ntinu kilumbu mosi na Israel, kasi yandi, *Saul*, lungaka ve kuvwanda ntumwa. Ya lendaka vwanda mbote mingi ntinu, kasi ntumwa ve. Na yina Yesu sobaka nkumbu ya yandi (na yinki?) na Saul na Paul.

Beno tala “Bana ya nzasi,” mpe nionso yina.

283 Mpe, Yesu, Nkumbu ya Yandi na zulu ya ntoto vwandaka “Mukudi,” Yesu. Ntangu Yandi vwandaka na zulu ya ntoto, Yandi vwandaka Mukudi, ya kele kieleka. Kasi ntangu Yandi nungaka lufwa mpe difelo, mpe nungaka bawu, mpe zangukaka na Zulu, Yandi kuzwaka Nkumbu ya malu-malu. Ya kele samu na yina beno ke bokaka mutindu bawu ke salaka, mpe bawu ke kuzwa kima mosi ve.

284 Ya ke monisama pwelele na Banzasi. Uh-huh. Beno me mona? Beno tala mansweki. Yandi ke kwisa, na zulu ya

mpunda. . . Ya fwana vwanda na Kima mosi samu na kusoba Dibuundu yayi. Beno zaba yawu. Ya fwana vwanda na Kima mosi. Beno tala, “Muntu mosi ve zabaka, kasi Yandi mosi.” Ntangu yayi, beno tala, “Muntu mosi ve zabaka, kasi Yandi mosi.”

*Mpe ba lwatisaka yandi bilele ya kupola na menga: mpe nkumbu ya yandi vwandaka Ndinga ya Nzambi.*

Oh, la la! Beno tala!

*Mpe makesa yina vwandaka na zulu vwandaka landa yandi na zulu ya bampunda ya mpembe, ya kulwata bilele ya lino, ya mpembe mpe ya bunkete.*

*Mpe na yinwa ya yandi ke basika mbele ya yinda, samu na kubula bayinsi: mpe yandi ke twadisa bawu na nkawa ya kisengo: mpe yandi ke kamuna mbungu ya vinu ya nganzi ya nene ya Nzambi ya Ngolo nionso.*

*Mpe yandi vwandaka na lele ya yandi mpe na zulu ya mupende ya yandi nkumbu ya kusonika, NTINU YA BANTINU, MPE MFUMU YA BAMFUMU.*

<sup>285</sup> Tala Mesiya ke kwisa. Yandi yina *kuna*; muntu yayi ve na zulu ya mpunda yayi *awa*. Beno tala mbote luswaswanu. Yandi yayi me telama na Buku na diboko ya Yandi, *awa*, kusalu ya mpulusu keke kaka. . . Yandi me baka ntete ve kisika ya Yandi. Na yina, ya vwandaka ve Klisto yina basikaka, Mpeve-Santu.

<sup>286</sup> Ve samu kukondwa kuwisana na babakala yayi ya nene. Ve, tata, mu ke sala yawu ve. Mu ke zola ve kusala yawu, kasi yayi keke yina—yina keke luzayikisu ya munu samu na Yawu. Beno me mona? Kana beno keke na kima ya kuswaswana, mbote, ya keke mbote mingi, kasi ya keke ve mbote mingi samu na munu. Beno me mona, mu—mu ke kwikila Yawu mutindu yayi. Beno me mona, ntangu yayi, beno zaba yinki. Beno me mona?

<sup>287</sup> Mpe, beno tala, Klisto me monana diaka ve, beno me mona, kubanda ntangu yina. Kasi Yandi keke na zulu ya mpunda ya mpembe. Na yina kana mwana-bakala yayi me mata na zulu ya mpunda ya mpembe, yandi keke kaka kumekula Klisto. Beno me mona? Beno me bakula yawu? [Dibuundu me tuba, “Amen.”—Mu.]

<sup>288</sup> Beno tala, munati-mpunda na zulu ya mpunda ya mpembe keke na nkumbu ve. Yandi lenda sadila bisalu zole to tatu, beno me mona, kasi yandi ke na nkumbu mosi ve.

<sup>289</sup> Kasi Klisto keke na Nkumbu! Yinki ya keke? Ndinga ya Nzambi. Yawu yina ya keke. “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi. Mpe Ndinga, kumaka nsuni.” Beno me mona? Munati-mpunda keke na nkumbu ve, kasi ba me bokila Klisto “Ndinga ya Nzambi.” Yawu yina Yandi keke. Ba me bokila Yandi mutindu yina. Ntangu yayi Yandi keke na Nkumbu yina

muntu mosi ve zaba; kasi ba ke bokila Yandi, “Ndinga ya Nzambi.”

Mwana-bakala yayi ba ke bokila yandi kima mosi ve, beno me mona, kasi yandi kele na zulu ya mpunda ya mpembe.

<sup>290</sup> Munati-mpunda ke na matolo-tolo ve samu na munani. Beno me bakula? Yandi vwandaka na munani, kasi ba me tuba kima mosi ve samu na matolo-tolo, na yina yandi fwana vwanza muntu ya luvunu. Kieleka. Mu banza ti ya kele na banzasi mingi, kasi bansemo ve. Kasi beno ke mona ti, Klisto vwandaka na nsemo mpe nzasi, samu na yinwa na Yandi basikaka Mbele yina kele na meno zole, mpe Yandi bulaka bayinsi na Yawu. Mwanabakala yayi lenda ve kubula kima mosi, beno me mona, kasi yandi ke na kubula kitini ya muntu ya luvunu. Yandi ke na kubasika, ya kumata na zulu ya mpunda ya mpembe, samu na kununga.

<sup>291</sup> Klisto kele na Mbele ya yinda, mpe, beno tala, Yawu ke basika na yinwa ya Yandi. Ndinga ya moyo, yina kele, Ndinga ya Nzambi yina me monisama na bisadi ya Yandi. Mutindu Yandi tubaka na Moise, “Kwenda, telema kuna, mpe tanda nkawa yina kuna; bokila banzini,” mpe banzini vwanza kuna. Kieleka. Yina yandi tubaka, Yandi salaka yawu; mpe ya salamaka, Ndinga ya Yandi ya moyo. Nzambi na Ndinga ya Yandi kele Muntu mosi. Nzambi kele Ndinga.

<sup>292</sup> Nani kele munati-nsangu yayi ya dibuundu ya ntete? Nani yandi kele? Beto banza na yawu. Nani kele munati-mpunda yayi ya mansweki yina ke banda mbangu ya yandi na nsungi ya ntete ya dibuundu mpe ke basika na Seko, ke kwenda na nsuka?

<sup>293</sup> Kidimbu ya Zole ke basika mpe ke kwenda tii na nsuka. Kidimbu ya Tatu ke basika mpe ke kwenda tii na nsuka. Ya Yiya, ya Tanu, ya Sambanu, ya Sambwadi, mosi na mosi ya yawu, ke kwenda tii na nsuka. Mpe na ntangu ya nsuka, Babuku yayi nionso vwanza ya kukanga bantangu nionso yayi, na mansweki yayi na kati ya yawu, Ya me zibuka. Na yina me basika mansweki, samu na kumona yinki ya kele. Kasi, kieleka, bawu bandaka na nsungi ya ntete ya dibuundu, samu dibuundu, nsungi ya ntete ya dibuundu, kuzwaka Nsangu mutindu Yayi.

<sup>294</sup> “Munati-mpunda ya mpembe basikaka.” Beno me mona? Nani yandi kele? Yandi ke na ngolo na ngolo ya yandi ya lunungu. Yandi kele muntu ya nene na ngolo ya yandi ya lunungu. Beno zola mu tuba na beno nani yandi kele? Yandi kele mbeni ya Klisto. Kieleka yina yandi kele. Ntangu yayi, na yina, beno me mona, kana yandi kele mbeni ya Klisto; Yesu tubaka, ti, “Bampeve nionso zole ke vwanza pene-pene mingi ti ya ke vuna bantu yina ba Soolaka (Kento ya makwela) kana ya lendaka salama.” Mbeni ya Klisto, ya kele mpeve ya mbeni ya Klisto.

<sup>295</sup> Beno bambuka moyo, na bansungi ya dibuundu, ntangu beto zibulaka nsungi ya dibuundu ya ntete kuna, beto monaka

ti Mpeve-Santu vwandaka telemina mwa kima mosi yina bawu bandaka na nsungi yina ya dibuundu, mpe yina ba bokilaka “bisalu ya ba-Nicolaïte.” Beno ke bambuka yawu? [Dibuundu me tuba, “Amen.”—Mu.] *Nikao* zola kutuba “kuyala.” *Laisme* zola kutuba “dibuundu,” bandimi. *Nicolaïsme*, “kuyala bandimi.” “Kukatula Mpeve-Santu na Dibuundu mpe kupesa Yawu nionso na muntu mosi ya santu. Bika yandi vwanda mfumu ya nionso yina.” Beno me longuka yawu, beno me mona, Nicolaïsme. Beno tala, Nicolaïsme vwandaka “nzonzolo mosi,” na kati ya dibuundu mosi. Ya kumaka “malongi,” na nsungi ya dibuundu yina me landa. Mpe na nsungi ya tatu ya dibuundu, ya vwandaka “ngolo,” mpe bawu vwandaka na Concil ya Nicée. Mpe ba salaka malongi ya dibuundu. Mpe yinki vwandaka dyambu ya ntete yina salamaka? Organisation basikaka na yawu! Ntangu yayi, ya kele kieleka?

<sup>296</sup> Beno tuba na munu kisika dibuundu ya ntete ya organisation katukaka. Na dibuundu ya Catholique ya Rome! Beno tuba na munu kana Apocalypse me tuba ve, na Buku ya Apocalypse 17, ti, “Yandi vwandaka kento ya kindumba, mpe bana ya yandi ya bakento vwandaka bakento ya kindumba.” Ya kele kima mutindu mosi yina salaka organisation na yandi, “bakento ya kindumba.” “Ba ke na kubaka busafu, mvindu ya kindumba ya bawu, samu na malongi.” “Ba ke longaka Malongi yina kele misiku ya bantu.” Beno tala.

<sup>297</sup> Beno tala, yandi ke kwenda samu na kununga. Beno tala, yandi vwandaka ve na yimpu. Munati-mpunda ya mpembe, mu ke na kuzonzila awa. Beno me mona? “Munani; mpe ba pesaka yandi yimpu, na ntwala.” Beno me mona? Yandi vwandaka ve na yimpu, na kubanda, kasi ba pesaka yandi yimpu. Beno tala, na manima ba pesaka yandi yimpu, yinga, tatu ya yawu, tatu na zulu ya mosi. Ya vwandaka bankama tatu ya bamvula na ntwala, na Concil ya Nicée. Ntangu yandi bandaka, mpeve ya Nicolaïsme, samu na kusala organisation na kati ya bantu. Mpe kuna ya landilaka, landilaka, landilaka, ya kumaka “nzonzolo mosi,” na manima ya kumaka “malongi.”

<sup>298</sup> Beno ke bambuka moyo, Klisto ntangu yandi tubaka na dibuundu, Yandi tubaka, “Nge ke yinaka bisalu ya Nicolaïte, bisalu yina mu ke yinaka, mpe.” Kumeka na kununga, kubaka Mpeve-Santu ti ya kele kaka na muntu mosi ya santu; yandi lenda lemvokila masumu nionso mpe nionso yina.

<sup>299</sup> Mpe beto me tanga yawu kuna, Paul me tubila yawu. Kivangu yina lendaka vwanda na bilumbu ya nsuka. Mpe yandi lendaka monisama ve tii na bilumbu ya nsuka. “Na yina, Yandi yina ke na kukanga, ke basisa Mpeve ya Nzambi kuna; mpe na manima yandi ke monana pwelele.”

<sup>300</sup> Bubuy yayi yandi me bumbama na mpunda ya mpembe. Beno tala mbote mutindu yandi me soba na mpunda yina ya mpembe,

na mwa minuti fioti. Yandi me kuma kaka ve mpunda ya mpembe; yandi me kuma kibulu na bayintu mingi mpe bibongo mingi. Beno me mona? Beno me mona? Mpunda ya mpembe, yandi kele muntu ya luvunu ntangu yayi, mpe ya kele samu na yina bantu me zaba yawu ve ntangu nionso yayi. Ba vwandaka banza yawu. Kasi yawu yayi ntangu yayi, ya ke monisama na Masonuku. Beno tala.

<sup>301</sup> Ntangu Nicolaïsme, beno me mona, mbeni ya Klisto, na nsuka-nsuka ya ke kota na kati ya muntu, na yina ba me byadisa yandi. Ntangu yandi ke banda, mutindu mpeve ya Nicolaïsme na kati ya dibuundu, yandi kele mpeve. Beno lenda ve kubyadisa mpeve mosi. Kasi bankama tatu ya bamvula na ntuala, yandi kumaka pape, mpe na yina ba byadisaka yandi. Yandi vwandaka ve na yimpu, na kubanda. Kasi yandi bakaka yimpu ya kimfumu, na manima, beno me mona, ntangu mpeve yina ke kota na kati ya muntu. Beno me mona? Yandi me kuma muntu. Malongi ya nicolaïte me kuma bakala, na yina ba lendaka byadisa yandi. Ba lendaka ve kusala yawu, samu ti, yandi vwandaka kaka malongi.

<sup>302</sup> Nkembo! Beno tala! Mpe ntangu Mpeve-Santu yayi yina beto me kuma nzutu samu na beto, Yandi yina kele na kati-kati ya beto ntangu yayi na mutindu ya Mpeve-Santu, ke kuma muntu samu na beto, na kati ya Muntu ya Yesu Klisto, beto ke byadisa Yandi Ntinu ya bantinu. Ya kieleka. Beno me mona?

<sup>303</sup> Ntangu yayi, beno bambuka moyo, ntangu Klisto kwisaka na Kiti ya kimfumu, mbeni ya Klisto kwisaka na kiti ya kimfumu, Judas. Na yina ntangu Klisto katukaka na ntoto, Judas katukaka na ntoto. Kaka na ntangu Mpeve-Santu me vutuka, mbeni ya Klisto me vutuka.

<sup>304</sup> Beno zaba, Jean tubaka awa, “Bana ya fioti, mu ke zola ve kubika beno kukondwa kuzaba diambu, beno zaba, samu na mbeni ya Klisto, na yina yandi me kwisa dezia mpe yandi ke na kusala na kati ya bana yina ke tumamaka ve.” Mbeni ya Klisto na ntangu yina, ya vwandaka kuna, yandi bandaka na kusala kuna na kati mpeve ya Nicolaïte, samu na kusala organisation.

<sup>305</sup> Kuyituka ve ti mu vwandaka yinaka kima yina! Beno me mona? Beno me mona? Yawu yina. Ya vwandaka munu ve; ya vwandaka Kima mosi na kati awa. Yawu yina ya vwandaka. Ya me monana pwelele. Beno me mona yawu? [Dibuundu me tuba, “Amen.”—Mu.] Mpe mu vwandaka baluka na nzunga. Mu vwandaka mona yawu ve tii ntangu yayi. Mpe mu zaba yawu ntangu yayi. Yawu yina ya kele. Mpeve ya Nicolaïte, yina Nzambi yinaka.

<sup>306</sup> Mpe ntangu yayi mpeve yina me kota na kati ya muntu, mpe ba me byadisa yawu. Mpe yawu yayi awa, yina Biblia ke tuba ti bawu ke sala na yawu. Ya kele ya kulunga. Oh, la la! Ya me kota na kati ya muntu! Yandi me kuma muntu, mpe na yina ba me byadisa yandi.



307 Beno tanga, beno tala! To, beno tanga, mu zola tuba, yina Daniel me tuba ti yandi ke baka luyalu ya kimfumu ya dibuundu. Beno zola kutanga yawu? [Dibuundu, “Amen.”—Mu.] Beto kele na ntangu ya kusala yawu, mutindu yina ve? [“Amen.”] Mbote mingi. Beno kuwa. Beto vutuka na Daniel, na mwa ntangu fioti. Beto vutuka na Buku ya Daniel, mpe beto ke tanga mwa ntangu fioti. Mpe beto ke vwanda diaka ve na minuti kumi na tanu, to makumi zole, to makumi tatu, to kima ya mutindu yina. Mbote mingi? [“Amen.”]

308 Beto baka Daniel, kapu 11, mpe beto baka nzila ya 21. Awa kele Daniel, Daniel ke na kutuba ntangu yayi wapi mutindu muntu yayi ke baka luyalu.

*Mpe muntu ya mpamba-mpamba ke telama na kisika ya yandi, (Rome, ya ke zonzila), na yina ba ke pesa ve buzitu ya kimfumu: (beno tala mbote ntangu yayi) kasi yandi kwisa na ngemba . . . ke kwisa na ngemba, mpe ke baka kuyalu ya kimfumu na kulebaka.*

309 Ya kieleka yawu yina ya me sala! Yawu yina Daniel me tuba ti mbeni yayi ya Klisto ke sala. Yandi ke lunga na yina bantu zola kuzwa na kisika. Yinga, ya ke lunga na mambu ya bawu—ya bawu ya bubu yayi, samu na mabuundu. Na yina, na nsungi ya dibuundu yayi, bawu zola Ndinga ve, Klisto, kasi bawu zola dibuundu. Kima ya ntete, ba ke yufula beno ve kana beno kele Muklisto. “Wapi dibuundu beno kele? Wapi dibuundu?” Bawu zola Klisto ve, Ndinga. Beno kwenda, tuba na bawu samu na Ndinga mpe wapi mutindu kuvwanda ya kusungama, bawu zola Yawu ve. Bawu zola kima mosi, kuzinga kaka mutindu bawu zola, mpe kuvwanda kaka na dibuundu mpe kuzwa kimbangi ya bawu. Beno me mona? Beno me mona? Na yawu, yandi me lunga kieleka na yina ba ke vingila. Mpe, beno bambuka moyo, na nsuka ba bokilaka yandi “kento,” na kati ya Biblia, mpe yandi vwandaka kento ya kindumba mpe yandi vwandaka na bana ya bakento. Ya me lunga kieleka na nsatu ya kilumbu, na yina bantu ke na kuingila. Yawu yina.

310 Nzambi silaka yawu. Ntangu ba me manga Ndinga, na yina ba ke baluka na bansatu ya bawu. Beto tanga diaka Thésaloniciens. Beto . . . Mu zola beno kutala mbote awa na mwa minuti fioti. Yinga, mbote, beto me tanga yawu, na mwa ntangu fioti me luta. Thésaloniciens ya Zole 2:9-11. Ya me tuba ti ba ke sala yawu. “Na kumangaka, na kulosaka Kieleka, ba ke pesa bawu dibanza ya kufundisa, mpe ke kwikila luvunu mpe ke kuzwa kitumbu na yawu.” Ntangu yayi ya kele yina—ya kele yina Mpeve-Santu me tuba.

311 Ntangu yayi, yina kele ve nsatu ya dibuundu bubu yayi? Beno ke meka na kutuba na bantu ti bawu fwana sala *yayi, yina, to yankaka*, mpe ba ke bika beno zaba kaka na nswalu nionso ti bawu kele Methodiste, Presbyterien, to nionso yankaka, bawu

“fwana mata ve na masuwa ya beno.” Beno me mona? Ya kieleka. Bawu zola yawu.

<sup>312</sup> Mpe Nzambi tubaka, “Kana bawu zola yawu, Mu ke bika bawu kuzwa yawu. Mpe kieleka Mu ke sala bawu kukwikila ti ya kele Kieleka, samu ti Mu ke pesa bawu dibanza ya kufundisa landila Kieleka.” Ntangu yayi beno tala awa yina Biblia ke tuba, mpe, “Mutindu Jannès na Jamburès kuteleminaka Moïse, mutindu mosi bantu yayi na bilumbu ya nsuka, na dibanza ya kufundisa Kieleka ke sala; mpe ke soba lemvo ya Nzambi ya beto na kukondwa luzitu, ba ke manga Mfumu Nzambi.”

<sup>313</sup> Ntangu yayi beno ke mona kisika ya kele; Katolika kaka ve, kasi Protestant. Ya kele nionso. Ya kele yinza ya muvimba ba me bongisa nionso. Ya kele munati-mpunda ya mpembe, na nsi ya—ya na ngaanda ya (mpembe) ludedomo, dibuundu, beno me mona, kasi mbeni ya Klisto. Ya fwana vwanda mutindu mosi. Na zulu ya mpunda, mpe, kaka mutindu Klisto ke na kwisa na zulu ya mpunda. Beno me mona? Oh, mbeni, ya ke vwanda pene-pene mingi ti ya lenda vuna Musolami! Mpe yandi yayi awa. Yandi kele mbeni ya Klisto.

<sup>314</sup> Yandi bandaka na kutambula na kati ya nsungi ya ntete ya dibuundu. Ntangu yayi yandi ke na kulandila, ke na kulandila na kati ya bansungi nionso. Ntangu yayi beno tala yandi. Beno ke tuba, “Na ntangu yina, na ntangu yina ya bantumwa?” Ba vwandaka bokila yandi “Nicolaïsme” na ntangu yina. Na yina, na nsungi ya dibuundu yina me landa, na manima yandi me kuma “malongi” na kati ya dibuundu. Ntete, yandi vwandaka kaka “nzonzolo,” na manima yandi me kuma “malongi.”

<sup>315</sup> Bantu ya bunkete, ya lukumu, ya kulwata mbote, yina me longukaka mingi, ya kulengula, vwandaka zola ve kuzatuka nionso yina na kati ya dibuundu. Ve, bawu, “Bawu zolaka ve bima nionso ya Mpeve-Santu. Ya fwana vwanda dibuundu! Mpe beto nyonso ke kwenda na Concile ya Nicée, mpe nyonso, na Rome.” Ntangu ba kwendaka kuna, bawu bakaka dibuundu, mpe ba bakaka bumpani, Bukatolika ya Ro-. . .to bumpani, bumpani ya Rome, mpe mwa balukwikilu ya luvunu. Mpe ba bakaka Astarté, “ntinu ya kento ya mazulu,” mpe me soba yawu na kuvwanda Marie, mama. Ba me tula bantu ya kufwa mutindu misambidi, mpe nionso yina. Mpe ba me baka hostie yayi ya ronde ya kascher, yina kele diaka ya kutula kuna ya ronde, mpe ba ke bokila yawu nzutu ya Klisto, “samu ya ke talisa mama ya mazulu.” Mpe ntangu muntu ya Katolika ke luta kuna, mpe yandi ke sala kidimbu ya kulunsi. Samu ti, bansemo yina ke pela na kati kuna, fwana vwanda dimpa yayi kascher yina ke kuma Nzambi, na nzila ya ngolo ya nganga-Nzambi. Kasi, ya kele kaka bumpani ya pwelele. Beno me mona? Ya kieleka.

316 Mu ke na kubakula kaka ve. Mbote, yinga, mu zaba. Yinga, mu zaba yawu. Yinga, tata! Mu me bakula yawu, na lemvo ya Nzambi. Ya kieleka.

317 Ntangu yayi beno tala. Oh, la la, wapi mutindu bawu lenda sala yawu! Beno me mona? Mpe ba me pesa bawu bansatu ya bawu. Ve, ya kieleka, beno fwana ve kusala Yawu. Ve, tata. Kana beno zola sala Yawu ve, ba me tinda beno ve na ngolo na kusala Yawu. Kana beno zola ve kuvwanda mutindu Nzambi ke lomba na kuzinga mpe nionso yina, mpe kusambila, beno fwana ve kusala Yawu. Nzambi ke pusaka muntu mosi ve na kusala Yawu.

318 Kasi bika mu tuba na beno kima mosi. Kana ba tulaka nkumbu ya beno na Buku ya Luzingu ya Mwana-dimeme na ntwala ya mbandukulu ya yinza, beno ke vwanda na kiese mingi na kusala Yawu, beno ke vingila ve muniti mosi samu na kusala Yawu.

319 Beno tala awa. Beno ke tuba, “Beno zaba yawu, mu kele musambidi mutindu beno!” Mbote, yina lendaka vwanda kieleka.

320 Beno tala, nani lendaka tuba ti banganga-Nzambi yayi vwandaka ve misambidi, na bilumbu ya Mfumu Yesu? Nani lendaka tuba ti Israel vwandaka ve musambidi, na ntoto ya kuyuma? Na yina bawu vwandaka mpe. . .

“Mbote, Nzambi me sakumuna munu bambala mingi!”

321 Yinga, Yandi sakumunaka bawu, mpe. Ba zolaka sala ata fioti ve kisalu samu na luzingu ya bawu. Yandi vwandaka kudisa bawu na mazulu. Mpe Yesu tubaka, “Bawu nionso me kufwaka, me zimbana mpe me kufwaka.”

322 “Batata ya beto,” bawu tubaka, “kudiaka mana na ntoto ya kuyuma, bamvula makumi yiya.”

323 Yesu tubaka, “Mpe bawu nionso, me kufwaka, me kabwana Kukonda nsuka.” Beno me mona? Yandi tubaka, “Kasi mu kele Dimpa ya Luzingu yina me katuka na Nzambi kuna na Mazulu. Muntu ke kudya Dimpa yayi, yandi ke kufwa ata fioti ve.” Beno me mona? Yandi kele Yinti ya Luzingu.

324 Beno tala kaka mutindu mpe ntangu Yesu kwisaka. Banganga-Nzambi yina, bawu kwisaka kuna, misambidi ya kieleka. Oh, muntu ve lendaka tuba ti bawu vwandaka ve bantu ya mbote. Oh! Bawu vwandaka landa musiku mbote-mbote. Konso kima yina dibuundu vwandaka tuba, bawu vwandaka sala yawu. Kana bawu me sala yawu ve, bawu vwandaka losa bawu matadi. Mpe na yawu Yandi kwendaka kuna. . . Beno zaba yina Yesu bokilaka bawu? Jean bokilaka bawu, “Beni nkonga ya banioka na kati ya matiti! Beno banza ve, samu ti beno kele ya organisation yina, beno kele na kima ya kusala na Nzambi.” Mpe Yesu tubaka, “Beni kele ya tata ya beno, dyabulu.” Yandi tubaka, “Ntangu nyonso yina Nzambi fidisaka profete, yinki

salamaka? Beno losaka yandi matadi mpe losaka yandi na ntoni. Mpe ntangu yayi beno ke kwenda kuna mpe beno ke lengula ntoni ya yandi.”

325 Ya kele ve kima mutindu yina dibuundu ya Katolika me sala? Beno tala Jeanne d’Arc, mpe Santu Patrick, mpe bayankaka nionso. Bawu kele bayina ke tulaka bawu kuna. Mpe na manima ba me timuna nzutu ya Jeanne d’Arc, mpe me losa yawu na nzadi, mwa bamvula nkama na ntwala. Mpe ba yokaka yandi ti yandi vwandaka ndoki.

326 “Nge kele ya tata ya beno, dyabulu, mpe bisalu ya yandi beno ke salaka.” Ya kieleka. Yayi ke kwenda na yinza ya muvimba. Beno me mona? Ya kieleka! Yawu yina Yesu tubaka.

327 Mpe beno ke banza ti ya kele mbote mingi, ya ke monana mbote na kutala, yina kele mpunda ya mpembe. Kasi beno tala yina beno me kuzwa. Yandi yina ke na kumata yawu. Ntangu yayi, kasi Yandi tubaka ti bawu vwandaka zola yawu, na yawu Yandi pesaka bawu ke pesa bawu ngolo ya luvunu.

328 Beno bambuka moyo, kento yayi ya kindumba ya Apocalypse 17, yandi vwandaka mansweki, “MANSWEKI, BABYLONE, MAMA YA BAKENTO YA KINDUMBA.” Mpe Jean sepelaka mingi na yandi. Kaka mutindu muntu yayi . . . Beno tala, beno vingila, beto kuma kuna mpe beto tala mpunda yayi awa. Beno me mona? Kasi beno me mona ti ya vwandaka . . . Yinki salamaka vwandaka yayi, ti, “Yandi sepelaka mingi na yandi.” Kasi mansweki vwandaka, ti, “yandi kunwaka menga ya bambangi ya Klisto.” Dibuundu ya kitoko ya kuvwanda kuna, yina me lwata pulupe mpe wolo, “Mpe yandi vwandaka na mbungu ya vinu na diboko ya yandi, ya mvindu ya kindumba ya yandi.”

329 Yinki kele kindumba? Ya kele luzingu ya mvindu. Yina kele malongi ya yandi yina yandi vwandaka mwangisa. Ya vwandaka baka Ndinga ya Nzambi mpe kusala Yawu kukondwa kisalu, na nzila ya “Mbote na nge Marie,” mpe bima yankaka yayi, ya vwandaka mwangisa. “Mpe bantinu ya ntoto me sala kindumba na yandi.”

“Mbote,” beno ke tuba, “yina kele dibuundu ya Katolika.”

330 Kasi yandi vwandaka “mama ya bakento ya kindumba,” beno me mona, kima ya mutindu mosi yina yandi vwandaka. Yawu yina.

331 Yinki salamaka? Na ntangu reformateur kufwaka mpe nsangu ya yandi me kufwa, beno me sa- . . . Beno salaka yawu organisation, mpe beno tulaka nkonga ya “ba-Ricky” na kati kuna, mpe beno me vutuka mbala mosi na mutindu ya luzingu yina beno zolaka zinga. Beno zolaka ve kukangama na Ndinga. Na kisika ya kukwenda na ntwala na Ndinga, ba vwandaka kaka kuna, “Yawu fwana vwanda mutindu *Yayi*.” Huh! Beno fwana sala yawu ve.

Ya fwana vwanda, Yandi, beno me mona, Yandi na Zulu!

332 Beno tala, ya kele kima mosi. Beto zola baka mwa bisika zole dyaka na ntuala beto sukisa.

333 Yandi kele ntinu yina zolaka bebisa; bantu ya Daniel. Beno ke kwikila yawu? Ntangu yayi mu ke sala yayi, kana beno zola kusadisa munu mpe kukanga ntima samu na munu na mwa bamuniti fioti, Mu ke—mu ke sala yawu kaka na nswalu nionso. Kasi mu zola talisa yawu mbote-mbote, samu ti mu. . . Mpeve-Santu me pesa munu Yawu, kaka mutindu mu kele ya kutelama awa. Beno me mona? Beno me mona?

334 Ntangu yayi beno tala, beto vutuka diaka na Daniel, na mwa ntangu fioti. Mu zola tanga kima mosi samu na beno, yina. . . Kana beno vutukila yawu ve, ya ke mbote mingi. Mu zola tanga Daniel 9, Daniel 9. Mpe mu zola tanga nzila ya 26 mpe nzila ya 27 ya Daniel 9. Mpe, beno tala, kana yandi kele ve yina ke bebisa bantu ya Daniel, yawu yina yandi ke sala.

*Mpe na manima ya basabala makumi sambanu na zole ba ke katula Mesiya, . . .*

335 Beno me mona, ya kele na basabala makumi sambanu na zole ba ke katula Yandi, na basabala makumi sambwadi.

*. . . samu na yandi mosi ve: kasi samu na bantu mpe ntinu (yina kele bukuluntu) yina ke kwisa (yina ke kwisa) ke bebisa mbanza mpe. . . kivinga ya santu; mpe nsuka ya yawu ke vwanda kwisa na kufulukuka ya masa ya nene, mpe ba me tuba ti kubeba ke vwanda tii na nsuka ya mvita.*

336 Mu zola kuyufula beno bantu kima mosi. Na manima ba me katula Klisto na zulu ya ntoto, na kati ya bamvula tatu na ndambu ya ministere ya Yandi, mpe yinki bebisaka tempelo? Nani bebisaka yawu? Rome! Kieleka. Constantin to, ve, beno lemvokila munu, Titus, mfumu ya basoda ya Rome, yandi bebisaka ntinu. Beno tala ntangu yayi.

Beno tala mbote yayi, bampangi. Ya kulumukaka kuna, kibaka yayi.

337 Ntangu Yesu butukaka, dalango ya mbwaki na mazulu kutelamaka pene-pene ya kento, samu na kufwa Mwana ya yandi ntangu Yandi butukaka. Ya kieleka? Nani ya vwandaka, mekaka na kudya Mwana ntangu Yandi butukaka? Rome. Beno me mona? Beno tala dalango ya mbwaki. Beno tala ntinu ya beno. Beno tala kibulu ya beno. Beno me mona? Bawu yina, bawu nionso, kaka mutindu mosi, beno me mona, “kufwa Mwana.” Nzambi zangulaka Yandi na Mazulu mpe vwandaka na zulu ya Kiti ya Yandi ya kimfumu. Ya kele kisika yina Klisto kele ntangu yayi tii ntangu yina ba kubikaka. Beno me mona? Ntangu yayi, beno tala mbote yinki yandi ke sala.

338 Ntangu yayi, oh, ntangu yayi, mu ke kwikila ti mu vwandaka tuba yawu na muntu mosi awa. Ya lendaka vwanda Mpangi Roberson bubu yayi, to muntu mosi yina mu vwandaka tuba, na zulu ya yawu; samu na yayi awa ve, kasi kaka samu na kima ya mutindu mosi. Mu ke kwikila ti mu longaka yawu awa, ntama mingi ve, yina ke salama na Etats-Unis yayi, samu na diambu yayi ya mbongo. Beno me mona? Mbote, beto ke na kufutaka ntangu yayi bamfuka ya beto na zulu ya bampaku yina ba ke baka na manima ya bamvula makumi yiya. Beno tala wapi mutindu beto kele na mfuka. Beno me zibulaka ntete KAIR kuna, to Lifeline, mpe beno kuwa yawu, beno me mona, kuna na Washington? Na yina, beto kele ya muvimba maboko ya mpamba. Yimeni.

339 Yinki kele dyambu? Wolo nyonso kele ya kubumba, mpe ya kele ba-Juif me simba mikanda. Ya ke vwanda Rome. Ntangu yayi beno tala mbote. Beto zaba nani kele na bamagazini ya nene, kasi ya kele Rome kele na kitini ya kulutula nene ya bumvwama ya yinza. Yina me bikana na yawu, ba-Juif kele na yawu. Ntangu yayi beno tala mbote yayi. Ntangu yayi beno kuwa yayi, mutindu Mpeve-Santu me talisa yayi na munu.

*Mpe yandi ke sala ngwisani ya ngolo na bantu mingi na sabala mosi: (ntangu yayi beno tala mbote) mpe na kati-kati ya sabala yandi ke sukisa munkayulu mpe makabu, . . .samu busafu ya kulutula yimbi yandi ke sala yawu kiadi, ata mpe samu na kubeba, mpe yina ba zabisaka kutiamuka na zulu ya kisafudi-kimwangisi.*

340 Beno tala! Oh, wapi mutindu yandi kele na mayele ya yimbi! Yandi yayi awa. Ntangu yayi, beto ke na kizizi ya beto mpe beto zaba ti yandi kele Rome. Beto zaba ti yandi kele munati-mpunda ya mpembe. Beto zaba ti yandi basikaka mutindu malongi. Mpe na yina yinki vwandaka Rome ya bumpani? Yina me soba na Rome ya pape, mpe ba me byadisa yawu.

341 Ntangu yayi beno tala mbote, “Na ntangu ya nsuka.” Ve na bilumbu ya ntete ntangu Klisto vwandaka longa, kasi, “na ntangu ya nsuka,” kitini ya nsuka ya sabala, kisika beto me baka basabala makumi sambwadi ya Daniel. Mpe Klisto pesaka profesi samu na bamvula tatu na ndambu, mpe bamvula tatu na ndambu me bikana diaka. Ya kieleka? Mpe ntinu yayi na ntangu yina ke sala ngwisani na bantu ya Daniel, yina kele ba-Juif.

Ya kele ntangu ba me zangula Kento ya makwela. Yandi ke mona yawu ve.

342 Beno tala, na ndambu ya sabala ya nsuka ya Daniel, bantu ke sala ngwisani. Ntinu yayi ke sala ngwisani na Rome, ke sala ngwisani na bawu, kukondwa ntembe samu na bumvwama, samu Bakatolika mpe ba-Juif me simba bumvwama ya yinza.

343 Mu kwendaka na Vatican. Mu monaka bayimpu tatu. Ba zolaka yamba munu na pape samu na kusolula; Baron von

Blomberg mu kuzwaka yawu samu na munu, na . . . na Kilumbu ya tatu na manima ya midi na ngunga ya tatu.

344 Mpe ntangu ba nataka munu na ntinu, bawu zibulaka ba-revers ya pantalon ya munu. Ya kele mbote mingi. Yandi tubaka na munu ti mu lendaka ata fioti ve kubalula mukongo ya munu, ntangu mu ke bika yandi. Yinga.

Kasi mu tubaka, “Yinki mu fwana sala na ntwala ya muntu yayi?”

345 Ba tubaka, “Mbote, nge fwana kwenda fukama kaka kuna na ntwala ya yandi mpe kubezé musapi ya yandi.”

346 Mu tubaka, “Ata fioti ve. Ata fioti ve. Ve, tata.” Mu tubaka, “Mu ke—mu ke bokila muntu nionso ‘mpangi-bakala’ yina nionso ke zola kuvwanda ‘mpangi ya bakala.’ Mu ke bokila yandi ‘révérend,’ kana yandi zola ba bokila yandi mutindu yina. Kasi, samu na kusambila muntu mosi, yina nionso kele ya Yesu Klisto.” Beno me mona? Ve. Ve, tata. Kubezé diboko ya muntu mutindu yina. Ve, ata fioti ve. Na yawu, mu salaka yawu ve.

347 Kasi mu tambulaka na Vatican nyonso. Oh, beno lenda ve kusumba yawu na bankama ya mafuku na mafuku ya ba-dollar. Mbote, beno lenda . . . Mpe beno banza kaka, “Bumvwama ya yinza,” Biblia me tuba, “ba kuzwaka yawu na kati ya yandi.” Oh, beno banza kaka na bisika ya nene, bambala mafuku . . .

348 Samu na yinki communisme me telema kuna na Russie? Ya ke pesaka munu kimbevo na kifundu, samu na kuwa milongi mingi kungana samu na communisme, mpe bawu zaba ve yina bawu ke na kutuba. Ya kele kieleka. Communisme ke na diambu mosi ve. Ya ke kisalulu na diboko ya Nzambi, samu na kunata nganzi na zulu ya ntoto, samu na menga ya basantu. Ya kieleka.

349 Mpe na manima ba me zangula Dibuundu, Rome mpe—mpe ba-Juif ke sala ngwisani na mosi na yankaka. Biblia me tuba ti bawu ke sala yawu, na bantu ya santu. Mpe ntangu yayi beno tala, ba ke sala yawu samu (samu na yinki?) yinsi yayi ke zola kubwa. Mpe bantu yankaka ya yinza yina ke tulaka munkiti ya bawu na zulu ya kitesilu ya wolo kele mpe ya kubwa. Beno zaba yawu. Kana beto ke na kuzinga na zulu ya bampaku, yina ba ke baka, na manima bamvula makumi yiya, wapi kisika beto kele?

350 Ya kele kaka na kima mosi yina lenda salama, ya kele, kukanga mbongo mpe kufuta bakitansi. Mpe beto lenda ve kusala yawu. Ya kele Wall Street, mpe Wall Street me twadisama na ba-Juif. Yina me bikana kele na Vatican. Mpe ba-Juif kele na yina me bikana na Wall Street, na munkiti ya yinza. Beto lenda ve kukanga yawu.

351 Mpe kana bawu lendaka sala yawu, beno banza . . . Bantu yayi ya wiski mpe—mpe bantu yayi nionso ya tabaka, yina kele, na mafunda ya mafunda ya ba-dollar konso mvula, mpe yina ke basika na bampaku ya bawu na kusalaka ba-film ya buzoba mpe

bima ya mutindu yina. Mpe ba ke kwenda kuna na Arizona, mpe ke sumba mafuku ya ba-hectare ya ntoto, to bamafunda, mpe ke timuna mabulu ya nene ya masa, na mafunda ya ba-dollars, mpe ke futa yawu na bampaku ya bawu. Mpe ba ke tula beno na boloko kana beno futa ve ya beno. Kasi bawu ke basisa yawu kaka, mpe ba ke timuna mabulu ya masa, mpe ba ke tinda ba-bulldozers kuna. Mpe yinki bawu ke sala? Ba ke sala bamanaka ya lutungu ya bayinzo, na nsuka ya ntangu yina ke landa, na mbongo yina ba me sala. Bawu fwana kubumba mbongo. Mpe ba ke tunga bayinzo, bamanaka, na kati kuna, mpe ba ke teka yawu na mafuku ya ba-dollars. Beno banza ti bantu yina ke wisana, samu na kusoba mbongo?

<sup>352</sup> Mutindu bakala yayi awa na... Nani kele nkumbu ya yandi? Castro salaka yawu. Yandi salaka kima mosi ya kulutila mayele yina yandi lendaka sala, na yina, ntangu yandi bebisaka bakitansi, yandi vutulaka yawu mpe bebisaka yawu.

<sup>353</sup> Beno tala, kasi beto lenda sala yawu ve. Bantu yayi ke bika yawu ve. Bantu ya minkiti ya ntoto me simba nionso yina.

<sup>354</sup> Na yina ya kele kaka na kima mosi ya kusala. Dibundu ya Katolika lenda kufuta yawu. Yandi kele mosi yina kaka kele na mbongo. Mpe yandi lenda sala yawu, mpe yandi ke sala yawu. Mpe na kusalaka yayi, samu na kusala yawu, yandi ke wisana na ba-Juif, samu na kusala ngwisani. Mpe ntangu yandi ke sala ngwisani yayi na ba-Juif... Ntangu yayi, beno bambuka moyo, mu ke na kubaka yayi na Masonuku. Mpe ntangu yayi, ntangu yandi ke sala yayi, mpe ke sala ngwisani yayi, beto me mona, na Daniel 8:23 mpe 25, "yandi ke tomisa bisalu," mpe ya kele *ba-industrie*, "na diboko ya yandi." Mpe yandi ke sala ngwisani yayi na ba-Juif.

<sup>355</sup> Mpe, na kati-kati ya yayi, bamvula tatu na ndambu, yandi ke zenga ngwisani ya yandi, kaka na ntangu yandi me kuzwa yawu, mpe yandi me kanga mbongo ya ba-Juif. Mpe ntangu yandi ke sala yawu... Oh, la la! Oh, la la!

<sup>356</sup> Ba ke bokila yandi mbeni ya Klisto tii na nsuka ya nsungi ya dibundu, samu ti yandi kele... yandi na bana ya yandi ke teleminaka Klisto mpe Ndinga. Muntu yayi ba ke bokilaka yandi mbeni ya Klisto.

<sup>357</sup> Ntangu yayi, yandi ke baka mbongo nionso. Mpe ya kele na ntangu yina mu banza ti ya ke kotisa yawu. Beno vingila fioti, mu ke tuba yayi, na manima mu ke vutuka na yawu na mwa ntangu fioti.

<sup>358</sup> Ba me bokila yandi mbeni ya Klisto, mpe ba ke bokila yandi mbeni ya Klisto, na meso ya Nzambi, tii na ntangu ya nsuka. Ntangu yayi, kasi na ntangu yina ba ke bokila yandi kima yankaka.

<sup>359</sup> Ntangu yayi, ntangu yandi ke baka mbongo nionso na nsi ya luyalu ya yandi, "Na yina yandi ke zenga ngwisani yayi na



ba-Juif,” mutindu Daniel awa me tuba ti yandi ke sala yawu, “na kati-kati ya basabala makumi sambwadi,” ya Daniel. Mpe na yina, mpangi, yinki yandi ke sala? Yandi ke kuzwa munkiti nionso ya yinza mpe munkiti nionso, yandi ke sala ngwisani na yinza, samu ti yandi ke simba bumvwama ya yinza, ya muvimba. Mpe na ntangu yina, ba profete yayi zole ke kota na kisalu mpe ke bokila nkama yina na makumi yiya na yiya ya mafunda. Na manima yinki ke salama? Na yina kidimbu ya kibulu, ya Apocalypse 13, ke kota, samu ti yandi ke na munkiti nyonso, ke mumbongo, mpe nyonso ya yinza. Mpe yinki ke salama na ntangu yina? Kidimbu ya kibulu ke kota, ti, “Muntu mosi ve lenda sumba to kuteka, kukondwa yandi kuzwa kidimbu ya kibulu.”

<sup>360</sup> Matondo na Nzambi, Dibuundu ke sepela na bamvula tatu na ndambu ya nene na Nkembo, yandi ke luta ve na kati ya yawu.

<sup>361</sup> Ntangu yayi beno tala, na ntangu ya nsuka, na nsuka ya bansungi ya dibuundu ntangu yayi, ba me bokila yandi . . . Yandi na bana ya yandi ba me bokila bawu mbeni ya Klisto, samu konso kima yina ke telemina Klisto kele mbeni ya Klisto. Mpe konso kima yina ke telemina Ndinga ke telemina Klisto, samu Klisto kele Ndinga. Ntangu yayi yandi kele mbeni ya Klisto.

<sup>362</sup> Na yina, na Apocalypse 12:7-9, ntangu ba me basisa Satana, mufundi. Beno sonika yawu, samu ti mu zola beno kutanga yawu. Beto ke na ntangu ve na ntangu yayi; ya me kuma pene-pene, ya kele ngunga ya yivwa na minuti makumi yiya to makumi yiya na tanu, beno me mona. Kasi na Apocalypse 12:7-9, “Satana,” mpeve, “diabulu,” yina kele kuna na zulu na ntangu yayi, “mufundi ya bampangi ya beto.” Mbote mingi.

<sup>363</sup> Dibuundu me zanguka, mpe ba me basisa Satana. Ntangu Dibuundu ke mata, Satana ke kulumuka, na manima Satana ke kota na kati ya mbeni ya Klisto mpe ba ke bokila yandi “kibulu.” Na yina, Apocalypse 13, yandi ke tula kidimbu. Beno me mona?

<sup>364</sup> “Ntangu Yandi yina ke na kukangaka,” kaka ntangu yayi, Buklisto me bikana na zulu ya ntoto na kuvedila ya yawu, ya kele samu ti, “Yandi yina ke na kukangaka.”

<sup>365</sup> Beno bambuka moyo awa na Théssaloniens, “Yandi kele ya kuvwanda na kati ya tempelo ya Nzambi, ke kukibokila yandi mosi Nzambi, na kulemvokilaka masumu na zulu ya ntoto.” Mpe yina ke landila, “mpe disumu ya nkú ke fuluka,” mpe nionso yina. Samu ti, ba ke zaba yawu ve, ntete, tii ntangu ya yandi ya kumonisama ke monana.

<sup>366</sup> Mpe na yina Dibuundu ke mata. Mpe ntangu ba me kanga Yandi, na yina yandi ke soba yandi mosi na mbeni ya Klisto ntangu yayi, oh, la la, “dibuundu, dibuundu ya nene mpe yina,” ntangu yayi yandi me kuma “kibulu.” Uh-huh! Mu ke zola kunata bantu na kumona yawu.

<sup>367</sup> Ntangu yayi beno bambuka moyo, mbeni ya Klisto na kibulu kele mpeve mosi kaka. Butatu yawu yina. Yinga, tata. Ya kele

na bitezo tatu ya ngolo mosi ya diabulu. Beno bambuka moyo, ba-Nicolaisme, beno me mona, ya zolaka kota na kati ya nzutu na ntwala ba byadisa yawu. Beno me mona? Ntangu yayi beno tala mbote yayi, bitezo tatu. Kitezo ya ntete, ba ke bokila yandi mbeni ya Klisto; na kitezo ya zole, ba me bokila yandi profete ya luvunu; na kitezo ya tatu, ba me bokila yandi kibulu.

<sup>368</sup> Beno tala, Nicolaïsme, mbeni ya Klisto bandaka na bilumbu ya Paul, na kuteleminaka Ndinga ya Nzambi, mbeni ya Klisto.

<sup>369</sup> Na yina ba ke bokila yandi, diaka, profete ya luvunu. Na yina, ntangu malongi kumaka muntu, yandi vwandaka profete samu na malongi ya bukuluntu, ya bukuluntu ya dibuundu ya Katolika. Pape vwandaka profete samu na ndinga ya luvunu, mpe yina salaka yandi profete ya luvunu.

<sup>370</sup> Kitezo ya tatu kele kibulu, muntu yina ba me byadisa na bilumbu ya nsuka, na ngolo nyonso yina Rome ya bumpani vwandaka kuzwaka ntete. Samu ti, kibulu na bayintu sambwadi, dalango, ba basisaka yandi na mazulu, mpe kotaka na kati ya nzutu ya profete ya luvunu. Yawu yina, yandi vwandaka na bayimpu sambwadi, mpe ba losaka yandi na ntoto mpe na mubu. Mbote mingi.

<sup>371</sup> Yinki beto ke na kutubaka? Nani kele munati-mpunda yayi, munati-mpunda yayi? Beno zaba nani ya kele? Ya kele muntu ya nene ya Satana.

<sup>372</sup> Mu kwendaka na nkokila yina, na bampangi zole ya babakala yina kele ya kuvwanda na yinzo-Nzambi yayi na ntangu yayi, Mpangi Norman, kuna na manima, mpe, mu ke kwikila, mpe Mpangi Fred, beto vwandaka kuna na kuwa muntu kulonga na zulu ya mbeni ya Klisto. Muntu yina me zabana mbote-mbote, mosi ya ba-Assemblée ya Nzambi ya kulutila mbote, mpe ntendulu ya yandi ya mbeni ya Klisto vwandaka, ti, “Bawu ke basisa vitamine mosi, na—na muntu mosi, mpe nataka luzingu ya bakala yayi na kiteki yayi ya nene yina ba ke tula . . . yina ke luta kinkuku ya bayinzo na ntangu mosi. Mpe ya ke . . .” Beno lenda banza ti muntu mosi ya kufuluka na Mpeve-Santu, to yina ke tuba ti yandi kele, kuvwanda na nsi ya mabanza ya mutindu yina?

<sup>373</sup> Ntangu, awa Biblia, ke tuba nani mbeni ya Klisto kele. Ya kele ve . . . Ya kele muntu. Beno tala, munati-mpunda yayi kele kima ve kasi muntu ya nene ya Satana, diabulu yina me kota na kati ya muntu. Yandi kele muntu ya mayele mingi. Ntangu yayi, mu banza ti beno me zibula makutu ya beno. Ba me meka mosi ya bana ya yandi kuna, ntama mingi ve, na television, samu na kutala kana yandi vwandaka ve ya kulutila mayela na muntu yina me landa, samu na kuvwanda Mfumu ya yinsi. Beno me mona? Kasi, na yina, yandi kele na ndwenga mingi; mutindu mosi na Satana. Yandi ke meka na kutekisa yawu. Yandi tekisaka yawu na Eve. Yandi me tekisa yawu na beto. Beto zolaka muntu

ya nene. Beto me kuzwa yawu. Mbote mingi. Yinza ya muvimba ke na nsatu ya muntu ya nene. Bawu ke kuzwa yawu. Beno vingila kaka Dibuundu kumata, mpe ba ke losa Satana; yandi ke kota na kati ya muntu. Ya kieleka. Ba ke zola muntu yina lenda sala kieleka kosalu. Yandi ke sala yawu.

<sup>374</sup> Ya kulonguka! Yayi kele. . . muntu ya nene ya Satana, na malongi, na ndwenga, na théologie ya dibuundu ya bampova ya yandi mosi, yina yandi mosi me sala. Mpe yandi ke mata mpunda ya yandi ya mpembe ya denomination, samu na kuvuna bantu. Mpe yandi ke nunga nsambulu nionso ya yinza, samu bawu nionso ke kota na kimvuka ya—ya. . .yamabuundu, mpe kimvuka ya yinza ya mabuundu. Mpe bawu kele na bivinga ya bawu ya kutunga, mpe bima nionso ya kusungama mbote-mbote. Ya ke na kima mosi ve me bikana. Ba-denomination nionso kele ya kukangama na yawu, kimvuka ya mabuundu. Mpe yinki kele na manima ya yawu? Rome. Mpe pape kele ntangu yayi na kuboka, “Beto nionso kele mosi. Beto vukana kintwadi mpe beto tambula kintwadi.”

<sup>375</sup> Mpe bantu yayi, mpe bayankaka na kati ya beno kele bantu ya Nsangu ya mbote ya Muvimba, beno ke manga, beno fwana manga malongi ya beno mosi, samu na kutula kitambi ya mutindu yina. Yinki beno me sala? Beno kele ya kufwa meso mingi, na kima ya denomination yina, beno me losa Kieleka. Mpe Kieleka vwandaka na ntwala ya bawu, mpe bawu—bawu kwendaka ntama na Yawu, mpe bikaka Yawu. Mpe ntangu yayi ba me “pesa bawu ngolo ya luvunu, samu na kukwikila na luvunu mpe kufundisama na yawu.” Ya kieleka yawu yina.

<sup>376</sup> Mpe mbeni ya Klisto me baka nionso. Mpe Biblia me tuba, ti, “Yandi vunaka bantu nionso,” n-i-o-n-s-o, “bantu nionso na zulu ya ntoto, yina bankumbu vwandaka ve ya kusonika na nsi ya Bidimbu yina kubanda mbandukulu ya yinza.” Hum! Ntangu yayi, kana Biblia me tuba ti yandi salaka yawu, yandi salaka yawu.

<sup>377</sup> Ba ke tubaka, “Mbote, mu kele ya. . .” Beno bawu yayi. Yinga. Ya kele kaka kieleka. Ya kele kisika ya kindumba ya mutindu mosi. Ya kele systeme mosi yina bandaka na mbandukulu, yina kele mbeni ya Klisto, na mutindu nionso.

<sup>378</sup> Mu ke kuwa ba nzonzila yawu, kasi ya kele. . . Ya kele Kieleka. Mu ke vingila yawu. Amen.

<sup>379</sup> Ntangu yayi, beno tala, yandi ke nunga. Mpe yandi kele kaka na luyalu na ntangu yayi, na yina yandi kele dyaka mbeni ya Klisto, ntete yandi kuma kibulu. Beno ke tubilaka kitumbu ya kulutila mpasi? Beno vingila kaka. Beno tala yina bayina ke bikana awa na zulu ya ntoto ke kutana na yawu. Uh-huh. “Ya ke vwanda na kudila, mpe manyongo, mpe ke kwetisa meno. Samu ti dalango, Rome, me losa maza na yinwa ya yandi, samu na kusala mvita na bayina me bikana na nkuna ya kento, yina

bikalaka na zulu ya ntoto na manima Kento ya makwela me soolama mpe me zanguka. Mpe dalango me sala mvita na bayina bikanaka, ba zolaka kukota ve, mpe ba losaka bawu.”

<sup>380</sup> Mpe Dibuundu ya kieleka ke luta na yawu kana ya lendaka salama; kasi, beno me mona, ba kele na nsi ya Menga yayi, na nzila ya lemvo ya Klisto, mpe lenda luta ata fioti ve na Lukwamusu. Ya ke na ntangu ya Lukwamusu ve samu na bawu. Kima ya kulanda samu na Dibuundu kele Enlevement. Amen, mpe amen! Lukumu na Nzambi. Oh, wapi mutindu mu zola yayi!

<sup>381</sup> Mu ke tuba na beno. Beto ke tubila lunungu yina yandi ke kuzwa, mpe ya kieleka yandi ke nunga. Yandi me salaka yawu dezia. Ya kele dezia na posi, nionso yayi; ya ke salama, na mbongo, ndandu ya mvindu. Ya kieleka. Ba ke zolaka mbongo kulutila Nzambi. Nionso yina ba ke banzaka kele, “Mbongo yikwa yandi ke na yawu?” Yinki ya kele?

<sup>382</sup> Beno zaba, ba ke tubaka, bambala mingi, “Beno pesa mbongo na dibuundu, mpe yandi ke soba yinza. Beno pesa mbongo na dibuundu, mpe yandi ke tinda ba-evangeliste na yinza ya muvimba. Mpe yinki yandi ke sala? Yandi ke nunga yinza samu na Klisto.”

<sup>383</sup> Bika mu tuba na beno kima mosi, nkundi ya munu ya mputu, ya mpofo. Ba ke nunga yinza ve na nzila ya mbongo, kasi na nzila ya Menga ya Yesu Klisto. Beno pesa na Nzambi bantu ya kikesa, yina ke kangama na Ndinga yayi, na luzingu to na lufwa; yawu yina ke nunga. Uh-huh. Ya ke vwanda kaka na kima mosi yina lenda nunga, bayina kele na bankumbu ya bawu ya kusonama na Buku ya Luzingu ya Mwana-dimeme katuka mbandukulu ya yinza. Yina kele kima mosi kaka yina ke kuwa Yawu. Mbongo ke vwanda ve na kima ya kusala na yawu; yandi ke tinda bawu diaka na kati ya binkulu ya denomination ya bawu.

<sup>384</sup> Beto tala. Yinga, ya ke vwanda, muntu ya mayela mingi. Yandi ke vwanda na mayela mingi. Oh, la la, la la! Mpe bana ya yandi nionso pene-pene ya yandi ke vwanda na mayele mingi, na Doctorat ya Philosophie, Doctorat ya Droit awa, Doctorat ya Droit kuna, Q.S.D., A.B.C.D.E.F. tii na Z. Ba ke kuzwa yawu nyonso, ba ke na mayele. Samu na yinki? Ya kele landila lutumu ya Satana. Mayele nionso ya kulutila yimbi yina ke telemina Biblia kele ya Satana.

<sup>385</sup> Ya kieleka ya ke mutindu yina yandi kuzwaka Eve na yawu. Eve tubaka, “Oh, ya me sonama, Nzambi tubaka na beto na kusala mutindu yina ve.”

<sup>386</sup> Yandi tubaka, “Kasi, vingila. Ya kieleka Nzambi ke sala yawu ve. Kasi mu ke zibula meso ya nge mpe mu ke pesa nge ndwenga.” Yandi kuzwaka yawu.

<sup>387</sup> Beto zolaka kuzwa yawu. Beto me kuzwa yawu, mpe, yinsi yayi. Beno tala, yandi ke nunga yinza ya muvimba ya misambidi. Yandi ke nunga, ke sala ngwisani na bantu ya Daniel. Yawu yayi,

nionso zole na kati ya Bantu ya makanda mpe na kati ya bantu ya Daniel, ba-Juif samu na basabala ya nsuka. Mpe beto me kuma kisika yango, beto yemaka mpe yawu na tablo. Mpe beno me mona yawu, na mutindu ya kulunga, yawu yina ya kele. Matondo na Nzambi. Yawu yina. Systeme yina ya organisation kele ya diabulu. Mpe mu ke lwata ve ba-gant samu na yawu, kuna. Beno me mona? Kieleka. Ya kele nsimbulu ya diabulu. Ya kele. . .

<sup>388</sup> Ntangu yayi, bantu ve, ya kele ve bantu yina kele na kati kuna. Bawu kele bantu ya Nzambi, mingi ya bawu. Kasi, beno zaba yinki, ntangu beto ke kuma kuna, na kisika yina Bampungu yayi ke bula; mpe, mbala yankaka mu ke kwisa, Bampungu yayi ke bula. Beno bambuka moyo, ntangu bawu, wanzio ya nsuka. . . Wanzio ya tatu yina me luta, “Beno basika na kati ya yandi, bantu ya Munu!” Na ntangu Wanzio yina ke pamuka, kele na ntangu mosi yina Nsangu yina ke basika awa samu na Mpungi ya nsuka, Nsangu ya wanzio ya nsuka, kuzibuka ya Kidimbu ya nsuka. Nionso ke salama na ntangu mosi. Yinga, tata. Beto ke sungika bima nionso mpe ke kwenda na Seko.

<sup>389</sup> Ntangu yayi yinki? Na ntangu yina muntu yayi ke na kununga. . . Na yina mu ke sukisa. Nzambi ke sala kima mosi na ntangu yina, diaka. Beto tadila ve kaka Satana awa, beno me mona. Beto zonzila yandi ve, kaka. Beno me mona? Na yina kima yayi ya nene ke na kusalama kuna, systeme yayi ya nene ke na kukotaka na ba-organisation yayi, samu na kusala kimvuka mosi, na yina ba ke vukana samu na kutelemina communisme, mpe kukondwa kuzaba ti Nzambi me telemisa communisme samu na kununga bawu. Ya kieleka.

<sup>390</sup> Yinki—yinki—yinki me sala ti communisme kubasika na Russie? Samu na busafu ya dibuundu ya Rome mpe bayina yankaka. Ba me baka mbongo nionso vwandaka na Russie, mpe bawu me kufwa bantu na nzala, mpe na kupesaka bawu kima mosi ve, na kisika, mpe ke zinga kaka mutindu yinza.

<sup>391</sup> Mu vwandaka na Mexique, ntama mingi ve, mpe mu monaka bana yayi ya fioti ya mputu. Ata yinsi mosi ve ya Katolika kele ya kulunga. Ata mosi ve na kati ya yawu. Beno yufula munu wapi kisika. Beno talisa na munu kisika wapi bawu kele. Bayinsi nionso na nsi ya luyalu ya Katolika lenda ve kubaka kizitu ya bawu bawu mosi. France, Italie, mpe nionso yina, Mexique, bisika nionso beno ke kwenda, bawu kele ve ya kulunga. Samu na yinki? Dibundu bakaka nionso yina bawu kuzwaka. Yawu yina Russie losaka yawu na nganda. Beno tala yina salamaka.

<sup>392</sup> Mu zaba yayi, samu mu me monaka yawu munu mosi. Mu vwandaka kuna. Mpe beno ke banza ti jubilé ya wolo ke vwanza kuna, beno ke kuwa bangunga ke bula. Mpe tala mwa kento mosi ya mputu, ke kulumuka na bala-bala, yina vwanza benda makulu ya yandi. Mpe tata nataka bébé mosi; mpe bana zole to tatu na kati ya bawu, ke na kudila. Yandi vwanza sala

funguna samu kento mosi ya kufwa kuna. Yandi vwandaka . . . Yandi vwandaka banza ti yandi ke kwenda na Mazulu, samu na yawu. Oh, wapi mutindu ya kele kyadi!

<sup>393</sup> Na yina mu monaka, kuna, tala ti . . . Ekonomi ya bawu kele ya kuningana mingi! Dibuundu ke baka nyonso yina bawu me kuzwa. Awa, Pancho ya fioti, mu banza—mu banza ti Pancho zola kutuba Frank. Yandi me kwisa kuna, mpe yandi kele mutungi, mpe yandi ke kuzwa—yandi ke kuzwaka ba-centime makumi zole na sabala mosi. Kasi yandi ke baka ba-centime nionso yayi, yandi ke sumba na yawu basapatu. Yawu yina ekonomi ya bawu. Kasi ntangu yayi, kuna, kana—kana yandi, mutungi mpe kisadisi mutungi, mpe ke kuzwa ba-centime makumi zole na sabala mosi, beto tuba. Mu zaba ve yina yandi ke kuzwaka, kasi beto tuba ti yawu yina mutindu ya ekonomi ya bawu mutindu ba me yidika yawu. Beno tala, ntangu yayi, kana yandi ke kuzwaka ba-centime makumi zole na sabala mosi.

<sup>394</sup> Tala Chico ke kwisa, beno me mona, yina zola tuba “ya ntwenia,” mpe yandi ke sala kuna samu na ba-centime tanu na sabala mosi. Mpe yandi kele na bana kumi ya kudisa, kasi muntu mosi ke kwisa konkota na kielo ya yandi, [Mpangi Branham me konkota na chaire bambala mingi—Mu.] mpe ke baka yandi ba-centime tanu, to yiya ya yawu, to nionso, samu na kusumba buzi yina ke pela samu na kuyoka masumu ya yandi, na zulu ya autel ya wolo yina ke vwanda na ntalu ya mafuku ya ba-dollar. Tala. Yawu yina kuvwanda ya ekonomi ya bawu. Ya ke mutindu yina ya ke lutaka na bayinsi yayi.

<sup>395</sup> Kima ke bakaka yawu nionso. Dibuundu ke bakaka yawu nionso. Yandi kele na yawu na maboko ya yandi. Yimeni. Mpe yandi, na mbongo ya ba-Juif, na ngwisani yina, mutindu Biblia me tuba, bawu ke baka nionso.

<sup>396</sup> Mpe na manima yandi ke kuma kibulu. Yandi ke zenga ngwisani ya yandi, mpe yandi ke baka na ngolo. Yandi ke mwangisa ndambu ya nkuna ya kento, mutindu yina. Mpe yandi ke basisa masa na yinwa ya yandi; ke sala mvita. Mpe ya ke vwanda na kudila, mpe manyongo, mpe ke kwetisa meno.

<sup>397</sup> Mpe Kento ya makwela me kwelana, na Nkembo, beno me mona, na ntangu mosi. Beno kondwa yawu ve, nkundi ya munu. Nzambi sadisa munu! Mu—mu zola vwanda kuna. Mu ke kipe ve yina ya ke lomba. Mu—mu zola vwanda kuna.

<sup>398</sup> Ntangu yayi, beno tala, na ntangu yina yayi ke salama, kaka ntete yayi kusalama, mu zola kutuba, na zulu ya ntoto, Nzambi me silaka . . . Na kati ya muvusu yayi nionso ya ba-denomination, yina ke na kuswanaka samu na baluswaswanu ya bawu ya ba-credo, Nzambi silaka ti Yandi ke tinda beto profete ya kieleka ya Ndinga ya kieleka, na Nsangu; samu na kuvutuka na Ndinga ya kieleka ya Nzambi, mpe “Lukwikilu ya batata,” samu na kukulumusa Ngolo ya Mpeve-Santu na kati ya bantu, na ngolo

yina ke telemisa yandi na zulu ya bima yayi mpe ke kotisa yandi, na ntangu yina. Yinga. Ndinga mosi yina me siamisama, ya Yesu Klisto, ti Yandi kele mutindu mosi mazono, bubu yayi, mpe kukonda nsuka! “Tala, mu kele na beno ntangu nionso, tii na nsuka. Mpe bisalu yina Mu ke sala beno mpe ke sala yawu. Mu ke vwanda na beno. Na mwa ntangu fioti, mpe bawu ke mona Munu diaka ve,” samu bawu ke sala organisation mpe ke zimbana. “Kasi beno ke mona Munu, samu Mu ke vwanda na beno. Mu ke vwanda mpe na kati ya beno, tii na nsuka.” Na ntangu yina Yandi tubaka ti nganzi ya Yandi ke mwangana na manima ya nsuka. Yawu yina. O Nzambi!

399 Nani kele munati-mpunda yina ya mpembe? Beno kele ve bampofo. Beno ke mona nani ya kele. Ya kele mbeni ya Klisto, mpe mpeve ya luvunu yina me landila ntangu yayi mpe yina me kota. Salaka. . . Mpe, na yina, beno me mona, Nzambi ke landila na kuvutukilaka yawu. Yandi ke talisa yawu mutindu muntu yina ke na kutambula na mpunda ya mpembe, mpe na munani ya yandi mpe kukondwa matolo-tolo. Yandi kele muntu ya luvunu. Yandi ke na ngolo ve. Beno ke tuba, “Ngolo ya dibuundu!” Wapi kisika ya kele? Yinki ba ke tubaka? Ba ke tubaka, “Beto kele dibuundu ya ntete.” Dibundu ya ntete vwandaka basisa bampeve ya yimbi, vwandaka belula bambevo, mpe vwandaka vumbula bantu ya kufwa, vwandaka mona ba-vision, mpe nionso yina. Wapi ya kele ntangu yayi? Beno me mona? Ya kele luvunu, munani kukondwa matolo-tolo. Huh! Ya kieleka.

400 Kasi, beno me mona, ntangu Klisto kwisaka, Mbele mosi basikaka na yinwa ya Yandi, mutindu nsemo ya nzasi. Yawu basikaka mpe yokaka bambeni ya Yandi, mpe losaka diabulu ntama. Ya zengaka bima nionso yankaka. Mpe Yandi kwisaka, Kazaka ya Yandi ya kupola na menga, mpe na zulu ya mupende ya Yandi ba sonikaka, “Ndinga ya Nzambi.” Amen. Yandi yayi me kwisa, na makesa ya Yandi, yina me katuka na Mazulu.

401 Munati-mpunda ya mpembe yina vwandaka na yinsi ntangu nionso. Yandi ke soba na mbeni ya Klisto. Yandi ke sala yawu, mpe yandi ke kuma profete ya luvunu. Beno me mona, yandi bandaka ntete, mbeni ya Klisto, mpeve; na manima yandi me kuma profete ya luvunu; na manima, na ntwala, ntangu ba me losa diabulu, yandi me kota na nzutu ya muntu na ntangu yina na diabulu. Bitezo tatu! Ya ntete, yandi kele diabulu, na kubanda, mpeve ya diabulu; na manima yandi me kuma profete ya luvunu, mulongisi ya malongi ya luvunu; kima ya kulanda, yandi ke kwisa mutindu diabulu yandi mosi, na kati ya nzutu. Beno me mona? Yawu yina.

402 Mpe na ntangu yina ba me losa diabulu na Mazulu mpe yandi me kota na kati ya muntu, Mpeve-Santu ke mata mpe ke kulumuka na kati ya bantu. Amen. Oh, la la! Yinki ntangu yayi ya nkembo!

Mbasi na nkokila, kana Nzambi kuzola, Kidimbu ya Zole.

403 Beno zola Yandi? Ntangu yayi, beno ke kwikila Yawu?

404 Mu me kanga bande. Ntangu yayi mu ke kuwa Yawu, beno zaba yawu, beno me mona, kasi mu ke vingila yawu.

405 Mu ke tuba na beno kima mosi, mpangi-bakala. Mu me zaba ntangu yayi, samu na mbala ya ntete na luzingu ya munu, samu na yinki Mpeve vwandaka kebisa munu ntangu nionso samu na bawu, samu na organisation yina. Mu ke vutula matondo na Mfumu Nzambi samu na kutalisa munu mambu yayi. Mu zaba ti Yawu kele Kieleka. Yawu yayi, ya me monisama kaka awa. Yandi yina kuna na zulu ya mpunda ke luta na kati ya nsungi, mpe yandi ke kwisa awa na ntwala mpe ke monisama awa, na mutindu ya kulunga yandi lendaka sala. Beno me mona, ya kele yandi. Ntangu yayi beto me vunama na yawu. Ntangu yayi meso ya beno me zibuka ntangu yayi. Beno vwanda ntama na kima ya mutindu yina. Mpe beno zola Mfumu na ntima ya beno ya muvimba, mpe beno bikana kaka na Yandi. Yinga, tata. Beno basika na Babybone!

406 [Kisika ya mpamba na bande—Mu.] Bima tatu: me siamisama na Ndinga, me talisama na foto, me monisama na nzila ya bisalu ya Mpeve, me siamisa ti Yawu kele Ndinga.

407 Bika ti Ndinga kukwisa na zulu ya bamuswale yayi, Mfumu. Belusa bambevo. Belusa bantu nionso ya kubela yina kele awa, Mfumu, mpe bayina ke sonikaka na beto mpe yina ke bokilaka beto.

408 Tata, na ngunga yayi, kubeluka yankaka ke salama na ntangu yayi, mpe beto ke luta na kimalu ya kubeluka ya nzutu. Kasi, Mfumu, ya kele moyo yina, beto zola yawu kuvwanda ya kusungama, Mfumu. Mpe bima yayi fwana kwisa.

409 Beto ke sambila, Nzambi, ti Nge ke baka bampova yayi ntangu yayi yina me tubama, mpe ke kumisa yawu kieleka samu na bantu. Bika ti bawu kumona Yawu, Mfumu. Mu vwandaka sala nswalu samu na ntangu, mpe, Nge zaba, Tata, na yawu mu ke sambila ti bima mingi me tubama ti Mpeve-Santu ke baka Yawu mpe ke monisa Yawu pwelele na kati ya bantima. Bayina ke sonika Masonuku, bika ti bawu longuka Yawu. Bayina ke na kubaka ba-bande to—to—to bayina ke kuwa ba-bande, bika ti bawu longuka Yawu; ba ke tula ve ntendulu ya bawu mosi na Yawu ntangu yayi, kasi ba ke longuka kaka Ndinga. Pesa yawu, Tata. Na Nkumbu ya Yesu, mu ke pesa yawu nionso na Nge, mpe samu na nkembo ya Nge. Amen.

410 [Mpangi-bakala mosi ke na kupesaka profesi—Mu.] Amen. Oh, matondo na Nge, Mfumu!

Beto kumisa kaka Yandi.

411 Oh, kana muntu mosi awa yina zaba Yandi ve na pardo, beno sala yawu ntangu yayi. Beno kuwa kusemba yayi ya kusungama,



mpe ya kikesa. Kana beno zola kubelama kilumbu mosi, beno sala yawu ntangu yayi, samu na bilumbu yina ke kwisa na manima ya yayi.

<sup>412</sup> Yinki kana ya vwandaka kuzibuka ya Kidimbu yayi? Yinki kana ya vwandaka Wanzio yina fidisaka kuna, na yina kupasuka yina, kuna, zangulaka munu na ntoto, kilumbu yina, ntangu mu vwandaka kuna, ntangu bambangi tatu vwandaka pene-pene. Mpe mu tubaka na beno ntete mu kwenda, “Ya ke vwanda na kupasuka yina ke zangula munu kaka kuna na mipepe.” Mpe ba zangulaka munu na mipepe na Bawanzio sambwadi, mpe mu kwendaka na esete. Kuningana vwandaka ti ba zangulaka munu kaka na ntoto.

<sup>413</sup> Ya kieleka, Mpangi Norman, Mpangi Fred Sothmann, beno yina vwandaka na munu ntangu yawu salamaka, kuna na nord ya Tucson? Mpe. . . Mu vwandaka ya kuvwanda kuna, mu vwandaka katula manama na bilele ya munu, ya kieleka yina vision tubaka. Mpe ya vwandaka na sude ya. . . na Tucson. Kana ya kele kieleka, beno telemisa diboko ya beno, Mpangi Fred, Mpangi Norman. Bawu yina. Beno telema, samu bantu kumona ti beno vwandaka kuna, mutindu bambangi. Mu me kuwaka ntete ve kima mutindu yina, na luzingu ya munu.

<sup>414</sup> Mpe, na mbala mosi, bawu zombaka ve, kilumbu ya muvimba. Mu dodokilaka Fred, na suka yina landaka. Yandi zaba yayi ve. Mu dodokilaka yandi na kukwenda kuzomba, mu vwandaka landila na kutuba, “Sala yawu. Sala yawu.”

<sup>415</sup> Kasi Yandi tubaka, Yandi tubaka na munu kuna na manima, “Yandi ke sala yawu ve. Nge ke kwenda na Este, kaka na ntangu yayi.”

<sup>416</sup> Mpe Bawanzio sambwadi yayi! Kupasuka ya ntete, yandi zibulaka. Yinga. Yinki kana ya kele? Beto kele na ngunga ya nsuka. Beno me mona?

Mu zola. . .

Beto sambila Yandi.

Mu zola Yandi

Samu Yandi zolaka munu ntete

Beto telama.

Mpe futaka mpulusu ya munu

Na yinti ya Calvaire.

<sup>417</sup> Beto sukula bantima ya beto ntangu yayi, bampangi, na yina beto ke kulumusa bayintu ya beto. Bampangi ya munu ya bakento, mu me tuba ngolo na beno, kasi mu me sala yawu na zola ya busantu. Mu me sala yawu samu mu ke zolaka beno; samu na kuvwanda na bansuki ya yinda, mpe kulwata bilele ya mbote mpe kusala mambu ya mbote. Mu me sala yawu samu na zola ya busantu. Beto vedisa konsiansi ya beto ntangu yayi na yina—na yina ya kele na masa ya Javel ya Nzambi. . .

<sup>418</sup> Mbasi na suka, mu banza ti ntangu ke vwanda me luta. Yandi lendaka belama. Bima yayi ba me samuna mutindu yayi, bampangi, lendaka vwanda nsuka ya kosalu ya kusambila. Beno me banzaka ntete na yawu? Mbote, mu zaba ve ti ya kele. Mu ke tuba ve ti ya kele. Kasi yinki kana ya kele? Yinki kana ya kele? Yinki ntangu yayi? Ya kele dyaka ve na mpulusu; yimeni, na ntangu yina. Mu banza ti ya kele ve mutindu yina, kasi ya lendaka salama.

Mu zola Yandi, mu . . .

Vedisa beto, Mfumu. [Kisika ya mpamba na bande—Mu.]

. . . zola Yandi

Samu Yandi zolaka munu ntete

Mpe futaka mpulusu ya munu

Na yinti ya Calvaire.

<sup>419</sup> Nkumbu ya Mfumu kusakumuka! Nkembo na Nzambi! Mu ke zolaka nsatu yina ya lembami. Beno ke kuwa Yawu ve? Mpeve-Santu yina kele kuna pene-pene, mutindu, ya ke na kufulukaka na kutambulaka na Yawu. Oh, mutindu ya kele kitoko mingi! Oh, beno banza na kyadi ya Yandi!

Mu zola Yandi, mu zola Yandi

Samu Yandi zolaka munu ntete

Mpe futaka mpulusu ya munu

Na yinti ya Calvaire.

<sup>420</sup> Beno zimbana Yawu ve, nkundi ya munu. Beno zimbana Yawu ve. Beno baka Yawu na beno. Beno bikana na Yawu. Beno tula Yawu na zulu ya oreiller ya beno. Beno zimbana Yawu ve. Beno bikana na Yawu. Nzambi sakumuna beno ntangu yayi.

Mpangi Neville, pasteur ya beno.



*KIDIMBU YA NTETE* KNG63-0318  
(The First Seal)

BANDANDANI YA LUZAYIKISU YA BIDIMBU SAMBWADI

Nsangu yayi ya Mpangi William Marrion Branham, kulongamaka na Kingelesi, na Kilumbu ya ntete na nokila, na kilumbu ya 18 ya Ngonda ya tatu, na mvula 1963, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)